

**NATIONAL ASSEMBLY OF
SEYCHELLES**

Wednesday 3rd February 2021

The Assembly met at 9am

National Anthem

Moment of reflection

Mr Speaker in the Chair

MR SPEAKER

Bonzour tou dimoun, tou bann Manm e bonzour tou nou lodyans an deor Lasanble. Premyerman mon pou pran en pti size, en demann pou en drwa repons avan nou la lo lot size.

Dan son repons lo Leta Lanasyon semenn pase, Onorab Michel Roucou ti fer referans avek en ka dan *Seychelles Fire and Rescue Agency*, kot i ti kestyonn, lefe ki en dimoun ki i konnen i pa'n ganny en promosyon parey lezot bann koleg in gannyen. Mon pou lir premyerman komanter ki Onorab Roucou ti fer. Apre ki i dir poudir "sa zenn *homme* ki travay dan *Fire Service* i pa'n ganny promosyon." Onorab Roucou i dir e mon quote, "ki'n arive detrwa mwan pase, nou'n vwar poudir ti annan bann promosyon laba.

E li aköz petet son Siperyer i annan serten problemm avek li Mr Speaker, mon pa konnen. Ouswa si i annan problemm politik e li i ti ganny kit akote." Sa i parol Onorab Roucou.

Mon remarke ki Onorab Roucou pa'n fer okenn lakizasyon direk. In lev sa posibilite e dan lev sa posibilite in donn lenpresyon ki li i krwar sa i le ka.

Alor mwan pou lir, mon'n ganny en demann pou Drwa Repons sorti kot *Seychelles Fire and Rescue Services Agency* e mon pou lir sa porsyon son let ki aplik direkteman avek sa ki Onorab Roucou in dir.

(1) 'The SFRSA denies all allegation made that promotion was given as per political affiliations. As being a disciplinary body and a public service, we serve the country and affiliate with no political body and no decision is made based on any political belief.

(2) The management also denies the allegation made that the staff in question was not promoted as a superior, had a grudge with them. It should be noted that approval for promotion were made by a Committee and not one individual.

We of the SFRSA pride ourselves on being just and impartial to both the people we render service to, and to our staff. " Sa i pozisyon SFRSA lo la.

E mon pa pe lir larestan son let, akoz i eksplike ki manner zot in donn promosyon lezot dimoun *and so on*. E mon pa krwar sa i relevan avek parol Mr Roucou e zot demann pou Drwa Repons.

Mon'n sirkil zot let antye lo *mail* pou bann Manm ganny en apersi lo sa deroulman. Alor avek sa mon santi mon'n satisfere demann SFRSA pou met zot pwen devan.

Onorab Vidot, mon pa anvi al dan en deba lo la, mon a permet ou en komanter si ou oule fer, apre nou pe frenm sa silvouple. Mersi.

HON AUDREY VIDOT

Bonzour Mr Speaker. Mr Speaker annefe mon napa nanryen pou fer avek komanter *Right of Reply*. Me parkont mon annan en *matter of privilege* anba nouvo *order 41*. Avek ou permisyon Mr Speaker.

MR SPEAKER

Wi.

HON AUDREY VIDOT

Yer mon ti anvoy en *Urgent Question* kot ou lofis, Madanm Clerk in reponn mwan, me parkont mon santi koman en Manm Lasanble, mon privez in ganny afekte.

Akoz koman en Manm i mon drwa e responsabilite pou mon reprezant pep Seselwa enkli mon distrik. Kot ler piblik i demann mwan pou adres zot konsern pou kestyonnen, malerezman mon pa pe ganny sa loportinite pou mwan kestyonn Minis lo sa size.

Mon ti ava demann ou avek ou permisyon pou piblik vwar e tande letan mon lir sa kestyon. Menm si Minis pa la, e akoz rezon mon'n demande pou sa kestyon pase. Silvouple.

MR SPEAKER

Mersi Onorab Vidot.

HON AUDREY VIDOT

Mon kapab lir mon kestyon?

MR SPEAKER

Mon'n ganny ou kestyon bomaten, mon'n enform Madanm Clerk ki nou pa kapab pran sa kestyon la. Nou'n zwenn dan *ABC* e nou'n fer *Order Paper* pou sa semenn e nou *Order Paper* i fini konplet. Mon pa pe lev lezot kestyon ...

HON AUDREY VIDOT

Mr Speaker.

MR SPEAKER

Ekout mwan Onorab Vidot, mon pa pe lev lezot kestyon. E an plis mon'n enformen e mon aprann ki sa i osi en *matter* ki anba envestigasyon.

E pou le moman nou pa pe demann Minis Zafer Entern pou vin reponn sa kestyon. Me selman mon ava an kominikasyon avek li pou demande, kan nou kapab ganny lenformasyon lo sa ka. Mersi.

HON AUDREY VIDOT

Mr Speaker, i pa sa ki Madanm Clerk in enform mwan bomaten. Madanm Clerk in dir avek mwan, (i pa'n nonm mwan ABC li) Madanm Clerk in enform mwan poudir ou'n donn lenformasyon ki sa i anba *investigation*.

MR SPEAKER

Ki sa i kwa?

HON AUDREY VIDOT

Ou'n dir poudir sa *matter* i anba *investigation*.

MR SPEAKER

Wi.

HON AUDREY VIDOT

Napa nanryen ki'n ganny mansyonnen an referans avek *Order Paper* lo ABC.

MR SPEAKER

Ok.

HON AUDREY VIDOT

Me mon konsern se ki piblik i anvi konnen si sa prosedir i normal, ki okenn dimoun ki pe ganny *investigate* pou okenn soupson, aksyon kriminel i zis ganny deporte dan pei? Prenon kont ki Sesel nou deza annan dimoun ki'n pas dan, etranze ki'n pas dan nou Lakour, in ganny kondannen prizon, zot Montagne Posée pe servi zot santans. Nou oule zis konnen si i en prosedir normal.

MR SPEAKER

Mersi, ou'n fer ou pwen Onorab Vidot.

HON AUDREY VIDOT

E mon krwar i mon drwa koman en Manm.

MR SPEAKER

Ou'n fer ou pwen Onorab Vidot. Mon pa konnen egzaktaman ki Madanm Clerk in dir ou. Me selman mon'n mansyonn sa rezon ki nou ti'n fer e nou ti'n fer *Order Paper* deza.

Konman mwan, pou azout avek mon repons, me mon ti'n osi enform Madanm Clerk ki nou pa pe pran sa kestyon aköz sa size i anba *investigation*. Madanm Vidot mon pou demann ou pou aret la. Mon a ekout lezot Manm si zot annan klarifikasyon lo prosedir si zot pou eklersi mwan lo *Standing Order*.

Akoz mon krwar, nou kapab kontinyen regarde ki bann Manm i war zot privez anba *Standing Order*. Onorab Pillay.

HON SEBASTIEN PILLAY

Mersi bokou Mr Speaker. Mr Speaker *Standing Order* in ganny ekrir pou ou koman Speaker ler i annan en size Nasyonal, pou ou determinen koman Speaker si sa size Nasyonal i merit vin devan Lasanble, i bezwen ganny klarifye.

Sa ki nou'n ganny dir sorti kot Minister Zafer Entern pou mwan i pa fer sans! Sa dimoun in fini ganny arete, in fini ganny deporte. Kestyon Onorab Vidot i al lo sa size deportasyon sa dimoun, aköz i pe demande anba ki sirkonstans sa dimoun in ganny deporte.

Koman Lasanble mon krwar i enportan, vi ki nou'n *swear en oath* pou nou *uphold*

nou Konstitisyon, pou nou klarifye.

Akoz nou Konstitisyon i prevwar dan ki fason en dimoun i ganny deporte, sirtou par lefe ki sa Lalwa i ankor en Dekre e i en Lalwa ki sorti depi dan letan *One Party State* e ki ozordi dan en Gouvernman demokratik, nou pe servi en Lalwa *One Party State* pou nou fer en mezir kont en endividi.

E mon krwar sa ki enportan, si zot pe nonm mon Marek, aköz zot pe kasyet ozordi pou nou konnen aköz sa madanm in ganny deporte? Se sa ki nou bezwen demande. E mon krwar i normal.

(Interruption)

MR SPEAKER

Order silvouple.

HON SEBASTIEN PILLAY

E i lezitim, i lezitim pou Lasanble baze lo konsern piblik, baze lo kestyon ki piblik pe demande, pou nou konnen aköz sa dimoun in ganny deporte, an relasyon avek ki sirkonstans?

Now si sirkonstans i konsern lenvestigasyon dan bann aksyon kriminel, i pa ava al dan son aksyon kriminel. Be i ava eksplik nou, aköz in ganny deporte.

E Mr Speaker pou azoute, lo en pwennvi patriyotik, lo en pwennvi koman en Seselwa, nou annan nou, nou bann frer ki Lezip in ganny arete, zot pa ti ganny deporte, zot in ganny arete. E zot in bezwen servi santans Lezip e dan plizyer pei, so Mr Speaker.

MR SPEAKER

Mersi.

HON SEBASTIEN PILLAY

So Mr Speaker, mon krwar ki Lasanble ti devret konsider ki dan lentere piblik, nou met sa kestyon devan Lasanble e Minis i vin eksplik Lasanble e nou tir bann dout. Mersi Mr Speaker.

MR SPEAKER

Onorab Pillay mon'n tann ou, mon'n konpran ou e ...

(Interruption)

MR SPEAKER

Order silvouple! E mon retourn lo premye remark ki mwan koman Speaker, mon annan drwa e privez pou regarde ki size ki dan lentere Nasyonal pou vin dan Lasanble. Onorab Georges.

HON BERNARD GEORGES

Mersi Mr Speaker. Mr Speaker mon war ki lo lot kote

zot anvi fer en pe politik bomaten. Me selman sa ki tris, se ki ou'n donn en direktiv. Se ou ki Speaker Lasanble. Napa okenn lezot Speaker isi dan sa Lasanble apard ou.

(APPLAUSE)

MR SPEAKER

Se ou ki pou deside, se ou ki pe deside ki pou arive. Annefe i annan 2 keksoz bomaten ki'n ganny dir e ki paret ki lot kote pa'n tande. Premye, se ki ou'n dir ki a sa moman ou pa pe aksepte sa kestyon. Ou pa'n dir ki sa kestyon pa pou ganny demande, ou'n dir ki a sa moman, akoz *Order Paper* in fini fer e deza i plen, napa en posibilite pran sa kestyon dan sa 2 zour.

E sa se, i toutafe normal akoz nou konnen, ki se lot kote menm ki'n ranpli *Order Paper* avek en *PNQ*, avek en lot *Urgent Question*. Donk ou pa kapab vini e ensiste ki ou kestyon i pli enportan ki bann lezot kestyon. Sa se premye, sa se premye pwen, e Onorab Vidot i konn sa tre byen, akoz i pa fek vin dan sa Lasanble.

Dezyenm keksoz bomaten, se ki ou'n demande adres ou lo pwen prosedir. E mwan mon war ki *Leader* Lopozisyon, olye

adres ou lo prosedir in oule fer politik e in oule antre dan size sa deba ki pa letan la a sa moman. Nou ava fer li a son moman apropriye.

E trwazyenmman, ou'n dir ki ou ou'n deside ki pou le moman ou'n ganny lenformasyon ki sa kestyon i ankor anba *investigation*.

E mon sir ki ou biro ava eksplik avek Manm ki pe anvi demann sa kestyon, kan i ava apropriye pou li demann sa kestyon, dan ki laform son kestyon i kapab ganny donnen e avek lekel ki i pou poz sa kestyon. Mersi Mr Speaker.

MR SPEAKER

Mersi. Mon santi mon'n tann ase lo la. E mon konpran byen bann *issues*. Onorab Pillay mon konpran *issue* ki ou'n leve an term privez Lasanble e mon tenir li an kont.

Sepandan mon desizyon i reste, i reste parey mon'n anonse. Alor nou a repas, nou a pase silvouple.

HON SEBASTIEN PILLAY

(Off-Mic)

MR SPEAKER

Ale, si ou pe al lo en lot soz privez wi?

HON SEBASTIEN PILLAY

Mersi Mr Speaker. Mr Speaker *as a matter of privilege* mon krwar ki mon annan gran respe pou mon koleg *Leader Zafer Gouvernman*.

Me selman mon krwar i konnen sa term ki in servi ki nou nou'n ranpli *Order Paper* avek kestyon, i konnen poudir koman Manm Lasanble i nou devwar pou met bann size devan Lepep Seselwa. Mon pran sa term ki'n dir 'nou'n zis ranpli *Order Paper* avek kestyon' koman en term ki pa devret ganny servi dan nou Lasanble. Sirtou pa en Manm ki mwan ek li nou'n travay lo sa *Standing Order* pou nou avans keksoz pli devan.

MR SPEAKER

Mersi Onorab Pillay. Mon sir ki ...

HON SEBASTIEN PILLAY

... Mr Speaker si lo lot kote zot pa oule anmenn kestyon pou demann Gouvernman, sa i zot problem. Mersi Mr Speaker.

MR SPEAKER

Onorab Pillay, mersi. Mon santi ki Onorab Georges in servi sa term 'ranpli avek kestyon' dan son sans ordiner. Se ki *Order Paper* i annan kestyon lo la e son letan i plen.

Mon pa war okenn lakizasyon kont ou privez ladan. Mersi bokou. Nou a pase. Nou pou retourn lo size *Air Seychelles* ki nou ti komanse yer. E ozordi dan sa sesyon, nou'n prevwar ki bann Manm i kapab fer zot ladres pou analize, fer sentez lo bann pwen ki'n ganny met devan yer.

Yer in plito en sesyon pou rod lenformasyon. E zot entervansyon in plito lo pou demann kestyon, klarifikasyon nou bann partisipan ki'n vin devan nou.

Ozordi nou annan sa loportinite pou eksprim nou lo sa size, e alor sa sesyon i devret koumsa.

Mon pou rezerv 20 minit a lafen sa sesyon pou *Leader of Government Business* e *Leader* Lopozisyon pou rezim diferan pozisyon e fer sir ki tou bann pwen in kouver.

Me apard sa nou a les lasal ouver pou bann Manm. Me selman mon pou demann entervansyon reste kourt. 5 minit silvouple, fer pwen ki zot konsidere i devret ganny fer an relasyon avek sa. Mersi. Avek sa nou a ouver lasal pou entervansyon. E wi, eskiz mwan en pti moman. Mon'n ganny Onorab John Hoareau. E sa kote ti lekel? Onorab Sandy Arissol. Mersi.

Mon pa konnen si nou annan letan pou tou sa, me espere si zot gard, wi, mon krwar mon'n pran tou. Wi, Onorab Loze mon'n war ou.

Mon krwar mon'n pran tou bann non. Wi Onorab Adelaide ek Onorab Zialor mon'n war zot, mersi. Nou, si zot gard zot lentervansyon kourt, mon krwar nou kapab donn tou Manm en posibilite pou adrese. E zis lot pti leplikasyon, mon pa'n sezi lekel ki'n lev lanmen avan, i enposib.

Alor sa ki mon pou fer se pran en pe Manm tou lede kote e mon pou donn en pe lapliferans priyorite bann Manm ki mon ti konnen yer in lev lanmen pou demann kestyon e ki pa'n zanmen ganny posibilite pou poz kestyon.

E avek sa, toudmenm mon pou komans avek 1, 2 la ki ti'n lev lanmen premye. Mon a komans avek Onorab Hoareau.

HON JOHN HOAREAU

Mersi Mr Speaker. Bonzour Mr Speaker, bonzour tou dimoun a lekout, bonzour tou Manm Onorab. Mr Speaker sa size *Air Seychelles* in enn ki, parey tou leres Manm mon'n swivre avek bokou lentere.

Mon'n menm partisip dan sesyon ki ti fer Sanmdi

avek *Air Seychelles* ki ti *off camera*. E mon'n profite pou fer sir ki mon'n enform mon lekor avek tou bann *pros and cons* lo sa size.

Me ozordi mon pou baz mon lentervansyon lo 3 opsyon ki *Air Seychelles* in dekrir koman *the way forward*. Premye opsyon pa fer nanryen, dezyenm opsyon retourn kot *bondholders* avek en pli bon lof e trwazyenm opsyon met *Air Seychelles* anba administrasyon.

Pou mwan mon lopinyon se ki mon war i annan lavantaz, i annan bokou lavantaz si *Air Seychelles* i pran sa pozisyon pou pa fer nanryen, oubyen Gouvernman i pran pozisyon pou pa fer nanryen a sa moman.

Lo pwennvi biznes i pou donn en *breathing space* sa lakonpanyen. Parey nou dir, pou *buy time* en pe. Ki sa lakonpanyen i bezwen, pou li kapab met an mars son bann program reform e restriktirasyon ki'n konmanse deza.

I pou osi annan en lefe lo bann *bondholders*, vedit i pou fors zot petet pou re antre dan en negosyasyon avek *Air Seychelles*. Pandan sa letan kot lekonomi i semi fonksyonnel,

nou pa kapab retir larzan dan nou lekonomi pou pey sa det.

Alor se sa rezon ki pou, ki Gouvernman i bezwen retenir nenport ki resours ki annan pou fer marse e fer rekomanse nou lekonomi a sa moman. I pou donn Gouvernman osi en sans pou fer en *plan b* parey nou dir, si an ka i annan en sans pou frenm *Air Seychelles* pli tar.

Pou travayer par egzamp dan sa *plan b*, i pou bezwen, zot pou bezwen ganny *retrain* oubyen *reskill* pou fer serten travay, serten zot. Oubyen redeplwayman, oubyen rod en lot lanplwa alternatif, organiz zot *redundancy package* e tousala i pran letan.

Pou konpanyen i pou en moman pou re negosye avek bann *leasing company*, pou ki sa 2 gro, ki zot *lease* sa 2 gro avyon e bann garanti avek Labank pou sa 2 *twin otters*.

E tou leres lorganizasyon ki bezwen ganny dil avek ti en prosedir *liquidation* evantyelman ganny met an plas.

Deswit Gouvernman i bezwen re antre an negosyasyon avek *TDB, Traders Development Bank*, pou revwar bann kondisyon e laliny kredi sa \$30 milyon pou re pey sa det USD11.7milyon avek *Etihad* e

pou *secure* en lof *USD20* milyon pou sa bann *bondholders*.

I osi enportan mon krwar ki Gouvernman osi i reget dan posibilite lezot laliny kredi, ki petet i kapab donn en posibilite donn en kredi pli favorab ki pli soutenab pou pei.

Mon krwar ki *Air Seychelles* i bezwen osi kontinyelman reget son loperasyon, pou li kapab vin sa lakonpanyen ki nou ekspekte i vini dan lefitir si i pou reste an egzistans.

An vi ki *fuel maintenance cost* e lapey i 3 pli gro *cost component* pou sa lorganizasyon, mon krwar ki *Air Seychelles* i bezwen travay pli dir e revwar sa bann sa 3 konponan.

Serten zefor in ganny fer lo *fuel efficiency* an se ki konsern bann kalite *aircraft* ki pe ganny servi. E *salary cut* in deza konmanse.

Me an plis ki sa, *Air Seychelles* i bezwen antre an en kontra, *fuel hedging*. E pou eksplik sa, *fuel hedging* se en kontra kot ou antre dan en lakonpanyen avek en lakonpanyen pou fer sir ki ou pey ou *fuel* a en pri *fix*. Sa se pou anpes volatilize pri lo marse enternasyonal.

MR SPEAKER

5 minit. 5 minit Onorab Hoareau en. In arive.

HON JOHN HOAREAU

Alor, wi, wi. Alors sa i ava fer ki zot kapab fer zot *ek management* e gard zot pri tiket stab e revwar zot loperasyon. Mr Speaker i annan plizyer lezot ankor keksoz ki mon ti ava kontan dir.

Me parey ou'n dir mon, mon pou termin lanmenm. Me en pwen pli enportan ki mon krwar mon devret soulinyen se ki *Air Seychelles* i bezwen fer en gran zefor pou anpes koripsyon e bann *petty thief thefts* dan sa lorganizasyon.

Koripsyon o nivo sa ki pli o dan *management*, ki nou konnen in arive an se ki konsern negosyasyon bann kontra. Fodre zanmen bann kontra i ganny negosye *solely* en dimoun ki ale al negosye en kontra lo en *personal basis*.

Nou konnen poudir sa in arive e in enn bann fakter ki'n ede plonz sa lakonpanyen dan bokou det. Mersi.

MR SPEAKER

Mersi Onorab. Mon *sorry* pou sa 5 minit. Me selman nou bezwen swiv sa lareg. Mon ava apel Onorab Naddy Zialor.

HON NADDY ZIALOR

Mersi Mr Speaker. Bonzour tou dimoun. Mr Speaker mon pou tre bref, pou mon fer mon lentervansyon tre kourt posib. Me an premye lye, yer mon'n asize avek bokou pasyan, pou mwan apresye sityasyon ki *Air Seychelles* i ladan.

E mon pou dir ki mon sagren. Annefe Sesel i sagren par lefe ki i nou lafyerte koman en pep ki ozordi i an kestyon. E yer atraver ou, mon pou agree letan Onorab Gill i dir ki nou'n fouy trou, trou ti ptipti, nou'n fouy trou gro, sitan gro ki ozordi nou dan sa sityasyon.

E mon pa pou neserman agree avek *Chairman Board* ler i dir poudir annou bliy lepase e *focus* zis la ozordi. Me lefe i reste ki sityasyon lepase ki'n fer nou ariv kot nou ete ozordi.

Avek sa petet mon a fer serten refleksyon, ouswa serten kestyon ki ava ed Gouvernman pou regarde ki nou fer de lavan. (1) se definitivman *redundancy* i en topik ki tous nou tou. So enn ler mon ekoute, i annan 2 fason fer.

I annan swa nou frenm enternasyonal e nou *redundant* mon krwar in dir a pepre 300 dimoun, 200 dimoun. Ouswa nou fer restriktirasyon. Me dan restriktirasyon osi petet i pou

bezwen annan serten *redundancy*.

Parske lefe i reste ki volim kantite dimoun ki pe travay, eski i pa i annan en lefe loperasyon *Air Seychelles*? Sa i kestyon. E yer swar ler mon asize mon realize, *well* zot ki la, ki'n la pou bokou letan, zot ava koriz mwan si mon mal, fer mon mazin en pti git sityasyon *SMB to STC*. Kot a en moman donnen nou ti bezwen frenm *SMB* pou nou ouver *STC*. Eski sa i pa en opsyon petet pou nou mazine si vremen nou anvi nou *airline* i reviv? I reviv.

E lo nivo domestik, mon santi ki *Air Seychelles* i bezwen mazine en pti pe pli lwen ki sa. Bezwen mazine en pti pe pli lwen ki sa. Eski nou kontinyen fer zis Mahe/Praslin/ - Praslin/ Mahe.

Oubyen eski nou antre an *partnership* avek *IDC*, ki dayer i osi en konponan Gouvernman, e vwar ki fason nou kapab eksplor plis reveni? An menm tan mon santi ki *STC*, ki *Air Seychelles* i bezwen retourn kot zot *staff* e ekout zot.

Parske letan nou'n la dan sa Lasanble, i annan en kantite staff *Air Seychelles* ki'n anvoy nou mesaz, ki'n met rekomandasyon. So mon krwar en moman donnen nou pou bezwen ekout sa bann dimoun.

E pe enport ki desizyon ki Gouvernman i pran, annou mazine ki nou pe pran li koman en pei, non pa koman en endividi, non-pa koman en parti, me koman en pei.

Sakrifis si nou pou bezwen fer, nou pou bezwen fer koman en pei. Me fodre pa ki sa sityasyon ki nou ladan i kontinyen repete Mr Speaker. Mersi.

MR SPEAKER

Mersi Onorab. Mon a pas kote isi. Onorab Loze.

HON JOHAN LOZE

Mersi Mr Speaker, bonzour Mr speaker. Mr Speaker *Air Seychelles* ti fly larout Bangkok dan leparse. Bangkok ti en larout ki ti popiler avek Seselwa, ti osi annan bann *carry over* bann etranze e ti en larout ki ti profitab pou *Air Seychelles*.

Be ki ti arive? Avek *Open Sky Policy* *Amirates* ti antre Sesel e *Amirates* li i ti a lasas pou fer Seselwa konn son prodwir.

Vi ki Seselwa pa ti pe fly *Amirates* i ti bezwen anmenn zot abor pou zot goute, konnen e vin *addicted* ek son prodwir. *So basically*, ki li i ti fer, i ti antre dan en *price war* avek *Air Seychelles* lo sa laliny

Bangkok/ *Thailand* ki ti annan bokou Seselwa ki ti pe fly.

So li *Amirates* i ti *undercut* son *price*, *Air Seychelles* pa ti kapab soutenir sa lager avek li. *This being said*, *Amirates* to Bangkok ti en *flight 16 hours* avek en *layover* in Dubai.

Still *Air Seychelles* pa ti kapab *compete* e *Air Seychelles* ti *pull out*. Le moman ki *Air Seychelles* ti *pull out*, *Amirates* ti fer monte son pri. Imedyatman son pri ti monte e se sa bann *predatory price practices* ki *Chairman Board* ti pe koz lo la yer.

Se sa ki zot fer sa bann gran *airlines*. I normal, *this is business*. Be *case* ki ganny mete devan nou, *case* ki ganny mete *so far* ki ganny prezante ek Seselwa se ki i annan 2 largiman.

Swa zot vini zot dir nou, *arh Air Seychelles* i en largiman emosyonnel, *pride*. Be ou pa kapab baz lo lemosyon ouswa vini ou dir nou, ou konnen i annan en largiman biznes finansyel la.

Be i osi annan *the issue off sovereignty*, nou en nasyon souvren nou.

Eski nou koman en nasyon nou *give up* nou sel fason *to get of this rock* kot nou ete lo milye en losean e *surrender* li avek sa bann gran

airlines, ki nou tou nou konnen zot pratik bann *predatory habits*.

Eski nou *surrender* nou souvrennte avek zot koman en Nasyon? Mwan sa i mon largiman osi. I annan sa *issue* souvrennte ki mwan mon tenir for lo la, letan mon mazin *Air Seychelles*. Pa zis lemosyon e pa zis finans.

I en *lifeline* pou nou sa. Eski nou, nou *give up* nou *lifeline*. E la mon pa pe koz lemosyon, mon pe koz *survival* koman en nasyon.

Eski nou pran nou sirvi pou nou koman sa Nasyon Seselwa, sa pep krepri lo milye en losean la, nou met li dan lanmen *quelqu'un d'autre*? E mwan mon pa krwar ladan.

Mwan mon krwar nou koman en Nasyon, nou ase doue, nou ase kapab. Nou kapab *evre* pou sov nou *airline*, me *not only* nou *airline* i pli enportan, tou sa bann *jobs* ki ale avek sa *airline*!

Air Seychelles i en liniversite spesyalizasyon pou over 500 fanmir Seselwa. I parey *SBC* li, i *train* dimoun.

Ler in *train*, in fer sa bann dimoun, in donn zot lekspertiz, in fer zot vin bann eksper, en kantite zot i ale i al dan bann lezot landrwa travay,

zot fourni zot lekspertiz atraver lekonomi Sesel partou.

So i pa zis en kestyon tax, i pa zis en kestyon *Pension Fund*, i pa zis en kestyon larzan. Menm lo kestyon *human resource development Air Seychelles is beyond* par.

Akoz sa nivo *precision skill* ki li i bezwen koman en *airline*, napa byen, byen landrwa ankor ki bezwen sa deza, par son natir ou pa bezwen sa. Be ki vedir li i pe form nou Seselwa, nou zenn Seselwa lo en nivo ki napa ankor.

So nou *give up Air Seychelles*, nou *give up* sa *regional* ouswa sa *international arm*, ouswa parey *LOTO* pe dir, sa *international wing of Air Seychelles*, *then* nou pe *surrender* en bout nou souvrennte, nou pe *surrender human resource development* nou bann zenn Seselwa. Ki zot, zot kapab pe grandi, devlope, epanouir e al devlop nou lekonomi plis ankor.

E mwan mon pa war en opsyon la, napa opsyon, napa 2, 3, 4 opsyon apard sov *Air Seychelles*. Mersi Mr Speaker.

MR SPEAKER

Mersi Onorab Loze. Onorab Sandy Arissol. E apre sa mon pou apel Onorab Rosie

Bistoquet. So si ou ti a kontan met ou pare pou al lo *micro*. Onorab Arissol.

HON SANDY ARISSOL

Mersi Mr Speaker. Bonzour tou bann Manm, bonzour tou dimoun ki a lekout. Mr Speaker ou konnen i toultan en plezir letan ou koman en endividi, ou vwar ou dan en pozisyon kot ou kapab pe lager pou en lot group dimoun.

I toultan en plezir letan ou koman en endividi ou kapab vin en lavwa pou en lot group dimoun, ki santi ki zot lavwa pa pe ganny ekoute. E yer sete egzaktaman sa ki nou nou'n fer koman bann Manm Lasanble Nasyonal.

E pa zis lo nou kote latab, i lo tou kote, tou lede kote latab. Parske nou'n santi poudir i nou devwar koman Manm Lasanble, pou nou tap en laport, pou nou fer tande lavwa bann travayer *Air Seychelles*.

E mon i en plezir Mr Speaker parske letan mwan koman en Manm Lasanble ki annan plizyer travayer *Air Seychelles* dan mon distrik e zot in telefonnen, sa ki'n anvoy mesaz, sa ki'n anvoy *email*, sa ki'n *chat* avek ou, mon ti a kontan profite dir zot mersi bokou pou tou zot kontribisyon.

Me malerezman parey zot in swiv, napa ase letan pou nou kapab demann tou kestyon ki zot in anvoye. Be selman zot kontribisyon i touzour enportan.

Mr Speaker i en plezir, parske sa ki nou ti pe koz lo la yer sete saler bann travayer, sete lasyet manze bann travayer.

Alor mon pou demann Senyer kouraz e lafors pou mon kontinyen ganny sa lafors, pou mwan kontinyen lager pou mon bann frer pou zot saler, pou zot *allowance* e pou zot lasyet manze.

E mon a demann Senyer liminite pou mwan pa demann pou mwan ankor. E mon demann Senyer pardon si mon'n demann zis pou mwan dernyen fwa.

Parske lezot travayer i bezwen en saler, zot bezwen *allowance*, be mwan mon pa bezwen. Alors mon remerisye Senyer pou sa liminite pou mwan kontinyen defann e reprezant bann travayer ki bezwen zot saler, ki bezwen zot *allowance*, ki bezwen tou zot benefis.

Enkli bann zournalis ki tanzan fwa zot *text* ou e zot demann, ou serten led an relasyon avek sa ki ou gannyen koman Manm Lasanble. Mon

dir Senyer mersi bokou pou sa liminite.

Dezyenm pwen Mr Speaker ki mon ti a kontan adrese, se an relasyon avek size *Air Seychelles* li menm koman en topik.

Kantite size in antre, kantite sizesyon in antre, kantite pwennvi in antre, parey mon'n dir e nou e nou remersye bann dimoun pou sa.

Ou konnen, i annan dimoun i dir ek ou poudir i annan plizyer bann dimoun ki'n la dan lepase, depi 2008/ 2009 *Air Seychelles* pe fer fas avek en kantite difikilte.

Me letan zot pwennvi ti ganny dir, personn pa ti ekoute. Parske sa letan ti annan zis en pti group dimoun ki ti krwar zot kapab anmenn *Air Seychelles* pli lwen, oubyen anmenn *Air Seychelles* kot i ete lo son zenou ozordi.

Dezyenm lopinyon ki bann dimoun in dir, i annan sa ki nou apel *Skychef*, akoz *Skychef* pa ganny enkorpare avek *Air Seychelles*, olye en pti group dimoun ki anmas tou benefis dan pei, be *Air Seychelles* li i kontinyen rape lo son zenou.

Dezyenm lopinyon ki dimoun in dir, i annan sa ki nou apel sa bout enzenyer. Akoz enzenyer, sa group enzenyer ki get nou avyon i pa

osi get bann avyon prive ki antre oubyen bann lezot avyon ki vin lo nou *runway*?

Sa osi i en fason kot *Air Seychelles* i kapab ganny larzan. Tousala i bann pwennvi Mr Speaker, bann profesyonnel ki laba deor, ki mwan pa neserman mon konn nanryen lo la, be sa i zot pwennvi.

An menm tan i annan plizyer size labi ki'n monte, kot bann dimoun i dir ek ou poudir i annan parfwa sa ki nou apel *rebate* ki bann *cabin crew* ti gannyen, ki zot in vann sa lo bann pri egzorbitan, sa i fer ki bann *seat* prezan pa ti ganny okipe avek bann dimoun ki kapab peye en sonm larzan.

Tousala i bann size ki'n vin devan an relasyon avek *Air Seychelles*. Me selman parkont Mr Speaker, i enportan pou nou osi mazine, mwan i annan en pwen enportan ki mon ti tann Finans dir, letan Mr Thesee avek SS Payet ti la.

Zot ti dir nou en keksoz enportan, si zanmen nou deside gard *Air Seychelles*, ki mannyer nou pou okip *Air Seychelles*.

Mr Thesee ki ti la koman bann *expert* Finans avek Mr Payet, SS Payet, zot ti dir ek nou si Gouvernman i pran en desizyon pou gard *Air Seychelles*, nou pou bezwen rod lezot landrwa pou nou kapab

ganny sa larzan, pou nou kontinyen soutenir *Air Seychelles*.

En legzanp ki zot ti donnen, se ki nou pou bezwen get bann lezot Minister, kote nou kapab koupe, kote nou kapab ganny sa larzan pou nou soutenir *Air Seychelles*.

E i ti servi en legzanp, ki si nou fer sa i pou annan bann Minister ki pa neserman pou kapab anploy nouvo group dimoun. Zot bann travayer i riske pa ganny en promosyon, zot bann travayer i riske pa ganny en logmantasyon.

Parske nou pe servi sa bann larzan ki ava ganny pran partou, pou nou soutenir en lot group nou bann ser e fer ki dan bezwen. Sa se *Air Seychelles*. Tousala i bann pwennvi Mr Speaker, ki mon'n anmase yer, ki mon'n analize.

Me avek letan ki mon pou donn, pou nou kapab koze pou donn sans tou lezot dimoun dir en pti pwennvi, mon santi ki sa i bann keksoz, bann pwen teknik ki Gouvernman avek bann teknisyen, avek bann profesyonnel i ava enportan pou zot asiz lo la, pou zot kapab pran en bon laliny lo *Air Seychelles*.

Letan nou pe koz lo saler bann travayer *Air Seychelles*, la

mon aprann poudir travayer *Savoy* osi pa ankor ganny peye.

MR SPEAKER

5 minit Onorab.

HON SANDY ARISSOL

Deza in fini pase Mr Speaker?

MR SPEAKER

Wi, malerezman.

HON SANDY ARISSOL

Ok. Mon ava fini lo sa pwen. Mon swete ki Gouvernman ansanm avek, i malere ki Gouvernman dizour ki'n anmas *Air Seychelles* ozordi. Be mon swete ki Gouvernman, ansanm avek bann profesyonnel, bann teknisyen ki'n annan.

Ansanm avek tou bann dimoun ki annan pou fer avek *Air Seychelles*, zot ava kapab ekoute pou zot konnen ki pli bon desizyon zot kapab fer an relasyon avek nou lakonpannyen *Air Seychelles*, ki nou nou'n pran letan pou diskite lo la yer Mr Speaker.

E ozordi ou'n donn nou en pti gin letan ankor pou nou kapab deliber lo la. Avek sa detrwa pwen, mon ti a dir avek nou bann Manm, koz avek sazes, koz avek tou liminite.

E mon demann Senyer pou kontinyen, pou mon kapab

kontinyen fer sa bon travay pou asiste lezot ki dan bezwen. Mersi bokou Mr Speaker.

MR SPEAKER

Mersi Onorab. Onorab Bistoquet.

HON ROSIE BISTOQUET

Mersi Mr Speaker. Malgre depi yer mon'n lev mon lanmen 3 fwa, mon krwar i ti annan tro bokou kozer. Mersi pou donn mwan sa sans, bonzour Mr Speaker, bonzour tou Onorab, bonzour tou dimoun ki a lekout.

Mwan mon'n bezwen fer sir ki mon met kontribisyon aköz mon en zabitan Pointe Larue. E an partikilyerman mon reste dan bor *runway south*, tou avyon ki vini mon konn zot, lo zot son, mon konnen lekel, keler ki zot leve, keler ki zot vini.

E an plis ki sa la mazorite zabitan Pointe Larue zot travay avek *Air Seychelles*. Mon diskisyon i pou plis, mon pti deba la i pou plis obzektif ki *subjective*.

Levidans in montre ki par egzant an 2008 *Air Seychelles* ti fer en reform. Mon bezwen al en pe kourt, mon pa pou al an detay. 2012 osi en lot reform ti kot striktirel ti ganny fer e sa

nou ti war en kantite *staff* ti ganny *redundancy*.

La ankor an 2021 *Air Seychelles* i ankor dan problem. Plis ki sa zot drwa depi latet ziska lipye. Eski sa fenomenn i vyab, i soutenab? E prezan annou, par egzant mon pe get bann lezot *airlines* osi ki'n pas dan preske menm problem.

Mon'n fer en pti resers pou war bann *legacy* lezot karyer ki konsern *bankruptcy* e pandan mon pou dir avan menm sa lepidemi *COVID-19*. Par egzant mon get *Lufthansa*, i premye pli gran avyon, i pli gran avyon *airlines* dan lemond. E in faid li osi. Menm si Gouvernman *Merkel* ti investir ouswa enzekte en bon larzan dan sa *airlines*. *Air Berlin*, parey toultan nou mont lo avyon, nou tande nou dir, *Air Berlin*, dezyenm gran konpanyen *airlines* *Allemagne* e li osi in faid.

Sa ki enterese pou dir, ki de en lot *airline* ankor, *Alitalia* li osi i ti an komans son *bankruptcy* an 2017. An 2019 Gouvernman Italyen ti *infuse* apepre \$8 milyon an 2 porsyon me anven.

Alitalia osi avek en group *Qatar Airways group* ti investir dan sa *airlines*, in ganny *rebranded*, me ankor in vin

anven. *South Africans Airlines*, ouswa *South African Airways* avek *South African Express*, zot osi zot in antre dan *liquidation*. E la Gouvernman Sidafriken pe fer bann laranzman pou enzekte en serten sonm larzan avek serten kondisyon.

E sa ki enteresan pou dir, ki *Etihad Airways group* in toultan adisyonn serten *funding* dan tou sa bann lazans. Par egzanp, nou pe get, i ti met apepre 433milyon ki ti ganny mete e an plis ki sa i ti ganny apepre ankor 400milyon.

Pou remarke ki sa bann *stake* i ti apepre, pou *Alitalia* ki *Etihad* ti ganny en *institutionalize* ladan, 49 *stake* dan *Alitalia*, 29 *stake* dan *Air Berlin*.

E parey nou konnen, pou *Air Seychelles* i ti investir apepre 40poursan. Pou restriktir sa bann lazans, eski, par egzanp nou trouve sa bann Gouvernman ki'n met larzan

ladan, in met bann kondisyon pou enpoz bann kondisyon *administrative* lo *marketing*.

E nou'n war poudir laplipar sa bann lazans zot in refize e zot pa dakor avek sa. Alors isi Sesel si Gouvernman i deside pou kouver bann kou ki *Air Seychelles* in fer, par egzanp ki zot drwa, pey bann *share*,

pey *share Etihad*, pey *bond holders*. Eski *Air Seychelles* in pare pou kontinyen avek sa *Open Sky Policy*, pou lafyerte Seselwa, pou fer profi, pou zer biznes avek en plan konkret?

Ouswa ganny restriktire, koup sa lakord lanbri ki artifisyel avek sa bann *shareholders* avek *bond holders*, retourn *Air Seychelles* dan lanmen Seselwa, fer li pli profitab.

Dan nenport ki kondisyon ou nenport ki sityasyon ki Gouvernman i deside pou fer sa laranzman ouswa sa restriktirasyon i bezwen fer li avek levidans.

Selman mon pou dir, i bezwen fre li avek levidans e osi avek en leker pou tou travayer *Air Seychelles*. Mersi Mr Speaker.

MR SPEAKER

Mersi Onorab Bistoquet. Onorab Gabriel.

HON CONRAD GABRIEL

Mersi Mr Speaker. Bonzour tou Manm Onorab, bonzour tou dimoun ki a lekout. Mr Speaker koman Manm elekte pou distrik Pointe Larue, mon oule reste solider avek sa group zabitan ki reste travay kot *Air Seychelles*, e ki riske persi zot travay.

Mon'n ekout atantivman bann deba kot plizyer solisyon pe ganny anmenn devan. Bokou Manm in eksprim zot sipor, pa ferm sa *segment* enternasyonal e donn li en sans. Yer Mr Onorab Andre in fer sorti tre for kot i pou lager ziska son dernyen gout disan.

Mon demann bann lezot *MNA* dan rezyon les, espesyalman Onorab Monthy, Onorab Samynadin e Manm Elekte Proporsyonnel Mrs Bistoquet ki fek fini son lentervansyon, kontinyelman Onorab Bistoquet pou kontinyelman donn sa sipor, pou sa group zabitan ki trouv zot dan en sityasyon vreman difisil.

Mr Speaker nou bezwen mazin sa bann pti biznes ki trouve dan zalantour *Airport*. Tel parey *Bacco's Food, Street Grill*. Zis pou nonm enn de, kot zot gannyen i deroul lanmenm la kot bann aktivite kot *Airport*. Zot gannypen i la toulezour. Mon a profit sa lokazyon pou demann Gouvernman pou enplik nou bann zabitan nou distrik bann fitir devlopman ki zot pe anvizaze fer dan le fitir.

Tel ki resaman lo televizyon nou'n vwar nou *Airport* pou ganny agrandi. So nou demann Gouvernman pou

met pep zabitan Pointe Larue a sant, o sant devlopman.

Mon pa dir bokou, mon ava aret la e mon espere ki nou mesaz in pase, lo sa kote latab ki la nou pe siport tou nou zabitan. Mersi.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker avan mon komanse mon a deklar mon lentere dan *Air Seychelles*. Yer nou'n tann koz bokou lo sa lafyerte ki i donn nou letan nou lo nou *Airport* nou kontan war nou avyon vin sers nou. Kouler vibran ki nou'n war lo televizyon deor.

Mon pa resanti mon sa bann zafer, fransman. *Air Seychelles* pou mwan i pa en antite ki eksit mwan, konmsi, i la, i *ok?* E mon dir sa aköz mon anvi zot konpran kot mon pe vini, mon annan zanmi dan *Air Seychelles*. Herve, anfet yer letan i mansyonn son non ki mon rapel, mon'n war li ptipti.

Mon sirprann in ariv sa grander i pe koz avek elokans. Mon'n vreman *proud of him!* Mr Speaker me ki *Air Seychelles* i *stand* pou nou? I reprezant sa lidantite koman en pei, progre

ki nou'n fer koman en Nasyon, devlopman i souliny nou lodasite pou reve, lanbisyon sak zanfan pou vin en pilot en enzenyer, en *cabin crew*.

Me pli enportan *a mon avis*, anvole i lanbisyon pli profon pou en imen. E tousala pou mwan *Air Seychelles* i reprezante. Me an menm tan *Air Seychelles* i reprezant lekse lepase. Koripsyon, move zesyon, mank sipervizyon, letarzi, *oversight* bann *Board* ki'n *fail* pou war kot nou ti pe al dan problemn.

Prezan mon anvi adres nou la anndan koman politisyen. Nou politisyen nou per ki Sesel i vin i relevan lo lasenn enternasyonal, si nou perdi nou *national carrier*. Lafyerte Nasyonal i en santiman pwisan, e tre pe de nou i anvi vwar ki sa *brand Creole Spirit* i disparet.

Me pou serten pei in disparet, *La Hongrie, Switzerland*, pou zot in disparet. Mr Speaker nou'n ganny dir poudir marse pou konble sa lespas ki *Air Seychelles* i ale.

E mon krwar, mon krwar akoz in annan bann lezot legzanp dan lemonn ki'n arive. Nou pe ganny averti ki nou pe met delo dan en pannyen. *PS* Thesee yer in dir nou a 4 repriz

avan. *Air Seychelles* in ganny sove. An 2012 an 2017 la 2020 ek 2021. Plis ki R1bilyon depi 2012 Gouvernman in ponp dan *Air Seychelles*.

Ozordi nou pe fer fas avek en gro defi, se *COVID-19*. Eski alor i ankor annan valer pou annan en *national carrier*? Apard patriyotizm e lafyerte en nasyon.

Pou *Lufthansa* pou *British Airways* i *ok*, me lezot landrwa dan lemonn. *Sud Afrique* ziska *L'inde, Nigeria* an pasan par Sesel. Nou politisyen nou bezwen demann nou lekor si i en bon Polisi pou kontinyen ponp larzan ouswa sa ki nou apel *tax payers money*, direkteman ou endirekteman dan en *failed airline*?

E mon koleg Onorab Arissol in apel nou bomaten, nou politisyen nou bezwen dir avek sa dimoun dan nou distrik nou *constituent*. Poudir get sa, si nou dir avek Gouvernman met larzan, i savedir ozordi pou en *worst case scenario* kot *Air Seychelles* pe demann \$50milyon, ki ekivalan R1bilyon lo to lesanz ozordi, ou pa pou ganny en logmantasyon saler.

Social housing pou napa, difikilte pou donn resours lasante, Ledikasyon nou pou napa. E R1bilyon mazin Bidze

ASP ki 1.4bilyon nou pou annan 1bilyon ladan bliye nou *social security* pou nou dimoun aze aköz nou bezwen sov *Air Seychelles!*

Sa i realite ki nou koman politisyen nou bezwen koz fran e get sa dimoun ki'n vot pou nou dan son lizye pou dir, letan mon pou sov ou frer ek ou kouzen ki travay *Air Seychelles* me ou, ou pou bezwen tarde ganny lakaz apre ki ou'n esper 26an deza pou ou gannyen.

Nou annan 2 swa Mr Speaker, kontinyen met delo dan en pannyen. Yer *PS Thesee* in averti nou ki an 2025 en lot *panel* pou vin la e rod larzan pou *Air Seychelles*. E mon krwar li, mon krwar li. Swa nou *cut* nou *losses* ozordi, e nou les lot dimoun antre e *fill in the gap*.

Si nou oule anvol nou avyon Nasyonal *Air Seychelles* koman paviyon nou pei, nou kapab annan lezot opsyon. Nou *tanker* deza i montre nou en legzanp. Nou kapab investir dan bato ton, nou kapab investir dan avyon pou bato *cargo* i bann lezot opsyon ki nou kapab demontre nou lagrandisman koman en Nasyon Mr Speaker.

MR SPEAKER

5 minit Onorab.

HON GERVAIS HENRIE

Mon'n fini arive?

MR SPEAKER

Wi.

HON GERVAIS HENRIE

Ok, malerezman mon pa'n ganny sans ariv lo mon bann opsyon *business model* ki mon ti ava prezante, oule prezante. Anfen so mwan mon krwar mon'n fer le pwen pou bann politisyen isi anndan. Mersi.

MR SPEAKER

Mersi Onorab. Onorab Adelaide.

HON FRANCOIS ADELAIDE

Mersi Mr Speaker. Bonzour tou dimoun. Mr Speaker mersi ou'n donn mwan en pti sans pou koz lo sa size *Air Seychelles*. Mon a esey servi sa 5 minit en pe pli vit ki mon kapab.

Mr Speaker yer mwan ler mon'n ekoute bann *panel* i vini, en *statement* ki mon war ki i vremen konsernen se, ler mon'n tann zot dir poudir *Air Seychelles* i ganny mete pirman pou touristik pa pou biznes. Pa koman en biznes aeryen me pou touris.

Mr Speaker be sa nenport ki dimoun ou dir li en keksoz koumsa, mon pa enterese lo ou finans, me selman mon anvi ou

anmenn touris. Mr Speaker be sa i kree deza en premye letarzik kot *CEO* menm bann *top official* zot pou zis asize, e se sa ki'n arive.

Personn pa'n enterese fason byennet *Air Seychelles*, zot in enterese pou kit zot lapey, zot in enterese pou kit zot *perks*. Sirtou bann ki o. E sak fwa ki i ariv bann keksoz koumsa se bann lezot dimoun ki ganny afekte. E si en model koumsa i ganny adopte mon krwar sa premyerman in ganny fer lo en move baz, e se sa ou war *Air Seychelles* i dan sa problemn ozordi.

Mr Speaker sanmenm sa lekspresyon ki Prezidan ti servi 'kales kase.' E dan tou sa demars ki mon'n tande yer, nou'n zis rod solisyon, nou'n zis sey pran li vin devan ziska ler sa nouvo *management* in pran. Me depi ler *Air Seychelles* in fer an 2012 ler in faid. Eski i annan en lenvestigasyon ki'n ganny fer?

Mr Speaker si ti annan en lenvestigasyon ti'n ganny fer pou asire ki keksoz ti pou'n kapab bouze. E ozordi nou pa ti pou dan sa problemn ozordi ki nou ladan. E ler mon pe gete travayer li i ankor enkyet son saler, *management* li ozordi li i pe rod en tyak laba, akoz in fini en loportinite biznes, perdi sa i

ganny sa lot laba li i kontinyen bouze.

E nou travayer Seselwa i kontinyen menm ki zot in travay dir, zot in travay for, zot kontinyen war zot perdi pe viv dan en lenkyetid. E mwan mon krwar si petet nou donn *Air Seychelles* en lot sans avek sa nouvo Gouvernman, byensir i ava annan plis *accountability* e nou ava trouve.

E zot on dir poudir zot kapab, zot kapab fer e *why not* donn zot en sans? Bon, mon pe ekout tou pwennvi deor, lo kote biznes zot dir ou i pa vyab, me lo kote travayer zot annan zot fanmir zot osi.

So i en keksoz ki nou bezwen menm kantmenm nou politisyen nou pe balanse i enportan pou nou get tou lede kote. A lafen dizour se ki Seselwa ki'n travay li i pou kontinyen perdi re bann ki'n deside donn bal zot, zot kontinyen rezourir.

Mr Speaker si ou apel 2018, mon krwar ti annan sa zafer *ground handling* ki zot ti defann. I paret mwan ki *Air Seychelles* ler ou gete sa ki'n profite in oule fer son lanpler lib ki mannyer i oule, e i pa'n get byennet *Air Seychelles*.

E petet mon pe dir bann dimoun dan *Air Seychelles* bann travayer poudir nou dan

en sityasyon difisil ozordi. Me selman nou mazin zot, nou mazin zot e nou anvi fer sa ki byen e ki nou kapab annan en *fair deal*.

E zis par egzanp mon mazin sa *statement* ki Neil Armstrong ti fer, si ou deside ferm *Air Seychelles* petet nou kapab fer *one small step*, me si petet nou mazin, nou mazin sa bann travayer, nou kapab pe fer *one giant step for mankind*.

So mwan mon en pe pri dan milye, me *hopefully* dan Egzekitiv i ava'n fer sir in al ekout partou kous popilasyon. E ki *the right decision* i ava fer. So mwan mon ti a kontan ki nou fer en *giant step for mankind, not a small step for man*. Mersi Mr Speaker.

MR SPEAKER

Mersi Onorab. Onorab Georges Romain.

HON GEORGES ROMAIN

Mersi Mr Speaker. Bonzour tou bann Manm Onorab, bonzour tou dimoun ki a lekout. Mr Speaker mon pou koz en pti pe vit akoz 5 minit i al vreman vit.

Mr Speaker ozordi ki mon'n ekout tou sa bann deba ki'n ganny deroule dan sa Lasanble yer, ek enkli sa prezantasyon ki *Air Seychelles* ti fer avek bann *MNA*. E osi

bann *interview* ki'n pase lo televizyon i kler ki *Air Seychelles* i dan en problemm finansyel ki vreman grav. E alor mon ti a kontan ganny loportinite pou donn mon kontribisyon anver sa size.

Dan bann *interview* ki'n fer lo *TV* ki'n ganny fer avek bann *staff Air Seychelles* e lezot bokou in fer resorti kontribisyon ki *Air Seychelles* in fer anver nou pei. Par egzanp Mr Speaker anmenn touris, kontribye larises, *and* donn lanplwa dimoun eksetera.

E i vre ki sa i ban kontribisyon enportan. Me parkont sa ki vreman enportan pou gete se *the net effect of Air Seychelles* lo nou pei. Mon pran legzanp en analozi lo *Air Seychelles* koman en lakour kot i annan 2 paran avek 3 zanfan. Tou le 3 zanfan i travay e zot anmenn en kontribisyon kot lakour tou le mwan.

Air Seychelles i enn sa zanfan e tou le mwan i anmenn li 5mil kot lakour. Nou tou nou kontan son kontribisyon ki i pe fer, me parkont nou vwar ki koman paran zot bezwen war ankor R20mil an plis pou tire dan zot pos, akoz sa zanfan i annan en gro *loan* pou peye, in aste en *BMW* ki i pa kapab pey son *loan*, in lwe lakaz e i annan alimoni pou li peye.

E a lafen dizour menm si i ti pe kontribye R5mil dan reveni son lakour, paran pe kouver R20mil an plis ki vedir ki sa lakour pe fer perd R15mil tou le mwan. E sa i ariv pou bokou lannen san ki sityasyon i sanze. Mr Speaker se sa sityasyon *Air Seychelles* ozordi.

Sa paran ti kapab pe kontribye pou son lot 2 zanfan pou zot kapab osi ganny en keksoz dan zot lavi. Dan en lot mo, Gouvernman osi ti kapab pran sa larzan ki i pe *inject* dan *Air Seychelles* e met dan lekonomi Sesel, fer lenfrastruktir lakaz, amelyor ledikasyon ki tou dimoun ti a vwar li pe benefisyé.

Mr Speaker largiman ki nou'n tande se ki benefis dan *Air Seychelles* i al bokou pli lwen, ki zis donn lanplwa travayer. Touris ki pe vin Sesel pe depans dan lekonomi e i annan lezot sekter ki benefisyé endirekteman e alors larises ki zot kontribye dan pei i bokou plis ki sa. Me Mr Speaker *Air Seychelles* ozordi menm si zot pe fer kontribisyon dan nou pei, nou vwar ki Gouvernman pe kontinyen tenir zot depans.

The net effect i negativ lo nou pei. E ki kantite letan nou pou kapab fer sa Mr Speaker espesyalman dan en letan kot nou war nou lekonomi lo son

zenou. E nou napa okenn lasirans ki *Air Seychelles* pou *bounce back*.

Mr Speaker nou'n vwar ki an 2019 la kantite touris ki ti antre Sesel ti anviron apepre 380mil touris. E yer nou ti tande ki *Air Seychelles* li in anmenn anviron 40mil touris Sesel. Sa i apepre 11poursan touris ki zot in anmennen pou 2019.

Savedir Mr Speaker, 89 poursan touris in antre Sesel atraver lezo laliny aeryen ki kontinyen vin Sesel. Sa Mr Speaker set aköz nou destinasyon i enn ki 5 zetwal e nou annan en prodwir ki touris i vremen kontan. Se sa Mr Speaker ki nou bezwen *focus* lo la, koman en pei pou nou kapab ganny plis touris e anrisir nou lekonomi.

Mwan mon ti a kontan vwar ki *Air Seychelles* i kontinyen anvole. Si i arive ki Gouvernman i *bail out Air Seychelles* ankor enn fwa, zot pou bezwen demontre ki sa biznes i fezab an fas tou sa konpetiter ki otour zot. E zot pou osi bezwen arete depan lo Gouvernman dan lavenir.

E mwan Mr Speaker sa bann prezantasyon ki'n ganny fer ek nou dan sa Lasanble, pa'n *convince* mwan ki son konponan enternasyonal pou

vreman *break-even* e menm vin profitab pandan sa bann lannen ki pe vini. Mr Speaker i kler ki sa administrasyon avan,

MR SPEAKER

5 minit Onorab.

HON GEORGES ROMAIN

Ok, i kler sa administrasyon avan Mr Speaker rebran vreman fer en bon louvraz lo *Air Seychelles*.

E mwan mon krwar ki zot in vreman fer zis politik avek *Air Seychelles*. E pou konklir Mr Speaker, mon swet *Air Seychelles* bonn sans dan son bann desizyon ki pe ganny fer, e mon espere ki le meyer a ganny fer pou zot. Mersi Mr Speaker.

MR SPEAKER

Mersi Onorab. Onorab Cosgrow e apre ki mon pou apel Onorab Labonte. So si ou kapab met ou pare. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker, bonzour tou Manm Onorab. Mr Speaker mon'n ekout atantivman bann diferan largiman ki'n ganny anmennen ozordi dan Lasanble menm oparavan konsernan sa size *Air Seychelles*.

Mon oule dir Mr Speaker ki *Air Seychelles* i en size ki tre pre avek mon leker, i en size ki preokip bokou dimoun sirtou bann fanmir ki direkteman ou endirekteman annan en lyen avek sa lakonpanyen.

An dizon sa mon koman en Manm Lasanble e koman en dimoun ki'n swiv sa dosye ase pre, mon anvi osi aport mon kontribisyon lo sa diskisyon. Dan mon repons lo diskour Leta Lanasyon mon ti fer en repons lo size *Air Seychelles* apre ki Prezidan Larepublik ti met sa size avek nou Lasanble.

Mon'n fer li mon devwar pou *attend* miting ki ti fer Sanmdi avek *Air Seychelles* parey bokou lezot Manm Onorab isi dan Lasanble. Nou'n tann diferan fe met devan par bann profesyonnel, e zefor ki zot pe fer pou met sa laliny aeryen lo en bon semen, lo en semen profitabilite.

Sityasyon *Air Seychelles* ozordi i enn ki pa'n antyerman lafot *Air Seychelles*. Bokou faktor an deor *Air Seychelles* in osi kontribye pou sa pti *airline* antre dan difikilte. Nou bezwen rekonnèt osi ki dan serten desizyon biznes pa'n neseserman bann bon desizyon.

Mon'n osi swiv bokou largiman met devan par

reprezantan en profesyonnel Gouvernman, mazorite i baze mer Speaker lo en pwennvi bidzeter ki fer bokou sans. Pwennvi ki santral ladan a mon avi, se ki *Air Seychelles* i reste en lasirans pou Sesel, pa zis pou anmenn touris Sesel parey in ganny fer resorti avan.

Me pou nou osi koman bann Seselwa, pou nou bann Seselwa annan sa abilite pou nou vwayaze. Swa pou lwazir, swa pou biznes. I annan bokou Seselwa par egzantp i kontan fer biznes *Maurice*, Sid Afrik. *Air Seychelles* i *provide* sa loportinite pou zot, dan lenstans kot lezot avyon pa kapab, pa pe neserman al dan sa bann destinasyon.

Mr Speaker sa i en drwa osi garanti par nou konstitisyon. Mon krwar Mr Speaker Onorab Loze in koz lo la, e mon krwar in fer zistis sa largiman kot letan in koze. Mon santi osi ki Gouvernman, menm si in annan bokou diskisyon, zot pa'n pran kont bann dernyen analiz ki *Air Seychelles* in fer pou demontre en *way forward* dan tousala.

Prezantasyon Minister Finans yer in baze primordyalman lo lenformasyon 2017 e 2018. Zot in osi get li avek en perspektiv enternasyonal selman. E pa'n

get the entire business of Air Seychelles.

Nou konnen e sa i en fe ki bann *airline* ki pe *fly* ozordi pa pe neserman fer larzan lo *flying*, me lo lezot biznes ki dan portfolyo sa lakonpanyen. E dan ka *Air Seychelles* sa se *ground services*, domestik e *cargo*. Nou'n dir e nou'n ganny enformen, nou'n ganny dir ki poudir sa 3 bout i profitab or inevitab pou *Air Seychelles*.

So mon pe espere ki Gouvernman ler zot fer zot desizyon, zot fer li baze lo *Air Seychelles* koman en lakonpanyen. Me sa zis *Air Seychelles* koman sa *international wing*.

Mon ti dir ki *Air Seychelles* i nou *pride* Mr Speaker, i nou laliny aeryen. I reprezant loportinite pou bokou nou bann zenn ki pe aspire pou vin bann profesyonnel dan domenn aeryen.

Ozordi Mr Speaker mon annan en nouvo tim profesyonnel mazorite Seselwa, ki annan en lespwar pou *Air Seychelles*. E mon krwar nou devret donn zot tou sa loportinite pou *turn around* nou *airline*.

Mr Speaker an dizon sa, mon parey bann lezot Manm lo lot kote latab mon pou siporte ki nou donn *Air Seychelles* en

loportinite pou *turn around* sa *airline*. E pou anmenn li ver en semen profitabilite, e pour ki nou tou Seselwa nou ava fyer, nou a war nou *airline* pe kontinyen *fly the Creole Spirit*. Mr Speaker avek sa mon ava dir ou mersi.

MR SPEAKER

Mersi Onorab. Onorab Labonte.

HON ANDY LABONTE

Mersi Mr Speaker. Bonzour Mr Speaker, bonzour tou koleg Onorab. Bonzour tou pep Seselwa espesyalman tou travayer *Air Seychelles* ki'n travay ek leker dan lentere sa lakonpanyen e zot in deza pran en *salary cut* pou plis ki lan.

Mr Speaker sa Mosyon ki'n table par Onorab *LGB* in vin apre diskour *SONA* ki Prezidan Larepublik ti fer isi dan sa Lasanble, kot pep Seselwa ti aprann vre sityasyon *Air Seychelles*, ki pa dan en bon leta ditou.

I annan en proverb ki dir "en fou i krwar ki li tousel ki annan rezon, me sa enn ki i ekout konsey." I klerman montre nou ki nou annan en Prezidan ki *sage*. Akoz i envit, ekout pep Seselwa avan ki i pran bann desizyon fou, parey ladministrasyon avan in pran ki

ozordi *Air Seychelles* i dan sa gro problem.

Apré ki mon'n koz avek enn de Seselwa ki *expert* dan lavyasyon enkli plizyer zabitan mon distrik, e ler mon ekout atantivman sa bann delegasyon *expert* koze yer, mon konpran klerman akoz Mr Prezidan in servi 2 term pou dekrir Leta nou Nasyon.

En zonnyon, en kales kase. Malgre ki lot kote latap pa oule aksepte ki la realite i kler devan nou. Premyerman i kler ki *Air Seychelles* fodre retourn 100 pousan pou pep Seselwa e Sesel.

Dezyenmman fodre i annan en restriksyon entans e konplet dan *Air Seychelles*, an prenon kont ki vre rezondet *Air Seychelles* letan i ti ganny kree e regarde lo ki lopstik holistik korean dapre nou demann aktyel.

Trwazyenmman rode lekel ki ti al negosye sa kontra avek *Etihad* lo lapar *Air Seychelles* e ganny en kopi sa kontra.

Katriyenmman apre ki *Etihad* in ganny peye son \$11.7milyon fodre ki *Air Seychelles* i ganny kontak direk avek sa bann sirtou fantom, ou bann nanm, *bondholders* ki pa ti dan *picture at the first place* ler negosyasyon direk avek zot ti pran plas.

Senkyenmman *Board Air Seychelles* fodre i ganny revwar konpletman, e met bann vre profesyonnel ki annan vremen lentere *Air Seychelles* ou Sesel a ker, san okenn konfli lentere.

Sizyenmman sa bout enternasyonal fodre i vin profitab a longer ditan akoz parey loter Mosyon in dir yer, si *Air Seychelles* pou ferm enternasyonal e reste avek tou son det, i preferab ki nou annan nou laliny aeryen. E koumsa nou a kapab pey nou bann det, rod en fason pou nou kapab pey nou bann det.

E an pasan osi i enportan pou nou konn bann lezot det ki *Air Seychelles* i kapab annan swa nasyonalman swa enternasyonalman. Akoz en kestyon osi ki nou bezwen demande, eski *Air Seychelles* i azour avek bann peyman SCAA pou *parking fee* avek *landing fee*?

E en lot keksoz ankor Mr Speaker, sa bann reprezantan ki'n vini yer, nou war ki zot pa vremen senser e koz laverite 100poursan avek pep Seselwa. Enkli sa miting ki ti fer avek nou bann MNA Sanmdi pase apre mon aprann par SBC poudir i ti bezwen en rankont sekre.

Mon pa ti war naryen sekre, si apre tou laverite in

sorti la devan! Alor i montre ou poudir keksoz napa la transparans. Mr Speaker i montre ou klerman ki i annan bokou bann keksoz ki'n ganny deroule dan sa lakonpanyen, ki pa'n vremen dan lentere Lepep Seselwa.

Alor i enportan ki nou koman bann Manm MNA swa elekte, swa proporsyonnel ler nou pe pran nou bann desizyon pou *Air Seychelles*, annou get li dan son vre sans. Akoz se sa ki pou fer nou ed nou Gouvernman pou pran desizyon. Ki i a dan lentere pep Seselwa. Mersi Mr Speaker.

MR SPEAKER

Mersi Onorab. Mon ava apel Onorab Andre.

HON CLIFFORD ANDRE

Mersi Mr Speaker. Bonzour tou dimoun ki a lekout. Mr Speaker *Air Seychelles* parey nou'n ganny dir i reste en *Seychelles pride*. Alors nou bezwen analize Mr Speaker pou gete akoz e ki mannyer ki *Air Seychelles* in ariv dan sa pozisyon ki i ete ozordi.

Air Seychelles in ariv la akoz bann move desizyon ki'n ganny pran oparavan, e bann desizyon ki pa enformen e bann desizyon ki pa'n ganny sipervize par Gouvernman sa letan. I

enportan pou note Mr Speaker ki letan *Air Seychelles* ti deside pou li zwenn *Etihad* oubyen *Etihad* pou li vin pran par dan *Air Seychelles*, ki son det ki ti egziste? I pa ti parey ozordi.

Alor si nou'n al kot ne dimoun pou li ed nou e nou vwar nou dan plis difikilte, apre ki in swadizan sipoze ed nou, i bezwen annan en landrwa kot desizyon in mal ganny pran laspe e eleman koripsyon in vin ladan.

Alors i enportan e ler nou'n atann Mr Weeling yer in dir nou annou pa bezwen mazin lepase, non. Parey Onorab Zialor in dir nou bezwen gete ki'n arive dan lepase pou nou kapab konpran koz ki nou dan san pozisyon ozordi e ki mannyer nou sorti dan sa pozisyon pou nou pa repet menm fot. Koumsanmenm lavi i marse!

Alors i enportan mwan mwan demande Gouvernman donn en loportinite *Air Seychelles* pou li kontinyen anvole, me osi fer ban envestigasyon dan lafason ki bann desizyon, bann pre e bann peyman i ganny fer.

Si sa bann peyman ki ti ganny fer ti bann peyman ki ti devret ganny fer oubyen ti annan ki zot ti pe pey an plis, pou bann *checks* ki ti al fer lo

ban avyon, pou bann keksoz ki'n ganny pran. Akoz Sesel e *Air Seychelles* an partikilye e in ganny vole. Me nou bezwen konnen ki in ganny vole par ki, e akoz a ki kantite larzan in ganny persi.

Mr Speaker mon pou dir en keksoz, letan nou pe dir, Onorab Henrie in dir nou pa kapab kontinyen met larzan dan en keksoz dan en pannyen. Mr Thesee i dir nou pa kapab met delo dan en pannyen. me letan nou gete i annan bokou keksoz ki nou fer, nou fer pa avek lekspektasyon ki i pou ganny en rektifikasyon, me nou swete ki sa.

Mon a donn en legzanp, nou met larzan dan program *methadone*. Akoz nou konsyan ki i annan en sityasyon kot sa bann dimoun i bezwen led. Me nou napa garanti ki nou pou sorti venker. Nou a seye akoz nou en Gouvernman ki konsernen.

Alors mon pe demann Gouvernman pou pran sa konsiderasyon e donn en koudmen *Air Seychelles* akoz parey nou dir bokou dirizan in vin la in vin dir, ou, ou'n dir Mr Speaker, mwan mon'n dir. Prezidan Sortan in dir, Prezidan Aktyel in dir, "*The sky is the limit.*"

Alors annou permet *Air Seychelles* penetre lesyel Sesel pou li ariv aletranze. Alors mwan mon'n dir avek bann travayer *Air Seychelles*, ki mwan mon pou donn zot sipor pou fer sir ki *Air Seychelles* i ganny sans e i kontinyen anvole. Alors mon demann zot pou kontinyen met sa kouraz eks lafors dan zot travay. Akoz zot in donn *Air Seychelles* en koudmen par pran bann *pay cut*.

E mon ti a kontan demann s, eski bann *Board members* in pran bann *pay cut*? Akoz bann *Board members* pa fer sa travay gratwit pou ede remet dan lekonomi oubyen remet dan *Air Seychelles* sa larzan ki in ale, nou pa konnen ki mannyer in ale.

Alors avek sa Mr Speaker mon konnen mon annan 5 Minis sanmenm sa mon'n al en pe vit. Avek sa mon ti a dir avek sa bann travayer ki zot garanti 150 poursan mon sipor. Mersi.

MR SPEAKER

Mersi. mon ava apel Onorab Aglae.

HON EGBERT AGLAE

Mr Speaker bonzour. E tou Manm Onorab e ou dimoun a lekout. Mr Speaker mon pou servi parol Onorab Georges, sa

fiy in ansent prezan nou bezwen pran en desizyon. Ou annan ou 2 desizyon ki kapab ganny pran la, enn se pou fer aborsyon, dezyenm se ou les li ne, e nou tou nou a donn lanmen pou nou sonnyen.

Mr Speaker *Air Seychelles* i dan en sityasyon ozordi ki nou pe koz lo la se gras a sityasyon ekonomik fas a *COVID-19* ki nou ladan. E mwan mon asire poudir si nou pa ti dan en sityasyon ekonomik parey nou ete, size *Air Seychelles* pa ti pou la lo latab pou nou vin diskite si nou bezwen ferm li ozordi.

E Mr Speaker dan bann prezantasyon mon apel zot bann spesyalis ki'n vin la devan nou, zot in fer resorti bann diferan pwen enportan Mr Speaker. E osi bann pwen ki laplipar *national airline*, bann *airlines* ozordi pa pe *run* lo en baz profitabilite, ouswa bann ki lo Gouvernman i annan par ladan zot bezwen ganny *cushion* ekonomikman pou zot kapab tenir zot bann larout enternasyonal.

Sa i en rezon ki akoz ki mwan ozordi mon santi ki Gouvernman i merit rod tou fason pou kapab tenir nou *Air Seychelles*. Mr Speaker mon dir sa;- enn, mon santi poudir le mon'n ekout sa bann *stakeholders* ki'n vin devan nou

ki annan li endirek avek *Air Seychelles*, mon santi poudir i napa ase konsiltasyon ki'n ganny fer.

Mon santi poudir en kote i annan en serten retisans, sirtou letan mon pe get lo kote Finans mon war poudir zot ion fini kondann sa laliny aeryen finansyerman.

Me selman ou war departman ki lye avek lavyasyon ki pe vin avek bann propozisyon. Ou pe war *management Air Seychelles* ki vin avek bann propozisyon ki'n dir poudir wi nou pa pou *run profitably*. Me selman nou kapab redwir nou bann kou loperasyon, nou ban det atraver diferan pwen ki zot met devan.

Eski sa pa ase en lespwar pou nou vwar poudir be *ok* mon pou donn ou en peryod letan prouv ou lekor ankor, malgre difikilte ki ou ladan ozordi. E la a en pe rod letan nou pou bezwen refer en *assessment* pou nou var si vre sa ki ou pe dir i korek, si vre nou kapab fermen.

Mr Speaker mon santi poudir ozordi e in touzour leka par egzanp kot Gouvernman in bezwen war li lokalman, pe enzekte larzan *tax payers money* pou gard bann serten lenstitisyon a flot. Mon pran ban legzanp senp mwan. *PUC* li

menm li i pa kapab *run* lo li menm pou kapab asir en bon loperasyon, e menm eparyn bann lezot devlopman san led Gouvernman.

SPTC li menm i ganny *subsidize*, *SEYPEC* a en moman letan ti dan problenm, *STC* i ganny *subsidize* sirtou lo kote zil Praslin/La Digue. Eski a en moman okenn dimoun in mont devan pou dir ferm sa bann lorganizasyon?

Non, pa'n ganny fer aköz i annan en lenportans nasyonal ki pou ede sofgard nou sosyoekonomik programm pei kontinyen fonksyonnen.

Alors eski *Air Seychelles* li osi i napa en merit ladan? Eski *Air Seychelles* koman sa laliny aeryen son bann target, son bann *marketing* i pa pe ede anmenn serten kalite touris konpare avek sa ki *Emirates*, *Edelweiss*, bann gro lakonpanyen ki pe vini petet zot bann target zot, zot pa bann gro lotel 5 *Zetwal*, *Kempinski*, *Ephelia*, *Four Seasons* kan *Air Seychelles* petet son target li i pe ed sa pti lotel, i pe ed sa pti *guest house*.

Eski nou pa pe pran kont serten lenpak ki sa osi i kapab anmennen? Mr Speaker osi mon pou aport sa pwen sa *labor*. Mr Speaker tou sak lannen ki'n pase, *Air Seychelles*

in investir, e Gouvernman in investir dan resours imen. Sa bann pilot ki'n ganny train, bokou Seselwa zot rev in akonpli dan lavyasyon gras a bann lenvestisman ki *Air Seychelles* in fer e ki Gouvernman in kontribye. Alors mwan mon dir, Gouvernman pa'n pran zis larzan *Air Seychelles* i pa'n zis set dan en pannyen kot nou pa'n war kot in ale.

Si nou fer analiz i annan son bann retonbe e bokou rev ozordi si nou vwar ban spesyalis Seselwa ki pe *run* sa *airline* Mr Speaker. E mwan mon swete ki 100poursan Seselwa i *run* sa *airline* depi son *CEO*.

Mon ti a swete sa, e sa i bezwen vin wen kondisyon as part si Gouvernman pou antre pou kontinyen ed *Air Seychelles* e kit *Air Seychelles* a laflot. E pour terminen Mr Speaker mon santi poudir Minister Finans osi posib i ti kapab vin ek bann lezot propozisyon,

MR SPEAKER

5 minit Onorab.

HON EGBERT AGLAE

Mon pe *wrap-up* Mr Speaker. Yer in vin avek en pti git lo takzasyon e petet ki sakrifis. Me si Minister Finans osi ti

kapab petet vin avek bann *special* pour proze *finance* ti kapab vini pou ed *Air Seychelles* met sa bann kart lo latib, balanse apre tou *partners* dan *Air Seychelles* e la nou ava tonm lo en konklizyon. Mersi Mr Speaker.

MR SPEAKER

Mersi. Mon pou pran Onorab Wavel Woodcock, mon regrete mon pa pou kapab pran lezot mon krwar avek Onorab Woodcock mon'n pas lo lalis bann dimoun ki ti'n lev lanmen an premye.

Wi, Onorab William i lo la wi, mon *sorry* mon pou bezwen ferm lalis e mon pe pran tou bann dimoun ki ti'n lev lanmen dan premye repriz. Mersi. Onorab Woodcock.

HON WAVEL WOODCOCK

Mersi Mr Speaker. Mr Speaker apre ki'n mon'n ekout bann diferan delegasyon ki'n vin devan nou yer e osi deliberasyon ki bann Manm lo tou lede kote latib in fer yer.

I kler Mr Speaker, ki pli gran konsern se sa det ki ou bezwen peye. Sa det ki nou bezwen pey *Etihad* avek bann *bondholders*. Ok ou'n nobou ganny en *discount* lo sa \$68 milyon ki nou ti pou pet *Etihad*.

I ganny redwir pou vin \$11.7 milyon.

E sa det ki, sa sonm ki bann *bondholders* pe demande, i en pti pe tro ekstravagan. Tro bokou pou nou, ki *obviously* nou pa pou kapab *afford* pou peye. Zot pe demann \$56.4 milyon. E Gouvernman pe sey negosye pou redwir swa *by* 72 poursan.

Fodre note Mr Speaker, ki ler Minis Finans ti vin devan Lasanble yer. I ti dir ki akoz leta *Air Seychelles* nou *debt to GDP* in monte par 7poursan. Sorti 108.4 pou vin 115poursan. Ki ase serye. I en det ase signifikan.

Me parey nou konnen bann *bondholders* i ankor pe sey *hold out* pou akimil e ganny *maximum* larzan posib. E i pa pou *surprise* mon Mr Speaker si sa bann *bondholders* i enn de bann boug laba *Abu Dhabi* ki pe asize.

E nou'n ganny dir yer poudir nou annan de ou trwa opsyon, e 2 opsyon ki ganny dir se ki enn, nou kapab espere avek lespwar e presyon ki sa *Steering Committee* pou fer fas avek *bondholders* ki zot kapab annan sa krentif ki nou antre dan ladministrasyon. E zot pa neserman ganny bokou, ganny nanryen.

Alors zot kapab aksepte pou sa rediksyon. Pou pran selman sa \$20milyon ki se Gouvernman ki pou bezwen pey sa larzan.

Dezyenm opsyon ki ti'n ganny propoze se ki nou kapab antre dan ladministrasyon. E yer ler mon'n ekout Minis Finans, e osi mon'n ekout Onorab *LGB*. I kler ki si nou'n antre dan ladministrasyon i kapab kout nou menm kantite larzan ki nou pou pey bann *bondholders*.

E zis en legzanp, si nou deside antre dan ladministrasyon ouswa *liquidate Air Seychelles*. Nou pou bezwen pey \$19milyon, ki reste lo sa valer kontra pou sa 2 *Neo A320*.

E pou annan bann lezot kou osi ki pou'n bezwen *factor-in*, ki annefe i pou preske, nou bezwen pey parey. I pou kout nou preski menm kantite pou kapab antre dan ladministrasyon ouswa *liquidate Air Seychelles*. Ki nou pou pey sa bann det ki nou annan si *provided* ki nou kapab re negosye sa bann det pou fer li desann pli ba. Sirtou avek bann *bondholders*.

Mr Speaker, i kler ki nou problemm se sa Lagreman ki Gouvernman dan lepase in fer avek *Etihad*. Ki'n en kabri dan

sak. Ki'n kout nou bokou larzan. E i kler Mr Speaker, ki nou bezwen koup sa lakord konpletman avek *Etihad*.

E i pou posib pou nou fer sa *as soon* ki nou kapab re pey sa det. Nou bezwen fer ki *Air Seychelles* i retourn 100 poursan pou Sesel. E ki menm Mr Speaker i enportan ki osi, mwan mon *belief* ki nou *Management Air Seychelles* si i arive ki Gouvernman i pran desizyon pou gard loperasyon enternasyonal.

Se ki nou bezwen fer ki *Management Air Seychelles* i vin 100poursan Seselwa. Ki sa bann gro *fees* ki nou pe pey sa bann etranze, i ganny koupe konpletman. I kler ki nou annan *mismanagement*, labi dan lefase.

E an se moman la Mr Speaker, isi nou annan kestyon an deor ki Lepep Seselwa, e menm pe demande. E menm nou osi koman Manm Lasanble nou pe demande ki kekfwa nou bezwen osi al en pti pe pli aprofondi lo la.

Eski sa nouvo, en kestyon ki pe ganny demande la deor. Ki'n ganny menm demande dan sa Lasanble. Eski sa nouvo *Management Air Seychelles* pou kapab fer *Air Seychelles* vin profitab ankor? Eski avek *uncertainty* dan marse global

anvi pandemic *COVID-19*, eski *Air Seychelles* pou kapab *survive*?

Pou kapab *survive* avek bann konpetisyon ki annan la deor? Eski nou pou kapab rekonsider nou *Open Air Policy* ki lenplikasyon ki i pou annan eski sa pou kapab ed nou vin pli, fer en pti pe pli byen? Ki bann lezot retonbe ekonomik ki *Air Seychelles* in anmennen dan pei, an term *tax*, lanplwa, bann aktivite ekonomik ki *Air Seychelles* i *generate*? Devlopman Resours Imen. Bann dimoun ki ganny *train* par sa lakonpanyen?

E lot kestyon se, eski *Air Seychelles* i pou konsider bouz lo bann lezot larout, bann lezot *hub*? Parey lo nivo Lafrik ki i annan serten *analysis* ki'n ganny fer. Ki dir petet si nou bouz lo Lafrik kekfwa nou kapab a se sans fer serten profi.

MR SPEAKER

5 minit Onorab.

HON WAVEL WOODCOCK

Eski i pou annan lezot restriktirasyon ki pou bezwen ganny fer pou koup lo kou loperasyon *Air Seychelles*?

Yer Minis Finans ti vin devan Lasanble. I ti dir poudir ki definitivman i pou annan posibilite ki serten program

Gouvernman pou ganny koupe pou ede finans peyman sa det.

Alors nou pou bezwen demann, Gouvernman osi i bezwen fer nou konnen kwa dan Gouvernman? Ki sa bann program Gouvernman ki pou ganny koupe pou finans sa det. Eski i pou annan lenplikasyon lo Gouvernman, lo li menm osi. Tousala i bann keston ki nou bezwen demande.

E pou konklir Mr Speaker. I annan plizyer keksoz pou konsidere. E lopinyon ler mon pe ekoute nasyonalman, i divize lo sa topik. E tre byento Gouvernman pou bezwen pran en desizyon lo sa size. E desizyon ki ganny pran lo sa size, si nou pou kontinyen avek loperasyon enternasyonal. I pou bezwen ganny fer dan lentere en desizyon byen formen e ki ganny fer dan lentere Lepep Seselwa.

Avek sa de mo mon dir ou mersi Mr Speaker.

MR SPEAKER

Mersi. Mersi pou zot konprenezon bann Onorab. Prezan mon pou akord 10 minit *Leader* Lopozisyon. E apre 10 Minit *Leader* Biznes Gouvernman avan nou poz.

HON SEBASTIEN PILLAY

Mersi Mr Speaker. Mr Speaker mon'n.

MR SPEAKER

Wi nou a fini avek sa apre nou a *break*. Wi mersi.

HON SEBASTIEN PILLAY

Mersi Mr Speaker. Mr Speaker mon'n ekout atantivman tou bann devlopman otour sa sityasyon *Air Seychelles*. E i enportan pou nou konman en Lasanble sible byen konteks ki nou pe fer ozordi.

Premyerman Mr Speaker, parey mon'n anmenn en *PNQ* ki mon'n met lo *Order Paper regarding* bann dimoun ki ti lo *URS*. Sa ki nou pe fer ozordi se esansyelman asire ki nou kapab osi sov louvraz nou bann frer e ser ki dan *Air Seychelles*.

Nou pa pe lager pou enn e pa pou lot. Me nou pe lager pou tou Seselwa ki dan en moman difisil, nou bezwen asire ki person pa al se li san ki i kapab met en lasyet manze lo son latob.

Avek sa Mr Speaker, mon ti a kontan an traver ou Mr Speaker, fer en referans avek sa ki en Manm in dir. E mon pou nonm sa Manm Mr Speaker, mon pou nonm Onorab Naddy Zialor an traver ou Mr Speaker.

Mon ti a kontan *remind* Onorab Zialor ki i fasil ler ou en

MNA dan Lasanble e koz lo *redundancy*, e koz lo dir en konpanyen i tro gran e fer dimoun aret travay. Fasil ler ou'n ariv en *MNA*.

Me i pli difisil pou sa dimoun ki li i pou ganny fer *redundant*, ki li i pou bezwen al se li san en lasyet manze. E li i pa pou kapab sonny son fanmir. So mon krwar i enportan ki Lasanble nou bezwen reste konnekte avek sityasyon e lefe ki'n ganny met devan nou.

Mon krwar tou sa bann dimoun ki'n vin devan nou in vin prezant zot ka. E i enportan ki mwan lo mon kote latab. E koman Dirizan Lopozisyon lo sa kote latab, pou mwan fer kler ki pozisyon ki nou pou pran lo la.

E sa i enportan nou regard byen konteks. Premyerman Mr Speaker, Prezidan dan son ladres lo Leta Lanasyon ti koz lo *Air Seychelles*, e i ti mansyonnen ki *Air Seychelles* ti bezwen aret tou loperasyon enternasyonal. E *focus* primordyalman lo bann loperasyon domestik.

Me i ti arete pou li fer okenn komanter an plis. E i ti pas boul avek Lasanble Nasyonal e dir ki sa size i devret ganny debate dan Lasanble.

Apré sa bann Manm Lasanble in debate, plizyer

Manm in eksplik zot lekor lo sa size. E apre ki Lasanble in debate, apre menm ki Lasanble in zwenn atraver *ABC* ou ava rapel ti'n pran en desizyon pou nou annan sa Mosyon ki pou vin devan Lasanble, Minister Finans ti sorti al dan en *News Extra* e *basically* fer en *case* pou ferm *Air Seychelles*. Sa ti en *case*, mwan mon war li koumsa. Malgre letan zot in ganny demande sa kestyon dan Lasanble zot in dir non, sa i pa leka.

Savedir si nou swiv byen bann levennman ki'n arive prezan kote Gouvernman dan Lasanble ti anmenn en Mosyon. Ki lo nou kote nou'n siporte akoz avek en keksoz antet. Ki nou'n dir ki nou pa pou vin *endorse* en prosis kot Gouvernman in fini pran desizyon.

Me i enportan ki tou dimoun i ganny loportinite pou donn zot pwennvi. E ki bann *staff* e bann *Management Air Seychelles* i ava vin la i ava koz ek nou lo ki plan zot annan pou zot *turn around* zot konpanyen. E bann antite Gouvernman i ava dir nou ki plan zot osi zot annan.

E se sa Mr Speaker, ki'n fer ki i komans annan serten konfizyon otour sa sityasyon. *Management* ek *staff Air*

Seychelles in prezant devan Lasanble en plan stratezik pou vin vir sa konpanyen *towards* profitabilite.

Zot in koz lo bann sakrifis ki zot bezwen fer dan redwir bann kou. Bann sanzman dan sa *business model* sa konpanyen. E zot in koz lo bann lezot eleman ki zot in fer, par egzamp pou zot kapab anmenn sa konpanyen *towards* en *breakeven position*. Ok?

Departman Transpor li i vini i dir ek nou koumsa poudir sa plan pa ankor ganny diskite lo zot *Management*. E ki zot ankor pe konsider bann eleman sa *plan* ki *Air Seychelles* in met devan nou.

Minister Finans li in vini in *highlight* en *case* kot in koz lo si nou gard *Air Seychelles* lo son *current business model*. Avek lenformasyon sorti 2017 e 2018 sorti kot en konsiltan ki mon krwar *World Bank* in donn zot, zot ava koriz mwan si mwan mon mal. E zot in koz lo ki manner sa i vin en risk finansyel pou pei.

Me sa ki pou mwan i etranz, sa ki vremen drol, sa ki trouble mwan, se ki sa menm Minister Finans dan Bidze pou 2021 in met R133, 330milyon dan Bidze koman sipor pou *Air Seychelles*. *At the going*

exchange rate sa i apepre *almost \$6milyon*.

Mr Speaker, mwan pou mwan i kler ki bann *staff Air Seychelles* ek *Management Air Seychelles* in fer en kantite sakrifis. In annan bann koupir. Nou'n war ankor landrwa kot ou'n met devan *Air Seychelles* klerman e son *Management* ki i bezwen annan koupir.

Sa bann zafer lwe lakaz pou enn e pou lot i bezwen arete. Rod *market* lakaz ki pli bonmarse. Fer en zefor pou montre ki manner sa sakrifis pou anmenn plis lavantaz. Pou montre en persepsyon piblik ki *Air Seychelles* i *deserve* en *second chance*.

Prezan Mr Speaker, mon vin lo en pwen enportan. E sa se en pwen ki mon krwar i bezwen ganny fer sorti. Pou plizyer lannen *Air Seychelles* in ganny servi koman en futbol politik par sa parti ki ozordi zot asiz dan Gouvernman. E zot in kree en persepsyon piblik ki souvan fwa in tourn ver negativ avan ki i al ver pozitiv ler nou regard *Air Seychelles*.

E mon kontan ozordi ki mon'n tann serten Manm koze lo lot kote latab. E zot in koz dan en fason patriyotik. Dan en fason ki'n montre poudir ler ou pran en zwazo ou koup son lezel, ou anras li son laliberte.

Koman en pei nou pa kapab konsider annan zis en lapros neoliberal e regard ki tou keksoz *in terms of* ki konsern nou patriyotizm pa enportan, e pa relevan.

Nou pa kapab kontinyen koumsa. Nou bezwen bouz dan en lot pozisyon. E mon krwar se sa ki lesansyel ki devan nou. E pou mwan Mr Speaker, mon pozisyon i reste ki apre ki sa 2 Minister in koz ek mwan. Mon pou dir Lasanble annou egzers en serten nivo *caution*.

Annou fer sir nou regard byen ki Gouvernman pe sey fer, akoz mon pa ti a kontan Lasanble nou'n pas tou sa letan. Nou'n fer tou sa deba, nou'n fer bann propozisyon, *and then* Gouvernman li i ale i fer en lot desizyon.

E pou mwan mon pou *still* war li drol akoz dan Bidze akfer zot in met sa larzan dan Bidze, apre ki Prezidan ti'n koze dan Lasanble.

Prezan Mr Speaker, mon vin lo *what is the way forward?* Ok, Premyerman Gouvernman li koman *majority shareholder* i annan sa premye pozisyon ki i kapab pran. Ok? I tir *international component of* biznes *Air Seychelles*. Son *net result* i se ki nou pe redwir sa *expenditure* dan sa *area*. Plis ki 150 dimoun i perdi zot travay.

Loss of indirect income parey nou'n vwar apepre 63.4milyon ki vin dan lekonomi. *Loss of an Insurance Policy* an ki konsern lavyasyon.

Sa i premye pozisyon ki Gouvernman i kapab pran. E prezan li menm li Gouvernman lefe ki i pe *scale back* lo URS, lefe ki i pe *scale back* lo FA4JR. E li menm i pe fer *restructuring* dan Gouvernman li menm. *Local labour market* i *very unpredictable*.

E prezan *best case scenario* ki nou pou war, zis 25 poursan tou sa bann dimoun URS, FA4JR ek *Air Seychelles* ki pou kapab ganny nouvo *employment*, akoz pou napa landrwa pou zot ganny anploye, si lekonomi pa pran en *upturn*.

Me prezan avek lemonn ki pe soufer ek lenpak COVID-19. E lendistri lavyasyon ki pe ganny afekte, parey Mr Pragassen ti dir nou, tou sa bann dimoun *train* dan en domenn tre spesifik, enzenyer. E menm nou bann *cabin crews* ki'n resevwar *training*, en serten kalite *training*. Petet kekfw a en 5 a 10poursan ki ava kapab reganny *employment* dan en lot pei. Pa tou.

So sa enn desizyon i bokou pli *messy* e pou mwan i menm drol ki i ti pou lo latab akoz Gouvernman ti'n *almost*

commit en \$6 milyon pou kapab siport sa ki *Air Seychelles* pe fer. So pou mwan se sa ki pe anmenn en serten konfizyon. E ki mon krwar sa i pa lapros ki nou bezwen pe al ladan.

Lot opsyon,

MR SPEAKER

Ou pe al lo 10 minit Onorab Pillay.

HON SEBASTIEN PILLAY

Mon pou fer vit Mr Speaker Mersi.

MR SPEAKER

Silvouple. Mersi.

HON SEBASTIEN PILLAY

Lot opsyon ki mon krwar nou devret pe konsidere, e sa se opsyon ki nou swiv sa lapros ki *Air Seychelles* in pran pou li *turn around* son konpanyen. *Ok?* E se sa ki nou lo ou kote latab nou pou siporte. *Ok?*

Nou aret annan sa *Air Seychelles bashing*, e *Air Seychelles* i komans al dan en lapros kot i servi sa stratezi ki in prezant devan Lasanble, kot in *realize* son bann priyorite, kot i pe regard en lapros plito rezyonal. Kot i pe regard en lapros *point to point traffic, rather than pas through* bann *hub*.

E sa i ava ed li komans revwar son abilite, pou nou anmenn sa konpanyen pou li kapab *breakeven*.

E Mr Speaker, sa ki mon bezwen alert Lasanble, se ki an 2008 avan ki nou ti antre dan program *IMF*, e mon krwar *World Bank* ek *IMF* i ansanm ladan, ti annan en *attempt* pou sey ferm *Air Seychelles*. E Gouvernman Ladministrasyon sa letan ti reziste sa.

Mon *hope* ki i pa menm dimoun ki ti la an 2008 ki ti pe fer sa bann propozisyon ki ozordi dan Gouvernman *LDS*, dan en pozisyon tre o koman Vis-Prezidan. I ava ankor enn fwa reziste tantasyon ki sa bann lorganizasyon i met presyon lo li pou fer pou nou ferm *Air Seychelles*. Akoz mon krwar se sa ki paret mwan pe arive.

E avek sa Mr Speaker, ki mannyer nou pou kapab *bring about* sa transformasyon. Se senpleman en parol ki Mr Georges Tirant *CEO PMC* ti dir nou. E sa se *monitoring*. Sa ki sa *Board* i fer. Akoz parey Onorab Andre in dir atraver ou Mr Speaker, parey bokou lezot Manm in dir, ferm *international* pa pou tir sa det ki nou annan ek *bondholders*. *Ok?*

E sa ki pou enportan se negosyasyon ki nou bezwen fer

avek bann *bondholders*, avek *Etihad* pou nou sorti dan sa kontra. Si Gouvernman i le al *investigate* sa ki'n arive ek sa kontra, Gouvernman i annan tou bann zouti dan son lanmen. Tou bann keksoz nesaser, al *investigate* tou dimoun ki zot anvi *investigate*.

Be pou lemoman size se ki nou bezwen rod en fason pou nou sov *Air Seychelles*. E sa ki mon krwar i bezwen arive se ki premyerman SCAA i devret fer sir i kapab travay kolaboretivman avek *Air Seychelles* lo Polisi e loperasyon i ganny *synchronize*.

Bann *fixed base operator contract* parey pou *ground handling*, nou devret regarde lekel ki gannyen. E si nou pou donner ankor, akoz sa konponan biznes *ground handling* i enportan pou ki *Air Seychelles* i kontinyen zener serten kantite *income* pou son lakonpanyen.

E mon krwar SCAA i *committed* li osi parey nou tou. Pou nou rod en meyer solisyon pou sa sityasyon. *PMC* i annan en rol enportan pou li zwe dan *monitoring*. E la mon krwar se sa kot nou'n annan en problem. Re ankadre rol *monitoring PMC* pou fer sir ki i kapab regard en desizyon ki sa *Board* pe fer. E asire ki sa *Board*

i *stick to* son *timeframe* e son bann plan ki in met devan.

E Minister Finans i bezwen fer sir ki la dan bann diskisyon ki ganny pran. I fer li ansanm avek Departman Transpor. Mon krwar i paret poudir i annan en dekoneksyon avek sa ki Departman Transpor i dir, e sa ki Minister Finans pe fer oubyen ant le de.

I bezwen annan en armonizasyon. Sirtou lo en size enportan koumsa. Kot tou lede antite i a vin ansanm. E la zot a kapab regard direktman sa size *bondholders*, sa det *towards* bann *bondholders*. E ki bann lezot det ki asosye avek *Air Seychelles*.

Mr Speaker, mon pou *reiterate* nou pozisyon lo sa kote latab, se ki meyer solisyon se pou donn *Air Seychelles* loportinite pou li kapab *overcome* sa ki i pe pas ladan. Nou'n deza met larzan dan Bidze, mon pa war rezon akoz nou bezwen al ver en *restructuring* brit ki ava kout bann dimoun zot lanplwa. Mersi Mr Speaker.

MR SPEAKER

Mersi. Onorab Georges.

HON BERNARD GEORGES

Mersi bokou Mr Speaker. Bonzour Mr Speaker. Bonzour

tou bann Manm. Bonzour tou bann dimoun ki pe ekout nou dan lakour. Mr Speaker mon ti a kontan a lafen sa deba lo sa Mosyon ki nou'n fini pase ane sa Mosyon aköz nou'n envit bann dimoun ki'n vin devan nou, devan sa Lasanble.

Mon ti a kontan remersye tou bann Manm ki'n pran letan pou zot kestyonn *panel* ki ti vin devan nou. Nou profite pou remersye sa bann *panel* ki'n vin devan nou e ki'n *share* zot lentere dan sa size avek nou. E tou bann Manm ki'n demann bann kestyon byen pertinan, e ki'n pran laparol dan sa deba ozordi.

Mr Speaker, sa problem *Air Seychelles* i enn parey nou tou nou konnen ki konpleks. Si i pa ti konpleks, desizyon ti pou'n ganny pran depi byen lontan. Pa neserman par sa Prezidan la, me par enn son bann predeser.

Se aköz sa sityasyon i konpleks, ki en desizyon pa ankor ganny pran. E ki Prezidan in demann nou koman reprezantan lepep pou rod pwennvi bann dimoun ki nou reprezante, e vin debat sa size. E ed Gouvernman dan son desizyon ki i pou pran.

E sa desizyon i pa neserman sa enn ki'n ganny met devan nou dan *SONA*. Eski

nou gard *Air Seychelles* koman zis *ground handling* ek domestik? Oubyen eski nou gard li mannyer i ete? Sa mon krwar se en swa, me se en swa parmi plizyer. Nou pa devret kay senpleman lo la.

Aküz sa deba depi yer bomaten in montre nou ki i annan plizyer *facets* ki nou kapab antreprann. I annan plizyer fason ki nou kapab regard size *Air Seychelles*, ki al pli lwen ki zis sa model ki devan nou. E enn bann keksoz ki mon pou fer la o komansman, se rebran en pe bann nide ki Onorab Gervais Henrie Deputy Speaker, ti pran. E ki ozordi i pa'n ganny sans reitere devan sa Lasanble.

I annan plizyer model ki *Air Seychelles* i kapab regard ladan. Enn bann model ki fer bokou sans pou bann *laymen* parey mwan, se *IDC Aviation* avek *Air Seychelles*, eski napa en sinerzi ki nou kapab servi la?

En lot se devlop nou bann zil pli lwen atraver en lot kalite avyon kekfwa. En 40, 50 seater *ATR*. Bann keksoz koumsa. Oubyen servi *Seychelles* koman en *hub* pou al Lafrik ek bann lezot landrwa. Nou'n aprann yer ki *Air Seychelles* pandan *lockdown* in kapab al dan 40 destinasyon diferan.

Donk tousala se bann keksoz ki ankor pe ganny revwar. E nou, nou kontribisyon i ava vini pou anrasi sa deba ki Gouvernman pe fer. E mon ti a kontan *right at the start*, eksplike ki sa desizyon pa pou ganny pran ni tanto, ni demen.

Nou'n aprann yer ki lafason ki sa pou deroule, se ki Minister Finans pe pran en *step by step approach*. I pe negosye premyerman avek *Etihad* pou redwir son det. Apre sa i pou al negosye avek bann *bondholders* pou redwir zot det. E apre sa se Minister Transpor mon *ex-koleg* Avoka Minis Derjacques, ki pou prepar en *Cabinet Paper*, ki pou anmenn devan *Cabinet*, e ki pou donn son direksyon son Minister avek *Cabinet*. Pou ki *Cabinet* i annan en deba lo la, e en desizyon i ava ganny pran.

Desizyon pa kapab ganny pran lo en baz ni emosyonnel, ni lo baz linyorans Mr Speaker. Desizyon i bezwen ganny pran avek tou bann lenformasyon devan bann dimoun, ki pou pran sa desizyon. E se pou sa ki mon krwar ki mon ti ava kontan remersye bann dimoun ki'n demann nou fer sa deba. Akoz in en deba ekstrememan anrissan.

Mon pa pou al dan tou bann pwen ki mon ti a kontan

fer bomaten, premyerman nou napa letan e dezyenman mon pa anvi repet bann keksoz ki'n deza ganny dir. E kekfw ki'n ganny dir dan en meyer fason ki mwan mon ti ava kapab dir.

Me sa ki mon ti a kontan ki reste avek nou ozordi, se kompleksite sa problem. Sa problem pa en problem neoliberal ki lo nou kote latab nou anvi ferm *Air Seychelles* akoz i pa komersyalman vyab. Non. E se pa en kestyon protez lanplwa anver e *contre tout* parey zot lo zot kote latab zot in fer sorti.

Akoz sa se 2 *facet* parmi plizyer dan en sityasyon kompleks. Me sa sityasyon kompleks Mr Speaker, i annan en solisyon. E en solisyon pou bezwen ganny vwar. Sa ki mon anvi fer resorti ozordi se i sa solisyon i pa en swa brit ant gard *Air Seychelles* mannyer i ete la, *or* restriktir *Air Seychelles* par abandonn *regional operation*.

Se pa sa, sa swa ki devan nou. Sa ki devan nou ozordi se, eski *Air Seychelles* i annan en vyabilite non selman ekonomik, me enn vyabilite Nasyonal dan bann lannen ki pe vini, oubyen eski i napa? Si i annan *obviously* desizyon pou ganny pran pou gard li. Si i napa *obviously* desizyon pou ganny

pran pou ferm li oubyen pou redwir son aktivite.

E dan sa konteks Mr Speaker, mon ti a kontan fer resorti bann keksoz swivan;- Desizyon ki devan nou ozordi, se pa tir larzan dan en lot landrwa dan Bidze, e met li dan *Air Seychelles*. Non. Malgre ki wi dan en serten fason si ou met larzan dan *Air Seychelles* se ki ou napa larzan pou met dan en lot landrwa.

Me parey in ganny fer resorti par Onorab Andre, i annan bokou landrwa dan Bidze kot nou depans larzan san annan en *return* komersyal. E nou bezwen fer li. Lasante par egzantp. Ledikasyon, sa se bann keksoz ki nou bezwen fer ki nou depans en kantite larzan. Me nou pa rod son rantabilite. E *Air Seychelles* i egzaktaman parey.

Nou pa devret toultan neserman rod son rantabilite komersyal. Si sete sa leka, Gouvernman ti pou'n privatiz li depi byen lontan. E les dimoun, wi nou bann neoliberal. Anfen nou pa bann neoliberal nou bann liberal. Les en lakonpanyen prive *run Air Seychelles*. I pa ti pou bezwen vin en *national airline*. Me se akoz son lezel i bokou pli larz ki selman en antite komersyal ki nou bezwen regard li dan tou son profon.

Alor Mr Speaker, swa devan nou ozordi i en pti pe sa ki Angle i apel en *catch 22*. Mon'n fer sa resorti yer e mon ava repet li ozordi. I pa en kestyon ferm *Air Seychelles* e det i disparet. Oubyen kontinyen *Air Seychelles* e ou a bezwen kontinyen pey det.

Det i la ki ou fermen, ki ou pa fermen. Kestyon ki devan nou se, eski ou ferm sa lakonpanyen ki kekfwawa i ava kapab ed ou pou pey sa det, e pran tou det lo ou menm? Oubyen eski ou gard en posibilite menm si det pou *increase in the short term*, en posibilite ki dan mwayen term e lonterm sa lakonpanni i ava ed ou pou re pey sa det?

That is the position kot nou ete ozordi. E se sa ki fer sa sityasyon konpleks. Akoz det *Etihad* 11.7milyon, e *Air Seychelles* oubyen Gouvernman pou bezwen peye. Det avek bann *bondholders* 71 milyon oubyen 20milyon. Mwan mon krwar i 20 milyon. *Air Seychelles* oubyen Gouvernman pou bezwen peye.

Si Gouvernman i fermen, nou bezwen pey R19milyon pou retourn bann avyon, plis *redundancy staff*. Si i pa fermen nou bezwen trouv apepre menm sonm larzan 15 a 19 milyon pou *keep the operation going*. So it is

a no brainer. Mr Speaker, nou bezwen depans menm kantite larzan ki nou fermen oubyen ki nou pa fermen.

Kestyon alor ki devan nou se, ki mannyer nou pou aprosa sa sityasyon? Eski nou ferm li pou nou pa depans plis larzan e donk remet larzan dan Bidze dan bann lezot sekter? Oubyen eski nou donn li en sans avek en *management* en pe pli pridan? Anfet bokou pli pridan. Pou li kapab ede ranvers sa sityasyon ki in trouv son lekor. Oubyen ki in anmenn lo son prop lekor depi 2012.

Donk se sa Mr Speaker, mon krwar bann keksoz ki nou devret pe viz lo la ozordi. E mwan mon ti a kontan rebran en parol Prezidan, si *Air Seychelles* in ariv dan sa sityasyon ozordi, se akoz ki *Board ek Management Air Seychelles* pa'n azir konmsi sa antite ti zot biznes.

Akoz mon konnen, pa fer mwan krwar ki si sa ti zot biznes zot ti pou pran bann desizyon. Zot ti pou al *borrow* sa kantite larzan ki zot ti konnen zot pa ti pou kapab rann.

Alor Mr Speaker, si *Air Seychelles* pou annan en vyabilite, sa pou depan lo striktir e performans sa *Board* ki pou *run* li, ek sa *management* ki pou *run* li. Nou'n ganny dir

ki depi 2017 in annan en restriktirasyon pozitiv. Alor mon espekte ki sa i ava kontinyen.

Alor ozordi Mr Speaker, mon war ou pe get pandil. Mon pa anvil pran plis letan ki mon'n ganny *allocate* bomaten. Mon ti ava kontan an konklizyon dir sa 3 keksoz. Annou pa pran en desizyon lo en baz emosyonnel, ni lo en baz literal. I pe perdi larzan alor annou ferm li.

Sityasyon i bokou pli kompleks. Annou pran en desizyon dan tou son kompleksite. Dezyenm keksoz ki mon ti ava kontan dir. Se ki nou bezwen, sa Lasanble i bezwen a lafen dizour retourn lo sa Mosyon, e anvoy en serten keksoz kot Gouvernman pou montre kisisa ki nou'n tonm dakor lo la.

Mosyon pa demann nou tonm dakor lo okenn keksoz. I demann nou envit dimoun, *interact* avek zot, epi anvoy serten propozisyon devan Gouvernman.

Alor Mr Speaker, mon krwar ki lafason ki nou pou swiv. E ou ava diriz mwan lo la, se ki antan ki *mover* sa Mosyon mon'n prepar en dokiman ki rezim deba ki'n arive dan sa 2 zour. Ki rezim bann pwen ki'n sorti. E ki rezim bann pwen ki'n sorti bomaten.

E mon ti ava kontan ou gidans Mr Speaker. Eski mon ava pran sa dokiman e nou a retourn lo la apre *break* pou ki nou a adopte li? E pou nou servi sa koman sa keksoz ki nou anvoy kot Gouvernman. Oubyen eski i ava en keksoz ki ou biro i ava travay lo la, e ki Clerk i ava anvoy li kot Gouvernman? Mon ava pran ou direksyon lo la bomaten.

Me sa ki mon ti ava swete, se ki dan en fason onnet e fran koman sa Lasanble, nou anvoy en *maximum* lenformasyon kot Gouvernman pou ed li ler i pou bezwen ariv a sa desizyon ki i pou bezwen pran. Mersi Mr Speaker.

MR SPEAKER

Mersi *LGB*. Nou pou bezwen kont lo ou pou ariv lo en propozisyon pou konklir sa deba. Sa i kler. E sa ki mon ti a kontan se ki ler nou retournen i annan en *draft* en dokiman ki ou ti ava'n kapab si posibil sirkil avek bann Manm avan.

Si i posibil mon ti a kontan ki nou annan en keksoz ki nou konklir avek. Ki nou adopte, en *statement*. Me sa *statement* i pa neserman bezwen en *statement* ki detaye. Nou kapab konklir ki Biro Speaker oubyen en Komite ki petet i kapab enkli ou menm avek *LGB*, i kapab

finaliz en rapor ki nou kapab atas avek nenport konklizyon ki ou anmenn devan nou apre sa *break*.

E avek sa mon a propoze ki nou zwenn 11er edmi. I a *ok* pou ou sa *LGB*? *Ok*. Nou ava pran poz la e nou a repran 11er edmi. Mersi.

(BREAK)

MR SPEAKER

Eskiz anver nou lodyans an deor pou sa retar. *LGB* mon'n resevwar ou rapor lo *Bill*. Mon ti a demann ou pou fer en pti rezimen an Kreol pou nou piblik sirtou e apre nou a regarde ki mannyer nou kapab posede avek adopsyon. Mersi.

HON BERNARD GEORGES

Mersi Mr Speaker. Mr Speaker, parey ou'n prevwar nou'n prepar en rapor ki nou'n gannyen sans sirkil avek tou Manm Lasanble e mon annan lafyerte pou dir ki tou Manm i dakor ki sa rapor ki devan nou, i rezim bann deba ki'n arive, bann desizyon, bann konklizyon ki'n ariv la.

Nou remersye ou pou sa letan ki ou'n donn nou pandan *break* pou nou *fine tune* en pti pe sa rapor e nou'n sirkil avek tou bann Manm en dernyen

versyon ki annan konsansis li tou lede kote e ki pa sanz naryen dan premye versyon ki ti'n ganny sirkile pli boner.

Mon osi bezwen dir ki an konsiltasyon avek *Leader* Lopozisyon in fer mon konpran ki i annan li osi serten keksoz ki i ti a kontan fer sorti. E ki letan pa'n permet nou konsolid dan en sel rapor e mon'n dir li ki lo nou kote nou napa okenn problemn akoz se bann pwen ki nou osi, ki dan rapor, me ki li in anvi al en pti pe plis dan detay ladan.

E mon'n dir li ki etandonnen ki lobzektif se anvoy en maksimonm lenformasyon kot Gouvernman avek ou permisyon, mwan mon pa pou annan okenn problemn akout son rapor koman en *annex* a sa enn ki mon pe propoze ki Lasanble i adopte bomaten. Sa *obviously* Mr Speaker, i dan ou domenn. Me mwan mon'n lir son rapor en mon pa vwar okenn rezon pou pa dakor avek.

Alor Mr Speaker, ou envit mwan fer en pti rezimen sa rapor. Mon pa pou pran pli ski 5 minit, menm pa kekfw. Nou rapor ki devan nou ki mon pe demann Lasanble pou adopte a linanimite bomaten, i komans par sa Mosyon ki'n ganny debate dan sa Lasanble yer le

2, ozordi le 3 Fevriye 2021. I *set out* sa Mosyon e i dir ki sa Mosyon ti pase a linanimite e an rezilta sa in vin 4 panel devan nou yer pou fer prezantasyon e sa se *staff Air Seychelles, management Air Seychelles*. Minister Finans ek Minister Transpor.

Dan en premye morso sa rapor i annan en pti rezimen sa ki sakenn sa bann *panel* in dir, e imedyatman swivan i annan en seksyon ki donn bann pwen pli enportan ki'n sorti dan sa lesanz ki nou'n annan avek sa *panel*. E nou'n fer sa anba 4 *heading*.

Premyerman bann benefis direk ki *Air Seychelles* i anmennen. Dezyenmman bann benefis endirek ki *Air Seychelles* i anmennen. Trwazyenmman bann konsekans si nou ferm *international sector Air Seychelles* e katriyenmman bann konsekans si nou pa ferm *international sector Air Seychelles*.

Mr Speaker, a sa moman mon ava demann eski ou ti anvi mon donn sa bann pwen, oubyen eski nou dakor ki sa i ase lenformasyon ?

MR SPEAKER

Si ou ti kapab fer li brefman dan 3, 4 minit.

HON BERNARD GEORGES

Wi, wi mersi.

MR SPEAKER

Mon ti a kontan si ou kapab pas lo la.

HON BERNARD GEORGES.

Wi, premyerman bann benefis. Sa se pa nou ki pe dir, se en rezimen sa ki nou'n tande dan Lasanble. Premyerman kolektivite ek en Polisi lasirans pou nou Lendistri Touris.

Dezyenmman, sekirite ek stabilite nasyonal zis an ka tou bann lezot *airline* i ale.

Trwazyenmman, abilite ki *Air Seychelles* i annan ler i vin vyab pou li fer \$7milyon *income* par an, atraver *ground handling* ek domestik.

Dezyenmman bann benefis endirek. Sa se benefis ki i anmennen pou Lendistri Touris. Sa ekosistenm kot in *train* bokou dimoun ki kantmenm zot pa travay pou *Air Seychelles* zot al travay an deor.

Trwazyenmman en lenspirasyon pou bann lazenes ki pe monte, pou zot kapab *join* sa *airline*.

Katriyenmman bann retonbe endirek ki i arive dan lekonomi parey in ganny dir.

Including 40mil touris ki sa Lakonpanyen in anmennen.

Ek senkyenmman, ki sa lakonpanyen pa devret vwar li koman 3 konponan me komann en sel lakonpanyen ki si ou tir en konponan lezot pou tonbe. Be si ou gard tou ansanm tou le 3 pou monte.

Trwazyenm vole. Bann konsekans si nou ferm *international*. Sa se premyerman i pou kout pei \$19 milyon pou retourn sa 2 *neo air craft*.

Dezyenmman sa bann det avek *Etihad* e avek bann *bond holders* pou *still* bezwen ganny peye.

Trwazyenmman pou annan apepre 2900 dimoun ki pou perdi lanplwa e ki pou bezwen ganny *re deployed* e pou annan *redundancy cost* avek sa.

Katriyenmman, *retraining* pilot ek enzenyer i pran letan. 6an a 7an dan serten ka. Apre nou perdi *slots* dan bann lezot *Airport* si nou pa *fly* laba.

Domestic ek *ground handling* pou kout en pe plis akoz zot pa pou annan sipor enternasyonal. Nou *ground handling income* pou depan antyerman prezan lo bann lezot *airline* e non pa lo *Air Seychelles*. E me, lo lot kote sa 40mil touris ki *Air Seychelles* i

anmennen i tre probab ki lezot *airline* i ava *take up*.

E katriyenm vole, bann konsekans si *international* i kontinyen. Premyerman tou bann benefis ki mon'n fek masyonnen i ava reste. Direk ek endirek.

Gouvernman pou *still* bezwen pran sa det malgre fermen pa fermen, sa det 11 milyon ek *Etihad* avek 20 milyon ek *bondholders* minimonm pou *still* reste.

Gouvernman pou bezwen kontinyen *subsidize* *Air Seychelles* a lavalier 15 milyon ki *Air Seychelles* i estimen pou sa 2an ki vini. Oubyen *up to* 19 milyon ki Minister Finans i estimen.

E enn bann konsekans gard *international* se ki Gouvernman pou bezwen priyorite son depans ki i fer dan en Bidze ki pe atresi aköz sityasyon ekonomik an rezilta pandemik *COVID*.

Rapor prezan i kontinyen lo deba. Se sa ki'n ariv bomaten e nou'n fer en pti rezimen lo bann pwen salyan ki'n sorti dan deba bomaten.

Premyerman se ki Manm, tou bann Manm in kondann bann move desizyon ki'n ganny pran par *Air Seychelles* dan sa bann dernyen lannen ki'n

anmenn sa lakonpanyen dan leta ki ou vwar li ozordi.

E Manm in fer sa bann sizesyon e sa bann propozisyon swivan parmi lezot. Nou pa devret perdi souvrennte. Nou devret sov *Air Seychelles* otan ki posib, donn li en dezyenm sans. Depi son restriktirasyon an 2017.

Trwazyenmman, enn bann lezot Manm i dir. Non, non, non annou *cut* nou *losses* pandan ki nou kapab aköz sak sou ki nou met dan *Air Seychelles* nou ti a kapab servi li pou met dan *housing* oubyen dan en lot priyorite dan Bidze.

Katriyenm pwen, si *airline* pou kontinyen, fodre i annan en *Board* ek en *management* ki pou proaktive. Ki dedye dan zot travay e ki ganny *very closely monitored* ek *supervised*.

Senkyenmman, Gouvernman i devret e i bezwen fer en lenvestigasyon, en lanket aprofondi dan *past management* sa lakonpanyen, pou *find out* aköz ki bann rezon ki in ariv la kot i ete.

E finalman ki Minister Finans i devret en pe pli proaktive pou al rod lezot sous finansman pou *Air Seychelles* olye zis depan lo larzan dan Bidze Nasyonal.

E finalman apre tousala Mr Speaker, nou'n ariv lo en

konklizyon ki i annan konsansis lo sa de kote. E sa konklizyon i dir ki tre zeneralman parti mazoriter dan Lasanble i an faver vwar en *business model* konkret pou *tackle* bann loperasyon ki perdi larzan dan en fason pou fer sir ki larzan Gouvernen pa ganny met dan *Air Seychelles* me i ganny *freed up* pou servi dan bann lezot sekter ekonomik.

E zeneralman lopoziyon ti an faver mentenir loperasyon mannyer i été, avek en restriktirasyon san ki i annan okenn lanplwa ki perdi dan en fason pou permet lakonpanyen donn li en sans pou prouv son lekor.

E lo sa de baz, konsansis Lasanble i paret ki i an faver en restriktirasyon lakonpanyen *Air Seychelles*, ki pou annan koman en bi *save* sa *airline*. Bann konponan esansyel dan sa restriktirasyon nou krwar i ava ki *management* i bezwen vin pli serye e ganny pli *closely monitored*. Bann fon ki ganny trouve dan en landrwa ki pa sorti dan Bidze otan ki posib pou siport lakonpanyen.

E trwazyenmman ki lakonpanyen i bezwen vin responsab pou li vin vyab e pey son prop depans. San ki i bezwen depan lo Gouvernman.

Sa se sa 3 konponan esansyel si i pou kontinyen.

E nou dir finalman ki lavi *Air Seychelles* i en keksoz ki en gran konsern pou sak Seselwa. Lasanble Nasyonal i remersi Gouvernman pou donn li sa loportinite pou kontribye dan sa deba. Nou remersi tou dimoun ki'n asiste nou dan nou konsiderasyon sa zafer enportan ki *Air Seychelles* i reprezante. Nou donn sa rekomandasyon avek Legzekitiv dan lespwar ki i ava asiste *Cabinet* ler *Cabinet* i arive pou pran en desizyon lo lavenir, lo striktir nou *airline* Nasyonal dan lavenir. E nou demann avek Gouvernman pou kontinyen angaz avek nou pandan sa prosesis.

Vwala Mr Speaker, sa rapor ki nou'n sirkil avek tou bann Manm e ki nou annan plezir pou dir i annan en konsansis lo tou lede kote latab. Mersi.

MR SPEAKER

Mersi *LGB*. *LOTO* ou ti a kontan zis azout en mo lo la.

HON SEBASTIEN PILLAY

Mersi Mr Speaker. Mr Speaker, lo kote *United Seychelles* nou ti antre dan prosesis avek en lespri tre kler, ki nou pa ti anvi ki Gouvernman ler in fini pran

en desizyon i met sa boul dan kare Lasanble. Nou pozisyon nou mentenir e se pour sa rezon ki nou, nou pe siport ki okenn reform ki anmennen kot *Air Seychelles* napa okenn travayer ki perdi zot lanplwa.

Lo en parti progresis nou en parti ki'n toultan regard dan lentere travayer e nou pou toultan kontinyen fer li.

Mr Speaker, dan mon konklizyon ki nou'n mete. Nou'n osi azout serten eleman enpotan ki i enportan ki Gouvernman i osi pran konsyan. Nou konnen ki Gouvernman pou resevwar en kantite presyon *from* bann donner enternasyonal. Sirtou *IMF* oubyen *World Bank* an sa ki konsern *Air Seychelles*.

Pou ou lenformasyon Mr Speaker, personnelman koman e Manm Lasanble senkyenm Lasanble, sizyenm Lasanble, a plizyer repriz ki mon'n zwenn avek bann konsiltan sorti kot tou lede antite, enn ban fakter kle ki zot in toultan souleve i paret ki zot pa'n zanmen apresye oubyen zot pa'n zanmen konpran lefe ki Sesel i annan en *airline* Nasyonal.

Mon ti a kontan demand e e fer en pledwari avek ladministrasyon aktyel, pou ki reziste tou tantasyon gro lebra sorti kot sa bann lorganizasyon

si zot vin avek okenn program ki anmenn nou ver en restriktirasyon brit lo laliny aeryen ki avek anmenn pert louvraz e per en lasyet manze lapar nou fer oubyen nou ser Seselwa.

Mon konklizyon Mr Speaker, i zwenn pou *Leader* zafer Gouvernman dan lesans ki nou krwar ki *Air Seychelles* i kapab baze lo program ki son *management* i prezante e ki byento nou Departman Transpor pou diskite i kapab tourn sa konpanyen ver pozisyon ki *eventually* i ava *break even* e nou konnen ki tou zefor i bezwen ganny fer pou nou kapab rod meyer solisyon.

3 pwen ki mon ti a kontan azoute Mr Speaker, si ou permet mwan byen vitman.

Premyerman nou osi demande ki SCAA ek *Air Seychelles* i kapab travay kolaborativman dan en fason pli kler ki mon konnen tou lede antite i *committed towards* e asire ki bann *fixed based operator contracts* an sa ki konsern *ground handling*, i ganny regard avek lentere *Air Seychelles*. Par lefe ki *ground handling* i enn bann konponan ki anmenn en pli gran konponan reveni pou *Air Seychelles*.

Dezyenmman, nou demande ki rol EPMC i ganny ranforsi pou li zwe en rol pli enportan dan *monitoring* sa ki pe pase dan bann antite tel parey *Air Seychelles*. E pou ki bann desizyon ki *board* ek *management* i pran zot bezwen kapab defann li devan sa antite.

E trwazyenmman Mr Speaker, e dernyen. Nou demande ki Minister Finans dan tou son lapros ki i fer, i enkli Departman Transport dan bann diskisyon, koumsa ki i pa ava annan en pozisyon kot nou vwar en departman dir nou en keksoz e en lot dir nou en lot keksoz.

Avek sa Mr Speaker, mon ti a kontan swet tou travayer *Air Seychelles*, bonn sans dan zot travay. Mon demann zot pou kontinyen fer zot louvraz avek tou rezilyans e determinasyon ki zot in fer li ziska la. E mon rezwenn *Leader* Zafer Gouvernman dan en pledwari ki'n osi ganny fer par Onorab Waven William, pou ki Gouvernman lefe ki in anvoy sa boul dan *court* Lasanble, *next time* ler pou li met *goal*, osi enkli Lasanble lo laplenn pou ki nou ava fer sir poudir nou pe *score* en *goal* oubyen nou pa pe tap sa penalti deor. Mersi Mr Speaker.

MR SPEAKER

Mersi *Leader* Lopozisyon. Onorab Georges, mon ti a kontan si ou propoze ki Lasanble i adopte sa rapor, ki enkli bann pwen li lopozisyon in azoute e nou a vreman pou formalite pas lo en vot pou nou fer sir ki nou dakor lo la.

HON BERNARD GEORGES

Mersi Mr Speaker. Mr Speaker, mon annan gran loner a ou demann pou mwan *move* sa Lasanble ki sa Rapor, ki mon'n prezante avek bann *annex* sa rapor ki *Leader* Lopozisyon in met devan nou la bomaten, in prezante i ganny adopte koman Rapor Lasanble an antye ki nou pou anvoy kot Gouvernman lo sa size *Air Seychelles*.

Mr Speaker, *I beg to move*.

MR SPEAKER

Mersi. Mon a ganny en segonnman. Wi, Onorab Arissol.

HON SANDY ARRISOL

Mr Speaker, mon krwar i fer mwan en plezir e en loner koman e Manm Lasanble pou mwan segonn sa Mosyon. En Mosyon prezante par Onorab Georges. E parey in ganny dir in ganny konsansis tou le de kote

latab. Alor mon pe segonn Mosyon, Mr Speaker.

MR SPEAKER

Mersi. Mon envit Manm pou vote. Bann ki an faver silvouple lev lanmen. Mersi. Sa ki kont? Napa personn kont. Mersi.

Alor Mosyon in ganny adopte par Lasanble avek 29 vot pour, 0 kont e 0 abstansyon. Avek sa mon deklare ki Mosyon in ganny aprouve a la linanimite.

(APPLAUSE)

MR SPEAKER

Mon remerci bann Manm. Mon krwar in en deba tre fritye. Mon krwar nou'n ranpli nou responsabilite pou nou prezant nou pwennvi e ki reflekte pwennvi nou konstityan an deor Lasanble. Avek sa mon a dir nou a poz la e nou pou rebran 2er apre midi. E mon *remind* bann Manm ABC ki nou pe zwenn 1.15. Mersi bokou.

(BREAK)

MR SPEAKER

Bonn apre midi tou dimoun. Nou annan en sesyon *Question Time*. En pe an deor routin ordiner. E nou pou konmans avek premye kestyon *Private*

Notice Question. E nou ava apel Minis ek son delegasyon. Yes *LOTO*.

HON SEBASTIEN PILLAY

Mersi Mr Speaker. Mr Speaker avek ou permisyon, mon le zis dir en pti keksoz lo sa size ki nou'n aborde bomaten ki ti annan sa *Urgent Question*. Mon le ki Lasanble i zwenn avek mon pou fer sir demann Minis e bann Lotorite konsernen, pou fer sir ki *handling* sa size ki'n ganny souleve dan sa *Urgent Question* i ganny fer. E bann lenvestigasyon neser bezwen ganny fer.

Akoz i menm annan bann *manifest* oubyen bann dokiman, ki pe ganny mete lo rezo sosyal, ki montre bann non bann dimoun ki pou mwan i pa byen. E ki nou *hope* aköz Sesel i en landrwa kot sipoze annan Lalwa ki sa bann keksoz i ganny *investigated* e ki Minis i *forthwith* vin devan e klarifye tou sa bann keksoz. Mersi Mr Speaker.

MR SPEAKER

Mersi *Leader* Lopozisyon. Parey nou'n dir dan ABC, nou ava regarde ki mezir nou kapab pran, pou nou fer sir ki Lasanble i gannyen en pe lenformasyon lo la. Mersi.

Bonn apre midi. Bon nou annan avek nou Minis pou Lanplwa e Zafer Sosyal Mrs Patricia Francourt, e osi Mr Jules Baker Sekreter Prensipal dan sa Minister Mrs Veronique Bresson *Special Adviser* e Ms Letimie Dookley Direkter Zeneral pou Lanplwa *Employment Promotion Division*. Nou al lo kestyon *Private Notice Question Leader* Lopozisyon, Onorab Pillay.

HON SEBASTIEN PILLAY

Mersi Mr Speaker. Bonn apre midi Minis avek ou delegasyon. E bonn apre midi tou dimoun ki a lekout.

Mr Speaker mon kestyon i lir koumsa, prenon kont ki Gouvernman in pran desizyon pou aboli program *URS* apartir sa ki'n ganny dir Mars sa lannen, eski Minis pou Lanplwa i kapab donn detay lo sa apepre 1800 dimoun ki lo sa program, konbyen ki madanm oubyen msye, kote zot ete, si dan sekter prive oubyen dan Gouvernman?

Eski in annan okenn evalyasyon oubyen lo lenpak sosyoekonomik avan ki sa desizyon i ganny pran?

E mon trwazyenm parti kestyon ki pou arive avek sa apepre 1800 dimoun, e ki garanti ou pe donn nou

Lasanble ki sa bann dimoun, oubyen bann ki depan lo zot pa pou al dormi vant vid apartir Mars sa lannen? Mersi Mr Speaker.

MR SPEAKER

Mersi Onorab Pillay. Minis.

MINISTER PATRICIA FRANCOURT

Mersi Mr Speaker. Bonn apre midi Mr Speaker. Bonn apre midi tou bann Manm Onorab, bonn apre midi tou bann a lekout.

Mersi Onorab pou ou kestyon. Pou konmanse mon ti a kontan zis fer rapel ki ler *URS* ti ganny re entrodwir an 2018, son bi prensipal sete pou ed bann dimoun ki ti pe ganny bokou difikilte pou antre dan en lanplwa kapab reste prodiktiv e ganny en sours reveni.

E osi resevwar serten *skills*, pou permet zot trouv en lanplwa permanan. Sa ti prensipalman pou bann dimoun ki pe viv avek serten dezabilite, me ki kapab travay dimoun ki pe swiv tretman pou zot adiksyon drog, oubyen lalkol, e osi bann dimoun ki ti'n fek sorti prizon.

Dapre Lalwa *URS*, en dimoun i sipoze partisip lo sa program pou 6 a 12 mwan selman. Tou dimoun ki ti antre

anba sa program, ti okouran ki i tanporer e zot ti osi bezwen pe aktivman rod en lanplwa permanan.

I enportan pou note ki i annan en pti pe plis ki 1000 partisipan, ki'n pas atraver sa programm depi son re lentrodiksyon ki osi zot dan en lanplwa formel. E 215 ki'n ganny enspire oubyen atraver formasyon, ozordi zot annan zot prop biznes.

Mr Speaker an Desanm 2020 ti annan 1790 partisipan ki ti aktiv lo programm *URS* e pou Zanbye 2021 sa in desann pou ariv 1610 partisipan ki ti ganny en *allowance* anba sa programm.

Sa i konpri 812 madanm e 788 msye. Sa bann partisipan i baze dan bann diferan sekter. Me pli gran mazorite, 1505 partisipan zot baze dan bann diferan departman gouvènmantal, swivi par 58 dan bann lakonpanyen parastatal e 47 dan bann lakonpanyen prive.

Pou note ki lakantite dan prive i tre ba pou la senp rezon ki bann mezir lasante ki'n ganny met an plas pou limit kontak, pa'n permet sa bann partisipan eskize zot pou partisip aktivman.

Departman Lanplwa in fini antre an diskisyon ek bann

diferan antite Gouvernman, parastatal, osi byen ki prive depi Desanm pou zot donn lendikasyon konbyen e lekel sa bann partisipan ki zot pou anploye.

Me parey nou konnen bann antite Gouvernman, i bezwen esper konfirmasyon Bidze ki zot in demande pou zot konnen si zot pou kapab fer *recruitment*.

Me sa ki tre ankourazan se ki i annan serten zot ki verbalman, zot in donn en lendikasyon ki zot pou anploy serten nonm dimoun ki ti anba sa programm avek zot.

Nou'n osi ganny lendikasyon verbal avek sekter prive, ki zot in pare pou pran sa bann partisipan, me pou lemoman zot ankor pe analiz sityasyon ekonomik ki pei ladan e osi zot *cashflow*.

Me zot in dir nou ki avan lafen dimwan Fevriye zot pou donn nou en larepons definitif. Si sa programm *URS* ti kontinyen sa lannen 2021, i ti pou kout Gouvernman plis ki R270milyon konpare avek apepre R69milyon pou lannen 2020.

Minis Finans in fer resorti a plizyer repriz, ki akoz lenpak *COVID-19* lo lekonomi, Bidze Gouvernman i bezwen redwir pou reflekte sa realite ki nou pe

fer fas avek. Gouvernman in alor decide, an vi konstrent bidzeter i pa ti pou soutenab pou kontinyen sa program.

Avan decide lo ki mannyer pou *phase out* sa program Gouvernman atraver Departman Lanplwa ti diskite obzerv bann tandans dan statistik, pou vwar posibilite pou bann partisipan *URS* osi byen ki lezot dimoun ki pe rod en travay, rantre dan en travay dan pli kout dele letan. Dan nou analiz nou'n vwar premyerman ki i annan loportinite lanplwa dan pei malgre ki demann pou travayer in redwir aköz *COVID-19*.

Tou resaman i annan nouvo biznes ki'n pare pou ouver zot laport par egzamp lotel *Club Med* e *Mango House* e osi avek devlopman lo kote Lasante, ki'n konmans son program vaksinasyon ki pe fer ki biznes pe reganny konfyans ki keksoz pou aranze byento.

Dezyenmman anliny avek Polisi Gouvernman pou met Seselwa premye kot i konsern lanplwa, nou'n regard lo kote travayer etranze. Atraver lenformasyon e statistik, entern nou'n vwar ki demann pou travayer etranze pe kontinyelman ogmante malgre *COVID-19*.

Nou'n osi konstate ki bokou sa bann pozisyon i dan bann domenn ki Seselwa i kapab antre ladan. I annan ki pou byensir bezwen serten formasyon ki anplwaye pe ganny demande pou donn en koudmen pou donner.

Alor nou'n regard lo kote *GOP* ki pe ekspire sa lannen pou nou kapab annan en plan, pou ki tou dimoun ki enterese pou travay e ki pe aktivman rod en lanplwa, i kapab ganny sa loportinite pou antre dan en travay. I annan 6078 *GOP* pou ekspire depi Zanvye ziska Zen sa lannen. Zis pou sa premye kar Zanvye ziska Mars, pou annan anviron 3500 *GOP* ki pou ekspire. Nou pe tre byento al konmans en travay avek sa bann biznes lo en baz endividyel, pou aviz zot lo sa ki pozisyon lo sa pozisyon ki travayer etranze pe ganny ranplase par Seselwa baze lo *skills* ki annan lo marse lanplwa.

Nou pa pe esper ler dat *GOP* i ekspire, oubyen kan zot vin kot nou demann pou renouvle *GOP*. Nou pe proaktiv e al ver sa demars byen boner ki biznes osi ava ganny lenformasyon byen davans pou zot reazir.

Pou fer konnen se ki nou pe prevwar apepre 5000

dimoun ki pou san en lanplwa dan sa premye kar lannen prenon kont bann diferan program ki pe arete tel ki *URS*, *SETS* an plis *graduates* sorti liniversite e bann sant profesyonnel.

Pou note ki an se moman nou priorite, se pou annan en sistenm lenformasyon entern, ki efektif kot nou kapab vitman fer *matching* dimoun, ki pe rod en lanplwa avek pozisyon *vacant* ki vin lo marse lanplwa detanzaot. Pou sa nou pe travay san ses avek *DICT* e nou espekte ki sa pou kapab *operational* dan sa prosen 2 semenn.

Mr Speaker Departman Lanplwa pe kontinyelman travay avek sa bann partisipan, pou asire ki zot ganny en lanplwa osito posibil. Me ankor enn fwa mon bezwen dir ki i osi responsabilite sak endividi pou zot osi donn Minister en koudmen e pran bann loportinite lanplwa ki a zot laporte.

Nou tou nou bezwen rekonnet ki nou dan en letan difisil, e pa ler pou nou swazir ki nou anvil fer. Annan en sours reveni ki pou anmenn manze kot lakour, i bezwen nou priorite pou lemoman. Departman Lanplwa pe deza travay lo bann diferan stratezi

lo ki mannyer pou asire ki nou ed bann dimoun ki bezwen nou, lasistans e ki pe aktivman rod en lanplwa.

An plis ki sa, ki mon'n fini mansyonnen savedir sa *matching* entansif ki nou pou byento konmanse, nou annan sa bann stratezi swivan.

Premyerman ankouraz bann sant profesyonnel atraver Minister Ledikasyon, pou pran plis zelev dan bann sant, e sa i ava redwir lakantite zenn ki antre lo marse lanplwa.

Dezyenmman, travay avek sekter prive pou vwar ki mannyer zot osi kapab asiste Departman Lanplwa, pou donn formasyon bann dimoun ki vwar zot san en lanplwa sirtou dan bann sekter ki an demann.

Trwazyenmman travay a kolaborasyon avek bann anplwayer pou fasilite prosedir pou pibliy bann pozisyon ki zot annan. E la i enportan pou note ki depi sa dernyen de semenn, nou'n pibliy 784 pozisyon.

E nou'n vwar ki bokou *job seekers* in pran sa loportinite pou *apply* pou sa bann diferan post. Dan 784 pozisyon ki'n pibliye 513 in fini fermen e nou'n resevwar antour 510, laplikasyon sorti kot bann dimoun ki pe rod en lanplwa. Sa ti dan 2 semenn.

Kolabor avek diferan lenstitisyon ki ofer formasyon e osi byen ki bann endividi pou nou kapab met sa bann loportinite a laporte nou bann kliyan.

Finalman Departman Lanplwa pe osi travay avek Departman Zafer Sosyal, osi byen ki Lazans Proteksyon Sosyal pou asire ki zot osi zot ganny bann lenformasyon lo bann diferan loportinite travay ki annan. Koumsa zot ava kapab enform bann kliyan ki vin vwar zot dan distrik. So i en louvraz kolaborasyon.

Nou'n fini fer *profiling* tou bann partisipan *URS* pou konnen, lekel ki pe antre dan en lanplwa toudswit, oubyen sa ki pou bezwen formasyon adisyonnèl. Me nou konfidan ki nou pou reisi pas lamazorite ki anvi en lanplwa.

Mr Speaker pou konklir mon ti a voudre lans en lapel avek bann partisipan *URS* osi bann osi byen, ki tou nou bann dimoun ki pe rod en lanplwa pou silvouple aprozè si zot bezwen en lasistans pou retrouv en lanplwa permanan.

Mon pou repete ankor ki la i pa moman pou nou swazir sa ki nou anvi fer. La nou bezwen pran sa ki i annan byensir, dapre nou kapabilite.

Pou bann ki deza dan en lanplwa i pa moman pou nou mank respe dan nou landrwa travay, pou nou mank travay san en rezon valab, pou nou ariv tar dan travay, pou nou asize vey ler pou nou al dan lakour. La plis ki zanmen nou bezwen enkilke, nou dan sa kiltir travay dir. Donn plis ki posib dan nou travay pou anmenn en bon nivo prodiktivite. Nou bezwen *être* fleksib e adapte kan i neserer.

Gouvernman pe fer tou pou fer sir ki zot trouv en lanplwa. Sa ki vreman rankontre difikilte malgre tou lesey e pou sa bann nou pou annan rikord.

La ou ava ganny lasistans, pou en dele letan rezonnab pou soutenir ou fanmir. Parey mon'n fer resorti pli boner, i annan bokou ki'n pas atraver sa program e zot in reisi trouv en lanplwa permanan oubyen atraver leksperyans ki zot in gannyen zot in reisi konmans zot prop pti biznes.

Annan lespwar pou tou posibilite, me tou i pou depan lo zot konportman e lanvi pou reisi.

Mr speaker mon pa pou kapab terminen san ki mon pas en mesaz pou anplwayer dan Sesel, nou rekonnet difikilte ki serten zot pe pas atraver an se

momman. Pei antye pe fer menm sakrifis, nou pe demann zot pou fer tou zot posibilite, pou donn zot korporasyon pou pran nou travayer Seselwa pou travay. Partisip aktivman dan program formasyon e pli enportan fer sir ki zot kree latmosfer e lespas ki konvenab pou ankouraz nou Seselwa pou reste e travay pou zot. Mersi Mr Speaker.

MR SPEAKER

Mersi Minis. Onorab Pillay ou anvi *follow-up*? Wi.

HON SEBASTIEN PILLAY

Mersi Mr Speaker. Mr Speaker mon premye kestyon. Mersi Minis pou ou larepons. Mon premye kestyon ki mon ti a kontan demann Minis lo bann larepons ki in donn nou, Minis ou'n sit en sif 1505 dimoun ki dan bann diferan Departman Gouvernman, e ou'n osi sit en sif 3500 *GOP* ki pou ekspire apartir Mars.

E lefe i nou pe al pas Bidze mon annan 2 kestyon pou demann ou, ki pou klarifye pou mwan. Premyerman, eski dan sa 3500 *GOP* ki pe al ekspire Gouvernman pa pou *renew* sa bann *GOP*, pou fer ki bann Seselwa ki pou sorti swa lo program *URS* oubyen pe rod

lanplwa pou kapab ganny akse avek sa bann travay?

Dezyenman, an relasyon avek ou mansyonn lo Departman Gouvernman nou'n vwar poudir Bidze Gouvernman i en *incremental budget*. In ogmante *over last year*

E prezan lefe ki en kantite sa bann dimoun ki lo *URS* ti dan bann Departman Gouvernman, eski ou Minister apard ki en garanti verbal, in kapab ganny en garanti *proper* ki sa bann dimoun ki aktyelman pe travay kot sa bann Minister, par egzans sa manman ki annan 2 zanfan ki pe travay kot en lekol, atraver program *URS* ki *Headteacher* sa lekol i dir mon sa manman in fer en bon travay.

E lezot landrwa kot mon'n koz avek bann dimoun, zot dir mon sa bann dimoun fer bann bon travay. Eski ou'n kapab negosye e ganny en garanti pou asire ki si dan Mars, zot pa sa bann dimoun ki a ganny akse avek sa bann lanplwa ki sa bann *GOP holders* pe kite, Zot pou annan en *source of income* atraver sa departman ki zot pe travay avek, pou ki zot kapab garanti annan en lasyet manze pou anmenn lo latab?

E en klarifikasyon Minis, pandan ki ou pe koze mon'n resevwar plizyer konsern e mon

bezwen pas avek ou Minis akoz ou'n lans lapel ek bann dimoun ki lo *URS*. Plizyer konsern ki bann dimoun ki al kot *ASP*, zot ganny demande pou zot fer en laplikasyon avek Departman Lanplwa. Me zot pe dir mon poudir i annan nimeron telefonn ki zot in gannyen kot zot *call* pa reponn, oubyen zot in menm ganny dir anvoy *email*.

E lamazorite sa bann dimoun napa en fasilite pou anvoy en e *email*. Eski ki alors sa *interface*, sa koneksyon ki sipoze ganny etabli ant Departman Lanplwa ek Departman Sosyal sirtou *ASP*, i enn ki pe marse? E ki bann konsern ki ou konman Minis ou'n gannyen an relasyon avek sa? Mersi Mr Speaker.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Parey mon'n refer sorti ziska ler Bidze i ganny konfirman, nou annan en lide dan bann Minister lekel bann Minister ki pe dir zot posibleman, zot pou pran sa bann dimoun ki lo *URS*. Par egzantp nou an gran diskisyon avek Minister Ledikasyon e nou pe *meet* vreman souvan. Nou

an gran diskisyon avek Minister Lasante pe gard en pti pe ki bann posibilite ki i annan pou enkorpor sa bann zenn oubyen adilt lo zot program.

E sa nou pa kapab dir ziska ler Bidze i konfirman. So i akseptab pou nou dir verbalman zot pe donn ou "en garanti" mon met *in inverted commas*, *but we will know very soon. Because the budget will be coming to the National Assembly.*

Bann dimoun ki *call* lo nou bann laliny, nou fer remarke ki i annan plizyer fason, ki nou met nou bann kominikasyon. Si ou pe get lo nou *Facebook page* i annan, si ou pou get lo nou *website* i annan, nou osi donn bann nimeron telefonn.

Mon pa konnen si ou'n remarke i annan en kantite *advert* ki nou fer sorti, i apepre 3 ou 4 fason kominikasyon. So *definetly* nou pran kont bann dimoun ki pa kapab kominike. Si zot pa kapab al lo *website*, si zot pa kapab anvoy en *email*, i annan en limero telefonn osi.

Avek bann restriksyon *COVID* kot Biro Lanplwa, anba i annan bann sekirite ki konnen poudir alafwa i annan en kantite dimoun ki kapab mont anler kot nou, me sa i parey nou dir avek *COVID compliance*.

Si zot bezwen vin kot lofis osi e nou vwar en kantite dimoun i vini, akoz preski tou nou bann louvraz prezan i *advertise* anba. E zot vwar anba zot kapab pran telefonn zot *call* nou, me si fodre *then* zot kapab mont anler, me selman *on numbers*, zot pa kapab vin en kantite dimoun anler.

Lo lot kestyon ti annan en letan ki nou ti'n ouver akoz nou ti'n realize poudir ti annan en demann, me selman akoz *internally* nou osi nou'n malerezman rankontre bann *COVID cases*, nou ti bezwen fer en lanons pou nou fermen. Alor nou ti ava'n swete pou sa pa'n arive ki nou ti kapab vwar plis dimoun, akoz nou konnen la i sa moman ki dimoun kekfwa i bezwen nou servis plis.

Me solman nou osi nou ti bezwen fermen e ankor donn bann lenformasyon pou dimoun kapab *access* nou servis. Nou osi pe met pare, dan enn nou bann zefor ki nou pe fer. E nou ganny lendikasyon avek Minis Finans poudir kantite *staff* ki nou'n demande posibleman nou pou gannyen. Nou pe met pare en lot lofis *Ocean Gate House*, i pou pare, mon krwar *next week early next week* kot *again* sa i pou zisteman pou dimoun ki pe vin vwar nou kot nou lofis. So

i annan bann mezir ki nou pe pran pti a pti an konsiderasyon avek bann *COVID compliances* pou nou kapab fer sir ki dimoun i *access* sa *support* ki zot bezwen. Mersi.

MR SPEAKER

Mersi Minis. Onorab Mondon.

HON TERENCE MONDON

Mersi Mr Speaker. Bonn apre midi Minis avek ou lekip. Mon kestyon i al koumsa, i annan en kantite dimoun kot Ladministrasyon Distrik, pe travay anba sa program *URS* eski ou kapab dir nou ki kantite i annan dan sak distrik?

E ki laranzman zot pe travay avek Minister *Local Government* pou entegre sa bann dimoun?

E i annan en senaryo kot parey kot bann lekol, sa bann dimoun pe travay anba *URS*, me selman ti napa en pozisyon travay dan sa landrwa. Ki fason zot pe negosye pou sa bann dimoun ki'n deza travay pou en ta letan kot lekol? Me selman napa en pozisyon, eski zot pou kree en pozisyon pou sa bann dimoun, ouswa zot pou bezwen al redepoy zot en lot landrwa?

Mon lot kestyon lo kote sa *advertisement* ki zot pou fer, parey ou'n mansyonnen i annan en kantite dimoun pa

neseserman pe ganny sa lenformasyon atraver medya sosyal. Eski zot pe mazin servi Ladministrasyon Distrik konman en pwen pou kapab *advertise* sa bann pozisyon, en fason ki pli aksesib pou bann dimoun? Mersi Mr Speaker.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Dan distrik nou annan en total apepre 150 dimoun ki pe travay. Nou konnen poudir i annan en *freeze* lo *Government recruitment*.

Alor la, la kot sa *profiling* i vremen enportan. Nou deza annan sa *database* pou konnen lekel zot sa bann partisipan e ki zot *skill*, ki zot *qualities* ki zot in eksperyans ki zot kalifikasyon.

Prezan ki *manner* nou'n fer nou annan sa *database* zot in fini pare. So la i la sa dimoun e *these are the jobs* ki *available*. I fasil pou nou *match*. Alor nou pou konnen poudir si sekter piblik pa pe kapab pran sa bann zenn, oubyen sa bann partisipan la, me dan sekter prive ki i annan *available*? So nou annan sa *database* ki anmezir pe antre.

I annan dan distrik i annan ki'n dir poudir nou enterese me *again* ziska ler zot ganny konfirmasyon zot Bidze zot pa pou kapab donn nou sa garanti. Me nou, nou pa pe zis *bet* lo la.

So nou kontinyelman an lyezon ek kominikasyon avek sa bann dimoun, pou fer zot realize kote ki i annan louvraz ki ou kapab antre ladan. Port atansyon ki *again* nou pe dir ek dimoun *it will not be* sa louvraz petet ki ou anvi, me selman *as close* ki nou kapab *match* nou pou kapab *match* ou dan en louvraz. Nou kapab donn en lalis pli detaye Onorab *per district*. Mon *apologies* mon pa kapab fer sa. Me mon kapab anvoy en lalis pli detaye par distrik.

Mon kontan ou'n demann sa kestyon ki nou pe fer dan distrik, *actually* nou'n fini *agree* mon krwar mon ti'n dir dan mon mesaz, mwan mon *believe* anba mon sa Minister Lanplwa ek Sosyal tou le 3 Sosyal, Lanplwa ASP bezwen kapab travay ansanm dan sa moman la. Nou be zwen kapab travay *close*. So nou'n fini *agree* tou bann louvraz ki ou vwar i vin kot Lanplwa akoz nou pe demann tou *employers* pou anvoy louvraz kot nou, so nou

annan nou *database* e i *accurate*.

Dan distrik nou'n fini anvoy zot tou sa bann *vacancies*. Savedir ler en dimoun i vin kot ou dizon i vin kot en *social worker*, i pe anmenn *issues* sosyal, sa *social worker* pou kapab ed li *as part of counselling* pou dir ek li *these are the jobs available*. Mon *believe strongly* ladan. E dan *same for ASP officer*. Akoz i pe vin probableman vin regard *welfare*.

But at the same time pou *ASP officer* i kapab dir ek li, *these are the jobs available*. E sa in *post* zot devret sa in *post* zot ki kot nou.

So sa travay in vin vreman byen ansanm. *For the last week* nou pe kontinyelman nou pe *update* tou louvraz ki vini *ASP officers*, *will get a list*, *social workers will get a list*, nou pe sey travay ek *Local Government* osi pou regarde ki bor ki nou kapab pibliy *publish* kot bann louvraz i *available*.

So mon konnen lo kote distrik ti annan *again* restriksyon ouver, me solman mon'n ganny dir poudir i annan bann *screens* ki zot pe met an plas e si sa i arive, *then* bann dimoun i kapab retourn *full-times social workers ASP officers*, *at the time* la ki dimoun

i bezwen zot lasistans zot kapab retourn *full-time in compliance with the COVID, restrictions* avek bann keksoz ki demande. *But* servi piblik *to empower them and support them*, *but also give them some counselling* pou zot kapab rod en lanplwa e antre dan en lanplwa. Mersi Onorab.

MR SPEAKER

Mersi Minis. Onorab Uranie e swivan pou Onorab Bistoquet alor si ou ti kapab met pare pou al laba. Onorab Uranie.

HON ROCKY URANIE

Mersi Mr Speaker. Mersi Minis avek ou delegasyon. Minis dan nou sironstans La Digue ki depan preski antyerman lo touris, e bann lotel pe fer *redundancy*, mon ti a kontan konnen konbyen *vacancy* i annan lo La Digue, e konbyen bann dimoun ki lo *URS* ki'n fer laplikasyon pou zot ganny en nouvo travay? Ki garanti ou pe donn zot ki *by* lafen Mars zot pou annan en lanplwa? Mersi Mr Speaker.

MR SPEAKER

Mersi Onorab. Minis.

MINISTER **PATRICIA**
FRANCOURT

Mersi Onorab pou ou kestyon. Mon kapab konfirman ki i annan 125 *URS* lo La Digue pou lemoman. Avek La Digue Departman Lanplwa in fini konmans lo en program entansif pou *reskilling*.

E sa nou'n fini met an plas e nou'n realize poudir i annan bann travay vreman pre ki nou bezwen fer pou zot. Nou'n menm konmans fer zot evalyasyon zot *profiling*, avek bann partisipan *against* bann *GOP* aplikan.

So sa nou'n konmans fer sa legzersis, pou nou konnen egzaktaman. Mon bezwen dir pa toultan fasil kantmenm dimoun i lo *URS* pou ganny kontak avek zot. Kantmenm nou met bokou lankourazman annan de fwa i *call, call, call* pou nou kapab konnen egzaktaman kot zot ete. Annan de fwa *you know* zot pa konpare pou zot reponn nou lapel.

Me selman sa ki vreman pou efektiv se ki nou'n fini vwar zot *profile, and the put it together* avek bann *GOP* aplikan ki nou annan e la nou kapab dir poudir be *ok* Zanvye, la, la kantite dimoun, nou annan sa bann *data by the way* ki dir Zanvye la, la kantite dimoun ki nou annan ki annan *GOP* kote sekter zot ladan. So nou kapab dir poudir pran par egzant pa

vedir *it's the case*. Nou annan nou 10 *waitress* dan lotel, dizon i lo *GOP* 10 nou bann dimoun in pare. Nou kapab annan nou 5 resepsyonnis, nou'n fini kapab ganny sa lenformasyon pou nou konnen kot nou kapab plas bann dimoun ki lo *URS*. Mersi.

MR SPEAKER

Mersi Minis, Onorab Bistoquet. Onorab Loizeau pou swiv.

HON ROSIE BISTOQUET

Mersi Mr Speaker. Bonn apre midi Minis ek ou delegasyon. Minis ou'n dir nou o konmansman ou lentervansyon, ki sa *Scheme* ti ganny kree avek en kriter ase strik, ki ti pou bann dimoun avek pou soulaz zot avek dezabilite, bann ki lo tretman adiksyon, apre bann *ex prizonnyen*.

Mon kestyon se ki, eski tou sa bann mon pou dir lakantite ki ou'n donn nou 1610 partisipan, mon pa'n koz lo lannen pase, bann partisipan, zot in met sa kriter pou antre lo menm sa 3 kriter ki ou'n nonmen pou antre lo sa program, si non akoz?

Mon dezyenm kestyon dapre pou lenformasyon piblik, dapre mon konpran sa *Scheme* ti ganny etabli an 2018, dapre ki ou'n dir nou taler. E i paret

mwan nou ti a kontan konnen konbyen sa bann partisipan pe gannyen?

Aprè e antretan ki sa *Scheme* ti ganny met an plas an 2018, ti annan serten revi. Malgre ki *very short term Scheme*, ki'n ganny revi plizyer fwa. E si sa bann letan o konmansman ziska la sa revizyon ki'n ganny fer eski sa ogmantasyon ti progresiv e dir nou par konbyen? Mersi.

MR SPEAKER

Mersi Onorab, Minis.

MINISTER PATRICIA FRANCOURT

Mersi Mr Speaker. Mersi Onorab pou ou kestasyon. Parey mon'n dir mon *statement opening statement* ti annan rezondet akoz sa *Scheme* ti ganny ouver. Me solman letan in ariv *July, Zilyet 2020, in view of sityasyon COVID* nou'n vwar zis en *influx* lo sa program.

Nou kapab met diferan al prestasyon, akoz sa kantite dimoun in vin lo sa program en kantite en sel kou. E nou vwar *numbers* zis in monte, in monte, in monte.

Petet osi eski sa program in vin en program fasil, ki zis dimoun ti vin lo la, me solman zot pa'n fer gran zefor, kantmenm zot ti konnen poudir

sa i en program tanporer pou zot al dan en lanplwa permanan.

Nou vwar avek nou bann sirtou letan mon *meet* piblik Onorab, mon vwar i annan en kantite dimoun in zis vin konfortab lo sa *Scheme*. *So they stayed on it, and stayed on it, and stayed on it.*

So kantmenm Departman Lanplwa pe fer son mye, pe sey *council* zot pe dir ek zot poudir *you need to come off, it's like* zot pa'n pran kont. Mon ti ganny sans *weekend* pase ekout tou zot bann larepons *SONA for example*, zot tou dan lasal. Me mon ti tann en Onorab ti dir depi Novanm in konmans dir avek bann dimoun ki lo *URS*, in ler pou ou konmans bouze, rod en louvraz permanan.

URS i pa anmenn ou i en *allowance* li. I pa en saler i pa en louvraz permanan. So i pa anmenn ou gran *benefits* letan ou regarde. Eski i pou ganny bann *benefits* pansyon? Non i pa pou gannyen.

So dimoun ti devret realize poudir *that was a temporary measure* pou ed zot. Me dimoun in reste lo la *for* plizyer rezon. E nou'n vwar nou ganny en kantite *feedback from* dimoun ki mannyer *URS* program in ganny abize. In ganny abize dan diferan fason.

I parey konmsi ou ti pe *chase, you know?* I annan dimoun i annan son *own business*, me solman i pran *URS* kot nou, Gouvernman i peye me, solman li i pe *run* son *own* biznes lo Gouvernman. Sa i en fason.

Nou'n vwar dimoun i antre lo *URS* program, zot pa korpere e zot vin ler zot le, zot sorti ler zot le, e zot pa donner. *You know* so in vin en *complacency* ou kapab dir.

So dimoun ti devret realize pou *this was a temporary programme*, i en *relief programme*. *It wasn't a job employment*. E parey mon'n dir zot ganny *advise* lo la vreman boner. Zot konnen. Me solman *for some reason they became very complacent*.

So lo *allowance* si sa dimoun ti fer *half-day* i ti ganny R5800 e si sa dimoun ti fer *full day* i ti ganny li R7056. Mersi.

HON ROSIE BISTOQUET

Kestyon Minis, atraver ou Mr Speaker i pa'n reponn. Sa progresiv sa *review*. Eski in reste flat parey ziska la sa lannen?

MR SPEAKER

Mersi.

MINISTER **PATRICIA**
FRANCOURT

Wi i reste parey. Mersi.

MR SPEAKER

Mersi Onorab. Onorab Loizeau.

HON NORBERT LOIZEAU

Mersi Mr Speaker. Bonzour tou dimoun. Bonzour Minis ek ou delegasyon.

Premyerman Minis vi ki nou lo *URS* mon ti a kontan demann ou si kot zot Minister i annan en sistenm *monitoring* lo sa bann dimoun *URS*? Akoz i annan i ganny *URS* selman ou vwar zot pe travay lo bato ton. Sa enn.

E mon dezyenm kestyon Minis vi ki ou'n koz i annan anviron 5mil dimoun ankor dan detrwa mwan pou napa en lanplwa. Mon korek non?

Vi ki i annan serten atlet *high-level*, zot ti pe ganny en lapey or en *allowance*, be depi Zanvye la zot pe trouv zot san nanryen, mon anvi zis demande si zot enkli dan sa 5mil ki pou napa en lanplwa kot zot debout?

Andotmo mon anvi demande pou zot debout si zot pou kontinyen ganny sa *allowance*, akoz ler zot ti ganny *allowance* zot ti ganny demande pa rod en lanplwa akoz zot pe ganny sa.

Mon anvi demande si zot pou bezwen al rod en lanplwa aprezan?

E dernyen kestyon Mr Speaker, mon anvi demann Minis ti annan sa program *My First Job*, sa ti ariv ou pa ti la ou 2 profesyonnel obor ou mon krwar zot okouran sa. Zis donn nou en pe detay sa *Scheme* manner i ete, ki pe arive avek? Mersi.

MR SPEAKER

Mersi Onorab. Minis.

MINISTER PATRICIA FRANCOURT

Mersi Onorab pou ou kestyon. Manner mon konpran wi ti annan en *monitoring programme*, ki ti ganny met an plas, orizinalman ti bann *HR* kot sa bann dimoun ti pe travay. Me apre Departman Lanplwa in pran sa responsabilite pou fer *monitoring*, lo zot menm. Alors i annan sa *mechanism* an plas, ki zot ti *oversee*.

Ok, petet mon a zis donn en lenformasyon kefwaw mon pa ti'n donneren avan letan Onorab ti'n demann mwan avan eskiz mwan. Pou Fevriye sa *URS* i vin *half 3500* petet mon ti'n devret dir sa avek Onorab avan.

So in term of My First Job, nou annan zero *job seeker by* Desanm. So sa i bann *graduates* oubyen bann ki'n *come from professional centres*. E sa en *Scheme* ki'n vreman *impress* mwan dan en fason. Akoz Departman Lanplwa in travay son mye pou pas pou plas sa bann *graduates* menm ler bann sant *professional centres in a placement*.

So ti annan 617 partisipan *registered*, 352 *employed*, 103 lo *internship*, larestan i zis donn bann laz ki zot ti tonm ladan.

Me *My First Job* sa *graduate* program i pou reste li, i pa pe ale, e sa ki vreman ankourazan nou'n met en *focus* lo la ki bann landrwa, bann sekter Gouvernman ki kapab enkorpor zot, sa i en priyorite. *They have the skills*. Lanplwa i annan en *database*, vreman fantastik kisisa ki zot in ganny *train* ladan, ki *expertise* ki zot degre ki zot bann *professional qualifications* ki zot in gannyen. E sa travay pe al vreman byen e vreman vit.

Sirtou letan nou regarde par egzanp Ledikasyon i annan en fason pozitiv ki zot pou servi bann partisipan *My First Job*. Nou konnen deza nou annan nou en kantite *teachers* etranze par egzanp dan pei. So bann *teachers* akoz nou bann

graduates ki deza ti pas dan sistenm Ledikasyon, avan ler zot ti al fer zot *degree*. *They taught*. Akoz nou pa kapab met zot fer par egzanp en *PGCE* program ki *short term, but they can actually going to teaching*.

So nou annan en travay fantastik avek Minister Ledikasyon. Ledikasyon i montre ki si sa bann *post* i kapab ganny enkorpor, *whether it is through the budget* oubyen en *better allowance why not keep them ?* Menm parey e mon konnen poudir Ledikasyon pe fer en gran louvraz lo la pe *meet* zot depi 2 ou 3 semenn pase pe *meet* ek zot tou.

Lasante i parey. Nou annan nou *database* ki montre kote ki zot in ganny zot *professional qualification*. Nou pe fer gran louvraz avek Lasante. *Why* nou annan *nurse* etranze dan pei. Nou annan bann diferan profesyon dan Lasante *expatriates, why can't we use our own in terms of My First Job Scheme*.

So lagrikiltir osi i parey. I annan bon lentere *again* akoz nou *database* i montre lekel zot sa bann zenn, kote zot leksperyans, zot *professionalism* i été ?

Lasante i enn, Ledikasyon i enn, *Fisheries* sorry. *Fisheries is the other one as well*. E bann

interviews, avek sa bann partisipan lo *My First Job* i vremen, vremen pozitiv.

Si ou pou kalkile en dimoun lo *My First Job* i ganny 8500 lo *internship* sorry. *Graduate* i ganny 8005. Yer nou fer zis en pti legzersis avek Ledikasyon, si zot ti pou enkorpor sa bann zenn lo en program par egzanp *PGCE* avek tou son bann *allowance*, ki pou gannyen avek en saler ki kapab fer zot i annan en *disparity* la *of at least* zot pou sorti lo sa zot kapab ariv R10mil avek zot bann *allowance* ki zot gannyen.

Be si mwan mon ti en *graduate* lo en *internship* program, akoz mon pa ti pou pran sa? So i annan bann zefor konmsi ki nou pe regarde dan en fason nou pe *scrutinize everything*. Sirtou letan nou pe regarde *in terms of expatriates* ki annan dan pei, *there will have all the skills available why not nurture that?* So sa program pe mars vremen byen. Mersi.

MR SPEAKER

Mersi, mersi Minis. Pa ankor fini Onorab? Wi.

HON NORBERT LOIZEAU

Mr Speaker, kestyonnen konsernan bann atlet *high level*

ki ti pe ganny sa *allowance* konman en lanplwa, ti form en lanplwa zot pa'n tous sa? Si oule mon redemande mon a redemann sa kestyon.

MINISTER PATRICIA
FRANCOURT

From what I understand i pou depan lo zot Bidze pou zot kapab enkorpor sa. Mersi Onorab.

MR SPEAKER

Mersi Onorab. Onorab Samynadin e Onorab Woodcock a swiv apre.

HON KELLY SAMYNADIN

Mersi Mr Speaker. Bonn apre midi tou bann koleg Onorab e Minis ek ou delegasyon.

Minis mon premye kestyon, mon ti ava kontan si ou eksplik nou en pe lo bann konstrent ki ou Minister pe fer fas avek, vizavi abolisyon program *URS* ;- setadir eski ou Departman pe ganny ase korporasyon avek bann dimoun ki lo sa program, pou ki zot kapab ganny ranplasman dan louvraz permanan?

E eski i annan sa *willingness* oubyen sa loptimizm, pou zot kapab arive dan en lanplwa? Apre mon ti ava kontan konnen *URS* ti sipoze en program tanporer

ant 6 a 12 mwan parey ou'n dir. Akoz ki ou krwar i annan sa fristrasyon de lapar sa bann dimoun ki lo sa programm depi lanons ki programm pou fermen?

Akoz i paret ki sa laspe tanporer in fini persi son *purpose*, ouswa in ganny oubliye. Mersi Mr Speaker.

MR SPEAKER

Mersi Onorab. Wi Minis.

MINISTER PATRICIA
FRANCOURT

Mersi Mr Speaker mersi Onorab. Ou konnen letan dimoun in konfortab lo en keksoz i difisil pou fer zot bouze. E sa i en keksoz ki zot ti'n devret mazin *longer term right?* I ti en *short term support*.

Pa tou ki in pare konmsi pou aksepte sa. E pa tou ki pare pou vwar loportinite. Akoz sa ki pe arive la pou annan loportinite, pou annan loportinite, *reskilling, training*, anmenn zot dan bann domenn ki kekfwazot menm zot, zot kapab vwar zot kontan oubyen zot ti napa *skill*. Nou tou mon krwar nou'n fer sa. Nou konmans ek en louvraz apre nou vwar nou nou *retrain* nou al dan en lot.

The fact ki nou pe *beef up*, nou pe *strengthen* nou *reskilling*

programme, mon krwar sa i e loportinite pou bann dimoun, realize be mon a ganny en sans mon ava rantre ladan. And I might diversify, akoz zot pe koz COVID diversification, you know. Be isn't that an opportunity?

Solman laplipar dimoun ki nou'n kapab *counsel* zot akoz i annan en *very good section* ki ofer *counselling*, nou vwar poudir zot pozitiv. E zot pe travay avek nou pou regard e ki mannyer nou kapab fer sa plasman e donn zot loportinite. Parey mon dir ou sa *profiling* la i pe mars vreman byen. Akoz *all we need is* en konponan ou *skills*, ou lenter e ou kalifikasyon ki ou annan. *That's all we need* pou nou kapab anmenn nou dan en lot laliny.

E laplipar zot, zot vreman pozitiv ladan. So i ankourazan. E bann ki *not so positive* i annan ankor *counselling* pou nou fer. Akoz nou rekonnet poudir i en moman enkyetan, i en moman difisil. E nou bezwen *compassionate* en pti pe osi, e *empower them at the same time*, pou zot vwar sa bann loportinite. *You know so it's getting people part of their comfort zone. So maybe in annan en complacency for a very longtime. I don't know.* Me

selman dimoun i bezwen konpran. Parey mon'n dir i pa sa syek la pou nou swazir ki nou pou fer. I sa syek pou regarde ki mannyer nou kapab met manze lo nou lata e, reste dan en louvraz.

E reste dan en louvraz i vreman enportan, akoz nou vwar bokou ki vini ki dir ou mon'n konmans en louvraz, 2 semenn en mwan i kite. Me *you can't do that*. Ou kite ki ou pou al fer? Akoz ou pa pou kapab nou moto i diferan la. Ou pou al kot Lanplwa avan apre ki ou pou al kot *Welfare*. So sanmenm sa ki nou *circular partou you will go to employment and employment will match you if you are able to work. So therefore* i dan ou lenter e.

So i vreman enportan pou dimoun konpran sa. Zot pou bezwen vin kot lanplwa. E nou ou ti pe demann mon korporasyon. Nou'n *fight very, very hard*, pou demann Minister Finans pou *strengthen* nou, *strengthen* nou *workforce*. E mon lendikasyon i montre poudir wi bann *post* ki nou demande zot rekonnet poudir sa i pou vreman enportan lespas pou nou travay osi nou'n ganny korporasyon lo la.

I annan bann *specific jobs* ki in *form* nou bann desizyon sa

osi nou vwar nou pe gannyen nou pe travay avek sektor prive. Mon kapab nonmen CCI enn ki *on Board 100%* avek nou. E zot pare pou zot vin regarde zot, zot rantre osi *sorry* ki mannyer zot, zot antre pou kapab ed nou.

So mon vwar ki i ankourazan mon pa vwar konmsi Lanplwa Departman Lanplwa pe travay li tousel. Mon vwar nou, nou pe travay avek en kantite *partners* ek *stakeholders*.

E nou *cross-cutting*. Nou nou *cross-cutting* dan tou sektor. So sa korporasyon mon satisfè ki nou pe gannyen. E mwan mon *believe* poudir si nou annan bann *staff* e bann *staff* ki *committed, after all* nou *job* se met dimoun dan lanplwa.

So si nou kontinyen ganny sa korporasyon avek sa pozitivite e mwan mon en dimoun ki pa arete toultan mon pa ganny sa ki mon demande, mon pa arete. So mon krwar nou pe fer *good job in doing that. Thank you.*

MR SPEAKER

Mersi Minis. Onorab Woodcock.

MR SPEAKER

Mersi Minis. Onorab Woodcock.

HON WAVEL WOODCOCK

Mersi Mr Speaker. Bonn apre midi Minis ek ou delegasyon. Mon kestyon i kot i konsern bann *returned graduates* ki lo URS e kot i konsern lanplwa pou Seselwa dan Gouvernman.

Annefe mon'n apresye *statement* ki Prezidan ti fer kot i konsern bann *returned graduates*, anvi sityasyon ki nou pe fer fas avek. Kot bokou bann *returned graduates*, pe war li difisil kekfwa pou antre dan en domenn ki zot in *train*, spesyaliz ladan.

Me *statement* ki Prezidan in fer, ki *Vice Chancellor* osi in ekout lo la se ki pou organiz bann program, bann kour pou ede *retrain* ouswa *reskill* sa bann profesyonnel, sa bann *graduates* pou zot antre dan lekol. Akoz i annan en kantite *teachers* etranze, dan lekol e ki pe fer ki larzan pe kit Sesel.

Alor mon kestyon *is*, parey sa bann program ki mon'n tann *Vice Chancellor* koz lo la, e Prezidan in koz lo la.

Eski zot anvizaze lefitir organiz bann *training* osi, pou *reskill* nou bann *returned graduates* kekfwa zot kapab pran lanplwa dan bann lezot sektor, dan bann diferan Minister Gouvernman pou

ranplas bann etranze ki dan sa bann pozisyon?

E dezyenmman, dan lepase si ou pe gete lanfaz in ganny plizoumwenn mete lo bann dimoun ki lo *GOP*. Be pa bann ki lo *exemption* ki travay dan Gouvernman. I annan en kantite etranze ki travay dan Gouvernman non selman, dan *teaching* me dan bann lezot departman, Minister.

Alor, mon kestyon i, eski e la mon pe koz sirtou pou bann dimoun ki dan pozisyon teknik, bann pozisyon spesyalize, ki kekfwa ou pa pou ganny neserman tou sa bann pozisyon pou ganny Seselwa pou okip sa bann pozisyon.

E mon kestyon i eski Gouvernman in fer, ouswa pe konsider fer en odit, bann travayer etranze dan sekter piblik dan Gouvernman?

Akoz mon santi la poudir i annan en nesosite pour nou get, dan lentere nou pep. Annefe pa zis Seselwa, vi ki nou pe koz Sesel i pou tou son zanfan. Nou annan, osi anvi sityasyon pandemik global i annan en ta Seselwa aletranze ki'n spesyalize dan bann diferan domenn.

Zot bann teknisyen, zot bann profesyonnel ki kekfwa nou kapab get dan lefitir pou

ranplas sa bann etranze ki la avek bann Seselwa.

Annou dir dan prosen 1an, 2an bann *exemption* ki pou *expire*, kekfwa nou kapab konsider en fason pou *advertise*, sa bann pos enternasyonalman.

Swa lo *website Foreign Affairs*, swa menm pou rod bann Seselwa isi pou ranplas sa bann etranze dan sa bann pos *technical* Sesel. Mersi.

MR SPEAKER

Mersi Onorab. Wi Minis.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Mon kontan ki'n ou'n met sa *emphasis* lo *retraining and skilling, in other sectors as well*. Sa i vreman enportan. E mon krwar semenn pase ki nou'n asize, nou'n komans regard sa.

Lalis ki nou gannyen i montre poudir nou bann *areas* ki nou bann dimoun i annan i *vast*. I pa zis dan *particular skills*.

Mon'n nonm zis en pe me selman i *vast*. Nou annan dimoun ki pe annan, ki pa dan lanplwa ki pe annan *skills* dan Lalwa, ki pe annan *skills* dan *dentistry*, ki pe annan *skills all over*.

So la en fason pou nou montre poudir kot nou war *the skills* i ete i pa pou difisil pou nou kapab plas sa bann dimoun.

Nou pe travay vreman *close* avek *DPA* pou nou war osi, petet avek bann *restructuring* ki pe arive, kote dan bann Minister i kapab annan bann plas ki nou kapab enkorpor nou dimoun.

I annan mouvman ki pe arive, *so where do we use them* efektivman. E sirtou kot nou konnen i annan etranze, *is to be able to replace them with our own*.

Sa i nou *mandate*, pou nou fer sa *localization of post is very, very high*. So nou pou annan en louvraz ki nou pe fer avek *DPA*, *PEMC* lo la pou nou regarde ki bor nou kapab plas nou bann dimoun.

Mon ti koz lo la yer, nou ti *identify* ki ti annan 8 *graduates* par egzanp *with a Degree on URS*, zot osi zot pou ganny ankouraze pou zot ranplas bann dimoun ki *hold* en *GOP*.

Ou konnen sa legzersis ki nou'n fer la, nou'n komans depi byen boner. *It's as if* konmsi nou ti pe *anticipate* kote bann *gaps* pou ete e ki bor dan nou program *localization* nou pou kapab *match* dimoun.

Se en legzersis ki nou komans byen boner pou nou kapab realize, oli nou bann *expertise*, oli nou bann *skills*, oli nou bann *own* dimoun pou nou donn sa preferans.

E nou war anmezir ki nou fer i annan bokou landrwa ki nou kapab *put our own*. E mon kontan poudir *DPA* pe travay *very close* ek nou e nou pou kontinyen travay avek zot osi pou nou regarde ki bor nou kapab plas dimoun.

Ou dezyenm kestyon. Mon krwar mon reponn. Mon'n reponn. Mersi Onorab.

MR SPEAKER

Mersi Minis. Onorab Lemiel.

HON SYLVANNE LEMIEL

Mersi Mr Speaker. Bonn apre midi Minis avek ou delegasyon. Minis mon kestyon i se ki mon ti ava kontan konnen petet tou sa bann dimoun ki ou pe dir nou donn nou en lalis, ou'n donn nou en sonm 3,500 *GOP* ki pou al *expire* ant Zanbye a Mars en.

Mon ti ava kontan konnen dan ki sekter, sa bann *GOP*? Pour ki nou kapab vwar, ki pou nou kapab konnen si petet sa bann dimoun ki lo *URS* li menm, wi ou pe fer zot *profiling*. Me eski zot pou kapab *fill in* sa bann post dan sa bann sekter?

Ki sa ban sekter ki ou annan, ki sa bann *GOP holder* pe *hold*?

Aprè sa dezyenm Minis, mon kontan letan ou'n nonm, sa sinerzi ki pe annan ant ou Minister avek bann lezot lazans e bann lezot Minister, ki definitivman zot bezwen travay ansanm, pou nou rod fason pou nou soulaz sa bann dimoun ki lo *URS*.

Ki komansman mwan Mars, zot pou napa en saler. Zot pou napa manze lo latab. Dan sa sinerzi, ki ou dir ou pe gannnen avek bann lezot Minister Departman, mon kestyon i spesifikman lo, mwan prosen Fevriye, sa bann dimoun pou sorti lo sa *allowance 7500 whatever* ki zot ti pe gannnen, zot pou desann *by half*. Dan sa legzersis ki zot pe koz ansanm, eski i annan en laranzman, akoz mazine Minis mazorite sa bann dimoun zot bann merd fanmir e bann perd fanmir.

E mazorite zot i annan bokou zanfan, zot napa zis enn zot. Zot annan *loan*. Ki bann laranzman ki pe ganny fer petet pou zwenn, zot sa bann dimoun ki pe al ganny afekte dan en lot fason?

Ki bann koze ki pe annan ant ou Minister ou pe koup mon saler par lanmwatye, ki bann laranzman ki ou Minister avek

Lazans Proteksyon Sosyal pou fer pou soulaz sa bann dimoun?

E osi an menm tan petet Mr Speaker, letan mon pe demann Minis sa bann kestyon, mwan mon distrik i enn ki annan en bon pe, bann dimoun ki lo *URS*. Mon ti pou kontan profit sa lokazyon pou mwan dir zot, profite sezi sa loportinite pou zot pran sa bann lanplwa ki Minis pe dir nou pou al annan.

E mon konnen i annan bokou zot ki'n lekol, zot in *train*, zot in *train* dan en domenn. Me selman zot in war zot *end up* dan *URS*.

Me selman mon panse Minis, atraver sa bann *profiling*, atraver sa bann travay ki ou pe fer, *please* annou fer li byen ki mazorite, sa bann dimoun li menm zot ava kapab vwar zot dan en lanplwa.

Parkont letan mon'n lo sa zafer lasistans la Minis en, i pa pou pran ozordi pou demen pou sa bann dimoun pour ou kapab met zot dan ne lanplwa. Mars i *phase out* en. Sa bann dimoun pe asize dan lakour, ou ankor pe fer *profiling* avek bann *staff*. *What happens* avek sa bann dimoun pandan sa letan la?

Eski i annan en laranzman osi ki'n ganny fer pou ziska meton ou met li dan en lanplwa Avril e pa zot tou le 1800. Ki arive pandan sa letan

la avek sa bann dimoun? Mersi Mr Speaker.

MR SPEAKER

Mersi Onorab, Minis.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Mon annan en detay lo bann sekter ki dimoun i kapab konsidere.

E tousala *like* mon'n dir *before*, nou ankor annan davans la. Nou konn davans, so dimoun anmezir plas ki annan nou fer lavertisman e nou met lo nou bann *boards*.

Dan konstriksyon nou konnen nou annan Zanvye 524 *post* ki pou arive. Dan bann *services*, savedir i kapab *any* sekter ki *provide* servis. So, *it could be travel agencies, it could be security*. Nou konnen pou dir an Zanvye nou annan nou 196 pos ki *available*.

So nou donn detay normalman lo nou, nou'n fek ganny sa *database by the way*, so nou met sa bann detay lo nou *website*.

Dan nou lotel nou konnen Zanvye nou annan 144. Dan *tourism* tou konnen nou annan 87 louvraz. Dan *Trade and Commerce* nou konnen nou annan 68.

Agriculture and Forestry nou konnen nou annan 28. Dan *fishing* nou annan 34. *Carers even*, nou annan 21. Dan restoran nou annan nou 14. Dan Ledikasyon nou annan 8. Dan *manufacturing* nou annan 6.

Ki fer zis pou Zanvye i annan 1130 pozisyon *available*. *Then*, nou ale dan Fevriye i montre ou poudir *numbers* i kapab reste parey, oubyen *increase*.

Mars osi nou war poudir i monte, Avril, May, *Juin* nou'n fer li en *focus* ... i realistik pou nou fer li 6 mwan, akoz nou *believe the real landscape out there*, i pa ankor tro montre son lekor. So nou bezwen regarde kwa ki *come up*. So nou annan sa bann post ki nou konnen davans *will be available*.

So pou bann sinerzi ki ou pe dir mwan nou travay avek, parey mon'n dir Departman Lanplwa Sosyal ek *Agency for Social Protection* tousala i tonm annan mwan Minister, menm Minister.

Mwan mon war sa koman i en gran lavantaz, akoz letan nou pe koze nou pe koz menm lavwa. Nou konnen poudir, nou pe pouse pou dimoun depi ler ti konnen poudir *URS is not going to happened. They need to come*

forward, e korpere zot, vini zot. Korpere avek nou pou war ki bor nou kapab ed zot.

Me parkont nou osi realize ki pou annan en group, ki kekfwa pa ankor ganny sa *secure employment*.

Lanmenm la ki nou'n dir poudir *Agency for Social Protection* i la, i annan so *social safety net aspect*, kot i bezwen evalye, regarde ki *efforts* sa dimoun pe fer *first to get employment*.

Nou'n fer li koman en *process*. So sa dimoun i vini i vin anrezistre. Nou konn li, nou komans ed li, pou li ganny en lanplwa. Dizon i pa gannyen nou bezwen annan en rikord. Sa i en fason pou nou anpes de keksoz ki zot ale, zot pa al *interview*, oubyen zot pa met en zefor. Apre zot tourn kot *agency* zot dir mon pa'n ganny louvraz, so nou bezwen kit *a close eye*.

So Departman Lanplwa i annan en fason ki nou *register* zot e nou *monitor*, kote zot in ale e aköz zot pa'n ganny louvraz. En lot keksoz ki nou pe fer vreman byen se menm *attempt* pou bann louvraz ki par lao dis ki ou a pe *register* avek nou.

Nou pe menm demann bann lakonpanyen pou nou *attend* sa *interview*. Pou nou vwar ki pe pase dan *interview*. Aköz bokou fwa nou poudir,

nou pou vwar bann *employers* ki pe vin pou rod 10 louvraz par lao, i pou prefer al lo *GOP*.

So nou prezans e mon kontan ki bann *employers* pe resevwar sa byen. Koman en *observer an employer officer can sit see*, aköz sa dimoun pa'n ganny sa *interview*. I en fason osi pou nou kapab ed li si i pe fer son *CV and so on* donn li sa *skill* pou li kapab al *interview*.

Be parey mon'n dir i annan sa *social safety net* ki toultan la. So, letan nou pou vwar poudir en dimoun in fer sa zefor. E i annan plas pou met li ladan, nou pa pou kapab. Sa dimoun pa pou kapab *selective* poudir, wi mon pou pran, wi mon pa pou pran. Ler ou pou bezwen pran ou pou bezwen pran.

Me *social safety net* i la pou toultan regarde sa dimoun in fer tou sa zefor, in al sepa konbyen *interviews* i pa'n gannyen. Servi nou kriter, regarde si i *merit for some assistance then the person is merited*. So nou servi nou prosedir. Me ki'n arive ki nou sistenm i pli *stringent*, i pa *easy*. Se sa ki nou pe fer. Mersi Onorab.

MR SPEAKER

Mersi Minis. Onorab Aglae.

HON EGBERT AGLAE

Mersi Mr Speaker, bonn apre midi Minis ek *PS* e ou delegasyon. Minis i annan en parol ou'n servi e mon kontan ou'n servi sa parol. Ler ou'n dir *the real landscape*, pa ankor montre son lekor.

Minis mon konsernen mwan premyerman, petet mon ava demann zot ki zot pou fer ler sa realite i montre son lekor. *Ok?* An Mars nou pou annan sa *URS* ki pou ganny *phase out* net *ok*.

E nou pou annan *FA4GR* osi ki pou *phase out*, net e ki pou anmenn avek li en bon pe nonm *redundancies*. E mon konnen *by now* la, ki ou Minister i pe resevwar bann laplikasyon pou *redundancy*. E nou deza annan dimoun ki ankor depi lannen pase ankor pe rod travay.

Alor Minis ki manner ou Minister mon pe dir pou prepar ou premyerman avek, sa *influx of redundancy* ki pou ou pou war pe arive, fas a sa bann sityasyon ki pou arive an Mars, premyerman?

E eski ou Minister li menm li premyerman in pare an term pou donn bann gidans, aköz la ater i annan bann dimoun pa konnen kot pou ale. Depi lannen pase zot napa en

lanplwa, e ler zot pe *call* isi, *call* laba lot in dir, lot, lot i dir zot.

Eski i pa nesesez atraver petet ladministrasyon bann distrik, annan en *proper guideline, procedure* ki kapab gid, sa bann dimoun ki *à la recherche* en lanplwa?

E mon lot kestyon, i konsern *GOP holders* Minis. Eski dan sa sonm ki ou'n nonm nou, konbyen ladan, aköz i annan bann *localization program* ki ti an plas. Konbyen ladan ki ou kapab dir Seselwa i kapab *secure as part of the localization program* ki deza egziste?

E eski ou Minister pe met lipye ater ek sa bann departman pou fer sir ki zot onor zot bann langazman anver sa bann *localization program*? Mersi.

MR SPEAKER

Mersi Onorab Aglae. Mon remarke ou'n al en pe dan *redundancies* ki kestyon apre. Evite tro al dan sa size aköz ou pou bar kestyon Onorab Gill, Minis, ou ava *deal* avek sa manner ou kapab.

MINISTER PATRICIA FRANCOURT

Mersi Mr Speaker. Mersi Onorab pour ou kestyon.

Ou konnen *landscape*, sa mo *inverted commas* ki pa ankor montre son lekor, i pa vedir ki i pou negativ li. Akoz nou pe montre poudir *there are jobs out there*. Nou pa konnen si pou annan *redundancies or not* ek sa bann mezir ki mon dir Gouvernman pe pran, *hopefully* Mars *with the vaccination program*. So, i annan bann *positive* eleman ki pe arive. So nou pa kapab *predict*, me selman nou kote lanplwa nou'n fer en *projection if the worse was to get to the worst*.

Me selman i pa vedir koumsa, akoz parey mon'n dir si dan de semenn, nou kapab ganny pres 700 *over* dimoun ki'n vini pe rod louvraz. In ganny louvraz e louvraz i ankor pe antre. Zot pou war tou le swar Departman Lanplwa pe met *advert* lo televizyon.

Lo zil i annan louvraz, e i ankourazan pou war kantite zenn ki'n *come forward*. Anba kot Lanplwa form i fini nou bezwen al fer *photocopying* pou redonnen. E mon krwar bann zenn in realize poudir *I'm single*, mon pa pe dir zenn, zenn me selman maybe *I'm single*, mon napa komikman, *i will go on the island and work, and save some money*.

I annan en kantite proze ki pe demare lo bann zil e mon

konnen pou annan ankor. E nou pran zis *IDC*, ti annan 353 louvraz, *two weeks ago* letan nou ti mete.

E dimoun in *turn up*. Nou war *IOT*, ti annan louvraz. *Club Med* ti annan louvraz. So, louvraz i la li, louvraz i la. So *it's the ability for people to say i need to work. I need to work and get into a job*.

E pou war kantite zenn dan sa sekter konmsi ki pe vini tou le bomaten, pe ranpli zot form, i ankourazan sa, i ankourazan. So nou napa en *crystal ball* poudir ki mannyer *landscape* pou ete. Me nou pe met nou pare *just in case*. E nou war nou pe fer bokou program pou *inform* dimoun *about benefits for example of working on the island*.

Mwan mon'n deza war en zenn garson lo en zil, i pe ganny li R10mil in travay laba 8 mwan, i dir mwan, "Mon'n *save almost R60mil, you know so*. I bann loportinite ki dimoun i bezwen war bokou pli lwen.

Gidans parey ou'n dir, nou'n fini komanse sa, savedir ler mon pe dir lo *district level this is what we've empowered*. Konmsi parey mon dir mon pa *believe* poudir zis lanplwa ki bezwen fer sa louvraz li tousel. Nou annan nou bann *ASP officers*, nou annan *social*

workers they have direct contact with the public.

Akoz zot pa kapab *part of zot counselling*, donn sa bann gidans e donn sa bann lenformasyon e donn sa bann *counselling*? Mon pa *believe* poudir ou fer sa, mwan mon fer sa. *So it needs to come together*, ki zot kapab travay ansanm pou ankouraz dimoun.

Akoz sa letan la i pe anmenn bann lensertitid, me ki manner nou *still* donn *hope* dimoun? Ki manner nou *raise* zot bann aspirasyon. Ki manner nou fer zot realize poudir, *there are jobs out there. But don't be selective to get in the jobs. When it's better, you will choose what to do. I annan reskilling opportunities, use them.*

So mon feel poudir, *if people do that* e nou antre ansanm, i pou vreman ankourazan. Nou konnen poudir apepre 50poursan, *can go into localization post. Sa i for sure looking at the database.*

E regarde, e i annan bann mezir ki nou pou anonse byento lo *the GOP framework*, ki pour montre zot sa lendikasyon ki manner nou an kontrol lo bann keksoz *GOP, but that will be announced later.*

Solman nou'n war sa *bigger picture* ki manner i vin

ansanm. *Club Med*, i lanmenm la *Sainte Anne* li, dimoun pa ni bezwen reste lo zil, *they can go and come back*, 344 louvraz.

IDC ankor la pe fer en lot program ek nou 109 louvraz. *So the jobs are there, people have to realize they need to take a job. So thank you Onorab. Mersi.*

MR SPEAKER

Mersi Minis, Onorab Waven William.

HON WAVEN WILLIAM

Mersi Mr Speaker. Bonn apre midi Minis avek ou lekip.

Minis parmi bann *challenges* ki ou annan, mon anvi demann ou par lefe ki dan lepase, i annan bann lazans prive lanplwa ki ti pe asiste Minister Lanplwa avek plasman ouswa rekrit bann travayer.

Par lefe ki nou *landscape* in sanze, e sa bann Lazans Lanplwa osi pou dan difikilte e mon konnen poudir i annan ki annan kapasite pou donn *reskilling program*. Eski ou Minister pe mazin servi zot?

E dezyenmman Minis, par lefe ki koze i fasil, me enplimante i annan bann diferan lenplikasyon ki vin avek.

Mon pe koz sirtou lo bann lakonpanyen ki annan bann

GOP holders. Minis ou ava dakor avek mwan ki dan Seksyon Lagrikiltir, konstriksyon, lotelri i bann landrwa ki nou ganny bokou difikilte pou kapab anploy Seselwa. Menm si ou pou ankouraze e mon mazine la ki keksoz i ava sanze

Me solman nou bezwen sitye nou plas sa bann dimoun ki dan domenn prodiktivite. Ki garanti, akoz sa bann dimoun zot pa dan laspe antre, wi zot pou sey konpran sityasyon pei me solman zot dan biznes, dan biznes i fer profi.

Me ki rekour zot pou annan demen bomaten e ki kalite dyalog ek garanti ou kapab donn zot poudir sa bann travayer ki la pe rod travay pou vremen onor zot kontra, e si demen bomaten zot bezwen fer ale sa bann dimoun.

Eski ou pou annan en *pool* dimoun ki pou vitman zot pou kapab ale ganny dimoun pou travay? Akoz parey ou konnen ozordi dan Sekter Lagrikiltir, lavant i en problem.

E si ou napa bann travayer osi ki vremen kalib pou kapab fer bann travay i pa fer i pa pou fer lavi sa bann dimoun fasil.

Mon dernyen kestyon Mr Speaker, mon ti ava kontan demann Minis. Par lefe ki ti

annan bann dimoun lo *URS* ki ti *apply* pou en *job* permanan, ki zot in kalifye.

Me solman zot in ganny dir poudir sa louvraz in ganny *freeze*. E mon anvi demann avek ou, ki garanti ki sa bann dimoun ki ti pou ganny selekte, ki anvi pran en *job* permanan. Akoz mon annan legzanp dan mon distrik, ki pou arive avek zot?

Eski zot pou ganny *preferential treatment* akoz zot in fini, mon kapab dir aksepte zot. Zis prezan zot in ganny dir be non napa larzan alors ou pa pou kapab ganny sa travay. Mersi.

MR SPEAKER

Mersi Onorab. Minis?

MINISTER PATRICIA FRANCOURT

Mersi Mr Speaker, mersi Onorab pou ou kestyon. Pou premye kestyon Onorab i annan kat *agencies* ki anrezistre avek nou, pou aktiv, aktiv. Trwa ladan i annan en kontra avek nou.

So when we say they have a contract, savedir zot ofer sa servis nou pey zot en *fee*. *It's a fee*. I annan enn ki pa'n siny kontra avek nou e mon pe demande *next week* pou mwan war sa enn e akoz kote nou ete.

Hopefully nou ava kapab war en solisyon lo la.

At this moment in time, mwan mon ankouraze si annan bann *agencies* ki le *come forward to be able to give us this helping hand.* Sa i en travay ki tou i bezwen kapab fer ansanm. So Departman Lanplwa i annan son bann kriter, son bann *expectation,* e son bann prosedir ki si i annan bann *agencies* ki *feel* poudir, *they can give us a helping hand, please come forward and help us in this industry.* E mwan mon ankouraz sa vremen byen. Akoz i pou ed nou en kantite. *In terms of post freeze. Priority* i ganny donnen avek sa kandida *subject to availability of funds you know.*

Mon ti pe koz avek, enn de bann leres Minis, *again* zot bezwen fer sa koman en priyorite si zot annan *the funds.* Me *in the event* ki sa *post* pa'n ganny *approved, then I think* it's nou *duty* dan Departman Lanplwa *to go as close as we can in the database to try and see where we can fit these people.*

So nou ti a kontan me selman si pa pe arive *we have to look at alternatives.* So mon ava dir zot pa dekouraze *in the event that it doesn't happened. Come back to us, ring us* e fer nou

konnen boner *so we will know very soon, right? When people will know.* E nou kapab vwar poudir *ok* ou ti oule sa ou pa'n ganny sa, *but what is the closest that we can do to match you in.*

Trwazyenm kestyon, *ok, yes,* wi. Mon kontan ou'n lev sa bout lo lagrikiltir. I annan pou GOP i annan domenn ki i annan bann konsiderasyon priyorite.

E lagrikiltir i enn, *fisheries,* i enn e lasante i en lot. Akoz sa nou konnen poudir dan sa bann domenn petet napa sa kalite *manpower,* resours oubyen menm ase pou fer sa bann sekter *productive and* donn rannman.

So, letan nou pe konsider GOP sa i bann *areas of priorities that we look at.*

E si parey nou dir avek bann *employers, tried the labour market locally* zot pa gannyen, *of course we consider, of course* akoz sa bann dimoun bezwen prodwir, zot bezwen travay *and so on.*

Me solman ki nou dir, sanmenm sa ki nou dir avek Seselwa, be ou pa pran loportinite, ou pa al dan sa bann laliny, demen letan ou war nou bezwen donn GOP pa kriye. Akoz la i la nou *dilemma,* nou donnen zot kriye, nou pa donnen zot kriye osi.

Right so, nou dir i bann, sa trwa i bann areas of priyorite ki nou bezwen konsidere for the benefit of the country. Thank you Onorab.

MR SPEAKER

Onorab Naddy Zialor.

HON NADDY ZIALOR

Mersi Mr Speaker. Bonn apre midi *panel*. Bonn apre midi Minis. Mon annan 3 pti kestyon avek en klarifikasyon. Enn se, Minister eski ou kapab dir nou dan lenstans kot par egzantp en dimoun i lo *URS*, e Minister in idantifye son *matching* pou en louvraz e i refize pran. Petet dir nou ki, *what's the way forward* lo kote Minister. E dan lenstans kot parey in dir sa mwan bann dimoun pou ganny *half payment of the allowance*.

Pou bann petet ki pa'n ganny parol ki zot pou ganny anploye, eski i annan posibilite petet pou landrwa travay donn zot sa loportinite pou zot al deor, petet travay *half day*, e larestan lot *half day be on the labour market* pou rod en louvraz.

Mon'n tann ou nonm bann dimoun ki pe viv avek en dezabilite e ki lo program. Petet ti a bon nou konnen konbyen zot ki annan e kwa ki

Minister pe fer pou zot *secure employment*.

E mon pa anvi rat sa sans pou mwan nonmen ki mon'n travay dan sa Departman pou 4an, e mon apresye ki mon aprann ki en *LMIS* pou ganny met an aplikasyon. Petet mon a sezi loportinite la pou kestyonnen. Parski tre souvan mon'n ganny servi koman en pwen referans *URS* isi dan sa Lasanble.

So eski dan letan kot mwan mon'n travay in annan okenn lensidan kot dokiman ofisyel in ganny donner avek okenn parti politik, ouswa kot mon menm mwan mon'n ganny dir poudir larzan *URS* in ganny pran? Mersi, Mr Speaker.

MR SPEAKER

Mersi. Minis. Minis *carry on please*.

MINISTER PATRICIA FRANCOURT

Mersi Mr Speaker. Mersi Onorab. Ou premye kestyon, si en dimoun i lo *URS* i vini, i refize pou li pran en lanplwa. Nou'n devlop en sistenm *link up with ASP* e sa i fantastik. So tou lede pou konnen sa dimoun ti pe rod louvraz, i lo nou *database*. *ASP* pou konnen si sa dimoun in ganny *employed*. I pou konnen osi si sa dimoun, nou pou

kapab *track*. I annan en *tracking system*.

Me si ou'n vin rod lanplwa e ou'n ganny ofer en lanplwa *and you decide not to take it*. *I'm sorry, Welfare* pa pou *entertain* ou. *Simple as*. Sa i koumsa.

So, nou fason ki nou pe *track this is very, very stringent*. E nou pa pou kapab osi anvoy dimoun isi, anvoy dimoun isi, anvoy dimoun laba. I pou vin dan landrwa kot Lanplwa, kot nou pou kapab vwar *straight away* kote sa dimoun in al *interview*, akoz i pa'n ganny louvraz. Nou pou kapab annan tou sa lenformasyon e lala kot sa labi petet lo ASP i ava ganny diminyen *a lot*.

E menm i annan bann program *reskilling*. So nou pou kapab vwar, evalye zefor ki sa dimoun pou fer. So ASP avek nou pou koz menm langaz. So *this is* petet i bon pou dimoun konnen.

Nou amann *disability around* 12. Nou annan 12. Mon *agree* avek ou si sa dimoun i aktivman i ape rod louvraz. *Working half day* i en keksoz ki nou kapab ankouraze. Akoz ou bezwen donn li sa letan pou li kapab ale al rod en lanplwa. E bann dimoun sirtou ki lo bann program, *they are aware of that*. So sa nou pou ankouraze.

En pti moman mon a get ou kestyon. Mon a pe pran ou katriyenm kestyon.

MR SPEAKER

Minis zis mon a dir pou poudir bann dernyen kestyon ki Onorab Zialor in demande i en pe personnel lo li, e i pa annan rapor avek kestyon ki lo *Order Paper*. Alors si ou santi poudir i difisil, zis les li pase ou a kapab reponn li personnelman apre. *Ok* mersi.

MINISTER PATRICIA FRANCOURT

Mersi Mr Speaker, mon pa ti a kontan *incriminate myself either*. *So thank you so much*.

MR SPEAKER

Ok, se sa. Bon mersi Minis. Nou pou pran en poz la. Mon annan 11 dimoun ki'n demann kestyon e i reste mwan 12 lo lalis. Ler nou retournen nou pou annan lot kestyon pou *deal* avek, mon pou donn en pti gin letan sa ki reste, me selman mon pe prevnir ki nou pa pou neserman ganny letan pou tou dimoun.

Sorry letan i koumsa. Letan pa en lestik ki mon kapab redi. Alors Minis mon a dir ou zot a zwenn nou apre nou poz e nou a kontinyen. Mersi.

MINISTER PATRICIA FRANCAULT

Mersi Mr Speaker.

MR SPEAKER

Nou pou re zwenn 4er.

(BREAK)

MR SPEAKER

Bon, vi ki annan telman demann, mon pou donn ankor 20 minit sa, lo sa keston e apre nou pou pas lo lot keston. E mon pou terminen 5er. Onorab Esparon.

HON REGINA ESPARON

Mersi Mr Speaker. Bonn apre midi Minis ek ou delegasyon. Mr Speaker dan lespri kree lanplwa pou bann dimoun ki pe perdi zot lanplwa lo *URS*, mon ti ava kontan demann Minis ki mekanizm ki an plas, pou asire ki bann anplwayer i donn priyorite Seselwa ler i pibliy en *notice* pou en *vacancy*?

Ki zot Polisi lo *change of position* sirtou pou bann dimoun pou bann *GOP holders*? Tar lannen pase Gouvernman ti met an plas en *embargo* lo nouvo *GOP*, eski i ankor an fors? Depi ki sa in antre an viger, eski annan okenn nouvo *GOP*, ki'n ganny donner e si wi,

konbyen e dan ki pozisyon? Mersi Mr Speaker.

MR SPEAKER

Mersi Onorab Minis.

MINISTER PATRICIA FRANCAULT

Mersi Mr Speaker, mersi Onorab pou ou keston. Wi, dan nou *localization post*, i annan bann nouvo fason ki nou bezwen fer pour *ensure*, fer sir ki priyorite i ganny pour Seselwa.

E sa i *sit very well* avek nou *GOP framework*. Se sa ki mon ti pe koz *earlier*, lo la. *GOP framework* lannen pase ti *expire* 2020 Desanm. *Actually*, nou fek anmenn en papye kot *Cabinet* ozordi pou nou annan en *review* lo *GOP framework*.

Parey mon'n dir nou pou donn en pti pe plis lenformasyon lo la, *very soon*. Nou fer li dan en fason ki avan ler nou deside kot lanplwa e menm *alongside Minister Internal Affairs* avan ler nou deside donn en *GOP*, nou'n bezwen satisfè 100poursan sa pos napa.

So i annan bann reform ki'n anmenn, ki parey mon dir, pou *tightened* sa *very, very well*. Be *again* nou lapel i si nou pe fer sa e nou pe *tighten*, nou Seselwa pa les nou tonbe. Pran

louvraz, travay akoz *if they don't*, sa dimoun i vini i dir ou son biznes i bezwen fonksyonnen oubyen i pou *collapse*, nou annan en *duty* osi avek li koman *employer* pou e fer sir ki son biznes i marse.

Se sa ki nou dir bann mezir i vremen *strict*. Enn bann mezir ki nou'n pran ti annan sa bout ki dimoun i kapab zis vini dir nou *as a requirement Employment* pou dir ek li *advertise* ou louvraz e zot servi sa zot dir ou wi nou'n *advertise* pa'n ganny dimoun.

Ki mannyer nou ti *monitor* sa nou? Nou ti napa en fason ki nou ti pe *monitor*. Be la prezan *apard the fact* ki si ou'n *advertise*, ou'n met lo *Gazette*, ou'n met lo *website*, nou le ou pran sa louvraz ou vin anmenn kot nou lanplwa.

So, *all jobs available have to be send to us so that we have an overview*, lo bann louvraz ki annan. So sa mon war poudir i en fason pou nou kapab *tighten keksoz*, *the extra miles* ki nou'n dir osi.

Dimoun i al *interview*, nou pa konnen pou ki rezon annan de fwa sa dimoun pa ganny sa louvraz, i kapab *employ I don't know*, i kapab zis sa dimoun nou ganny dimoun ki dir bann *employers* ki dir be in vini in vin an retar. I pa ni konnen si i anvi

sa louvraz, si i pa anvi sa louvraz. Nou pe fer sir ki nou *tighten* tousala.

So *responsabilite i still again lo employees*, pou fer sir poudir zot pran *responsabilite*. Si nou pe fer sir nou pe met tou keksoz an plas, nou pe met *mechanism* an plas, zot bezwen *respond to that*.

Demen zot pa pou kapab dir poudir nou pa pe donn Seselwa louvraz. So nou dir, nou fason ki nou pe *create* sa *framework* Onorab, i pou *tie-in very much* avek fason ki nou *revise GOP framework will work and like I say we will give more details on that*. Mersi.

MR SPEAKER

Mersi Minis. Onorab Cosgrow

HON WALLACE COSGROW

Mersi Mr Speaker, bonn apre midi Minis. Bonn apre midi tou Manm ou delegasyon. Minis, ou'n dir ki ler *URS* ti ganny formile *or* ti ganny kree an 2017, i ti ganny kree avek bi pou met dimoun lo lanplwa tanporer. Ou ava realize Minis ki sa letan nou ti dan en letan normal.

Ozordi Minis letan i pa normal biznes i *down* e pe sirviv lo *Government financial bailout*. Ki dabor nou'n osi aprann ki pou al koupe an Mars.

Ou'n dir nou osi Minis ki annan apepre 5000 *plus* dimoun ki pou al *job seek* tre byento. Sa i plis ki zanmen in deza annan komansman lannen. I *unprecedented* parey nou dir an Angle.

Ou'n osi dir Minis ki i annan apepre 1113 *vacancies* ki pou *available* e posibilite i kapab annan ankor ki *available* e pandan lannen.

La mon pe mazin bann dimoun ki sorti lo *SETS*, bann diferan mekanizm ki ganny met an plas. Ki mannyer ou garanti Minis ek en lekonomi ki *down*, ki tou sa bann dimoun, *or at least* mazorite sa bann dimoun i kapab ganny en lanplwa pandan sa bann letan?

Minis eski ou kapab demann avek Gouvernman, anvi ki sa ki mon fek dir, ki dan plas koup *URS* an Fevriye, ki zot fer li gradyelman. E parey ou'n dir zot pe get *landscape* lekonomi. E zot panse ou'n dir ki napa en *crystal ball*, me zot panse ki i ava kapab amelyore, akoz ki zot pa *phase out URS*, en pti pe lo en plan petet *medium term*?

Kot nou ava kapab donn bann dimoun ki lo en sa bann program, sa bann *Scheme* en lespwar ki zot ava kapab ganny en bouse manze pou amenn kot zot?

Minis krwar mwan, deor i annan en kantite lafreyer avek en kantite lensertitid baze lo bann lanons ki'n ganny fer.

Minis osi eski ou kapab dir nou ki bann diferan kalifikasyon, bann dimoun ki lo *URS* ek bann lezot *Scheme* zot annan aktyelman?

Eski zot in fer legzersis pou gete si sa bann *skills* ki zot annan i *match* ek bann lanplwa ki *available*? Akoz souvandfwa nou'n tann bann anplwayer dir, ki poudir zot anvi pran dimoun me solman *skills* ki sa bann dimoun i annan i pa *match*.

E en Onorab lot kote in dir ki zot *run* zot biznes, pou fer profi. Eski sa bann dimoun pou ganny forse pou pran dimoun, zis *for the sake of clear employment statistic*, ouswa pou annan serten legzersis byen konkret ki pou ganny fer, pou fer sir ki bann dimoun ki ganny plase i *meet* bann *skills*, bann *requirements* ki annan lo *market*? Mersi bokou Minis.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker, mersi Onorab pou ou kestyon. Mon krwar dan mon *opening statement* mon ti koz lo *URS*, e

the purpose of URS akoz i ti ganny established. So i ti annan en, en rezon and then we find out in al bokou pli gran ki sa.

Wi, letan mon'n dir avek *inverted commas* i pa normal. Me selman mon krwar depi ler mon pe koze la, mon pe montre *at the end of the day there are jobs at the moment, in terms of* ki nou bann statistik pe dir nou.

Mon pa pe zis *pick up* sa ki mon pe dir, *from the top of my head*. So i annan levidans ki *there are jobs available at the moment*. So again mon fer en lapel. *It's up to people coming forward*, pa swazir louvraz. *We will give you a job that will put food on your table, take it.*

Ziska ler in ler ou kapab swazir ou louvraz. So kantmenm nou dan sa letan ki pa fasil, mon laprev pe montre poudir nou annan louvraz e mon donn sa bann legzanp *earlier. So that's the first one.*

Mon'n koz lo akoz URS pa soutenab *financially* pou Gouvernman. E mon'n dir si nou ti *anticipate* pour kontinyen pey URS konbyen i ti pou koute. I pa fezab, napa vedir napa.

So i pa fezab pou nou kapab fer sa, se sa ki nou'n entansifye bokou zefor *to make sure that people get a salary. So*

mwan mon krwar i enportan nou tou pou nou kapab ankouraz dimoun pou met sa zefor. Pa zis *you know URS was a Scheme, it was a Scheme that was not going to last so*, nou pe koz lo la *every time, every time, every time.*

So pran responsabilite pou realize poudir *don't just sit back*, nou pe dir i annan louvraz, i annan louvraz pou nou dimoun. *So step up and take a job.*

E si bann dimoun depi ler nou'n fer sa lanons, ki en bon pe fer *by the way* - pa krwar poudir laplipar dimoun pe asize pe dir URS pe al fini.

I annan en kantite pe debrouye *and they are coming forward and they will find themselves in a job, very soon.*

So zot in fini realize zot, petet 3500 i pa pou soutenir mwan. E dan Sesel nou annan loportinite pou annan louvraz dan diferan fason. En dimoun i konnen i pou ganny R3500. Kote ki mon kapab *top up* pou mwan kapab ganny en lot louvraz par egzanp, mon a fer *ends meet?* Annou arete sa sistenm ki zis nou asize, *sit back and then we depend, somebody will come and spoon-feed us.*

Sanmenm sa ki nou dir, Departman Lanplwa i la i pe ed

ou, be ou ki ou pe fer ou? Ou pou asize ou pou dir *URS* pe al fini oubyen ou pou ganny 3500 an Mars ki mon pou fer? Non! Ou bezwen leve *the rest of the world is worse off than us*, sa nou bezwen mazine.

I annan en kantite landrwa ki napa louvraz, *but* dapre nou statistik ki nou pe montre *from what I've said earlier*, i montre poudir nou annan louvraz.

So again i pa *sustainable* pou Gouvernman kontinyen avek sa program. Nou'n war sa *huge disparity between what it would have been*.

Qualifications, wi mon'n dir, nou'n fer nou *database* nou annan, tou nou bann dimoun ki *job seekers, they are now call job seekers*, ki *levels* zot ladan, mon kapab dir ou pou dir bann manrmay ki lo *skill development for example*, zot napa *qualification*, nou annan 27. (Pos-segonder) nou annan 354, *sorry URS*. Pos-segonder nou annan 354.

E nou kapab *even go into secondary*, 370. *So* nou annan tou nou statistik ki nou'n byen fer pou regarde, *female or male*. *So* nou al dan tou nou statistik, pou nou regarde e *match* ki manner sa bann *qualifications and skills* i *match* avek nou *database*.

So si ou war nou pe fer sa legzersis, in pran nou letan pou nou fer li, mon krwar nou pou ganny li byen. Se sa ki nou pe dir, *so I think* tou sa si i vin byen ansanm e dimoun i ekoute sa lanons ki nou pe fer, nou pa pe dir napa louvraz ditou. Lendikasyon i montre poudir i annan louvraz.

Akoz osi nou kontinyen dir sa? Akoz *GOP* i kontinyen ganny demande si napa louvraz? *It's on the increase, why?*

So where are the jobs, me nou, nou pe dir, *we have the jobs, we will offer a job, or place you in a job*. Mersi.

MR SPEAKER

Mersi Minis. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Premye pwen Mr Speaker mon ti ava kontan ki Minis, i zistifye lakantite dimoun ki lo *URS* dan sekter piblik. Si mon sif i byen, 1605? -1505. 1505 so, pou zistifye sa, akoz krwar mwan si *civil service* i bezwen travayer, i bezwen koz ek *DPA* kree sa pozisyon, anploy dimoun. *End of story*.

URS, li i merit pou sekter prive ki *train* sa dimoun apre sis

mwan i pran li. So zistifye sa kantite mon premye pwen.

Dezyenm pwen Mr Speaker, mon'n en pe dezapwente avek *the whole exercise this afternoon*, akoz as *law makers* mon pe demann mon lekor konbyen nou ki'n lir *Unemployment Relief Scheme Act 2012*.

I kler, *what the Government is doing is nothing illegal*. URS i kler, *the Scheme is very, very clear* e mon krwar mwan i en, (*what's the word mon pe rode*)? Konmsi mon krwar *the previous administration* ki'n dezapwent dimoun.

They should have known the Scheme is for six months e apre ou bezwen sorti, son larzan i bezwen ganny byen *budget*. Oditer Zeneral fer odit ladan.

I bezwen annan bann programm spesifik, ou pa zis met dimoun nenport ki landrwa, i ti kapab annan en *Scheme*, en proze par egzanp ki dir ou pou bann dimoun ki travay lo laferm, dan *IOT*, spesifik. *Not just anywhere*, nou anvoy dimoun lo URS.

So mon krwar *it's the previous administration ki'n totally*, brouy sa zafer URS and zot al kont zot prop Lalwa ki zot menm zot ti fer an 2012.

E aprezan leko kase, *the question is just making politics* pou fer krwar poudir sa nouvo Gouvernman pe met telman dimoun a laport, *when the law is clear*, ki mannyer URS i marse. Mersi.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Mersi Onorab. Nou annan nou 1505 *in government section*. Difikilte ki nou gannyen annan de fwa se pou plas dimoun dan *private sector*. E sa nou'n realize i plito, *more so* letan *the health restrictions are in place*.

Be i pa vedir ki nou pa pe seye e nou pa pe met bokou zefor. So en gran travay pe fer lo la, pou nou kapab *go ahead in that*. Mon agree avek ou Onorab, poudir *the purpose of URS has been misused, it's been misused big time*.

E menm bann dimoun ki lo URS menm mon krwar i realize. Akoz? Ou konnen bann *benefits* pou en dimoun antre dan en louvraz permanan i vreman, vreman bokou.

I en bann keksoz ki nou bezwen konsidere. Akoz i enportan? Nou'n dir bann *benefits* ki i kapab anmennen

pou ou, ou konnen pou dir sa program i tanporer, ou bezwen fer en zefor *as part of* ou own aspirasyon, pou konnen pou dir *I need to get in a permanent job and climb up the ladder, start earning and also be productive.*

I en devlopman personnel sa ki arive pou ou. Be si ou pou zis reste lo *URS, URS, URS*, kote sa *career development* i pe ale? So i annan bann fason ki si zot ti, dimoun i lo *URS* zot ti kapab devlop zot bann *skills*. As a preparasyon, pou zot antre dan en lot laliny kekfwa ki zot *field*. *It's ok*, en kantite nou la in sanz laliny travay *you know*. So *that would have been another step* pour zot kapab bouze.

Dan *URS* again nou'n war dimoun pa'n fer en zefor, zot in *very complacent, happy to just earn whatever the amount was*. E ou reste lo lanmenm. Kote i pou anmenn ou?

Ozordi letan ou pe *get the state of* ki dimoun i depanse, sa larzan *is not much*. So again ti loportinite pou zot kapab bouz zot. E mwan mon krwar poudir en dimoun si i le devlope, i le *take ownership*, i le *empower* son lekor, *all this time* letan zot ti annan sa koman en *safety net*, *they should have gone down that line*.

So whether i ti zis favorab, *easy for them to be just where*

they were being complacent, ozordi zot pe war poudir *when it's hard and it's tough*, i pou pous ou plis pou kapab bouze.

So the objective of it, parey ou dir, *has been lost*. E ozordi mon kontan poudir osi poudir i annan en bon pe dimoun in war sa koman en loportinite e in bouz zot en pe.

Akoz letan dimoun pou realize pou dir 3500 *is not going to get me through*, Lanplwa pe dir ou vin anrezistre ek lanplwa pou ou ganny en louvraz avan ou al kot *Welfare*. Nou pou bezwen tir dimoun dan zot *comfort zone*. *And maybe this is what need to happened*, fanmir zot bezwen *step up* ed kanmarad.

Wi, i annan dimoun pa pou kapab ganny louvraz deswit. Be lala kot nou pe fer en lapel avek bann kominote fanmir, *how do we sustain each other?* Ki mannyer nou ed kanmarad, ki mannyer nou siport kanmarad? Mon ti annan en rapor Sosyal ti donn mwan ki mon ti pe regarde *during the week*.

I pa montre poudir *most people* ki pe vin kot en *social worker for example* i pe koz lo, *financially* i annan en *deprivation* la. Sa portre ki pe montre mwan pe ariv zis bann labi, konfli dan lakour, en

fanmir i kapab en pti moman zot byen ek kanmarad, i ganny en diskisyon “sorti se mwan al lo *street!*” Ou *homeless and then you have no food.*

So, sa bann kondisyon familyal i vreman enportan pou nou *consolidate* lo la. Annou annan sa lespri siport kanmarad, ed kanmarad ankor. Akoz *we will need it, to make it work.*

E mon lapel annou pa fer, bann difikilte ek konfli vin en baryer pou ed, swa manm fanmir devlope e avans pli devan. Nou kwi en lasyet manze, si nou bezwen donn en dimoun ki napa dan nou fanmir en kar sa manze, *this is what we used to do.*

E mon kontan dir ki nou annan bann *partners* osi ki travay avek nou kot Sosyal. *Red Cross* i enn *for example*, ki nou ganny en kantite led avek zot, *to provide* koman en *food bank*, *you know? So there are, places where people are stepping up and said.* Mon annan en lobligasyon *to support, during this very difficult time.* Sa letan i pa letan normal parey nou dir.

What are we as the population of Seychelles doing? Oli nou bann valer, oli nou bann prensip? Pa zis koze, met li an pratik. Mersi Onorab.

MR SPEAKER

Mersi Minis. Nou ava pas lo kestyon Onorab Gill. Onorab Gill.

HON CHURCHILL GILL

Mersi Mr Speaker. Bonn apre Minis ek son delegasyon. Kestyon i lir koumsa; eski Minis i kapab dir ek sa Lasanble konbyen laplikasyon *redundancy* zot in resevwar;-

i) Konbyen ki'n ganny aprouve e dan ki sekter zot sorti?

ii) Konbyen ki pa ankor ganny aprouve e dan ki sekter zot sorti?

MR SPEAKER

Mersi Onorab. Eskiz mwan mon a retourn lo en pti pwen point of order, mon krwar nou ti'n devret annan en sanzman bann zofisye ki pou avek nou – Ms Letimie Dookley kite *and enter* Steve Monnaie Direkter Zeneral pou *Labour Relations* pou pran son plas. Yes Onorab?

HON SEBASTIEN PILLAY

Yes, Mr Speaker, nou'n fini *move* lo kestyon Onorab Gill?

MR SPEAKER

Wi.

HON SEBASTIEN PILLAY

Akoz mon ti'n lev mon lanmen pou demann ou pou mon ganny sans pou klarifye en dernyen pwen avek Minis.

MR SPEAKER

Onorab ou ti'n ganny en kantite loportinite pou ou klarifye tou ou pwen dan konmansman.

HON SEBASTIEN PILLAY

Non, Mr Speaker mon krwar ...

MR SPEAKER

Permet mwan, mon realize ou annan en privez koman *Leader* Lopozisyon. Me selman permet mwan pou mwan bouz lo kestyon Onorab Gill aköz ler pe kit nou.

HON SEBASTIEN PILLAY

Non, be Mr Speaker aköz ti enportan aköz in annan serten *statement* ki Minis in fer, ki i enportan nou klarifye baze lo Bidze.

MR SPEAKER

Onorab Pillay eskiz mwan. Eskiz mwan, mon'n ariv lo kestyon Onorab Gill. Permet mwan pas son kestyon. Mon a regete a lafen si ou kapab klarifye en pwen.

HON SEBASTIEN PILLAY

Mon ti ava apresye a lafen si mon kapab klarifye en pwen Mr Speaker.

MR SPEAKER

Mersi. I vre, i zis annan bokou dimoun ki anvii demann kestyon e napa ase letan. Mersi. Onorab Gill in poz son kestyon? Minis eski ou'n *ok* pou reponn? Mersi.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Mr Speaker, Lalwa Lanplwa i fer provizyon pou en biznes kapab termin kontra en travayer ouswa en group travayer dan sirkonstans kot sa biznes pe sispann tanporerman loperasyon letan i pe aret loperasyon permanan. Letan i pe rekonstri loperasyon avek lobzektif pou *facilitate* en amelyorasyon ki pou permet plis lefikasite.

E osi letan anplwaye pe entrodwir nouvo teknolozi dan biznes. Ler i annan sa bann tel sirkonstans parey, en prosedir negosyasyon i ganny inisye. E anba sa prosedir anplwayer ek travayer i ganny envite dan en *meeting* konsiltasyon avek bi pou eksplor e tonm dakor lo en pli bon fason, pou redwir lefe ki

sa terminasyon i kapab annan lo sa travayer.

Dan sa prosedir *redundancy*, anplwayer i annan pa mwens ki 21 zour, avan ki anvizaze donn notis terminasyon okenn travayer pou li notife Departman Lanplwa lo son lentansyon pou termin kontra sa travayer oubyen sa group travayer. Ki pou al ganny fer afekte, ki pou ganny afekte eskiz mwan.

Sa notifikasyon i devret spesifye sa bann detay swivan;- Rezon pou terminasyon. Lakantite travayer ki pe ganny fer aret travay. Non, laz, *post*, dat komansman travay, e saler bann travayer. Si terminasyon in relye avek en aktivite dan en sekter spesifik dan biznes ouswa sa biznes an antye.

Kriter ki'n ganny servi pou selekte travayer ki pe ganny fer aret travay. Anplwaye i kapab ganny demande pou furni okenn lezot lenformasyon adisyonel. I selman apre ki Departman Lanplwa in resevwar notifikasyon e okenn lezot lenformasyon adisyonel, ki en notifikasyon pou *redundancy* i ganny anrezistre.

I enportan note a sa pwen ki kontrerman a sa ki arive dan serten lezot pei, departman Lanplwa i pa zis anrezistre *case redundancy*. Savedir ki pa zis

ganny met okouran ki i annan travayer ki'n ganny fer *redundant*.

Departman Lanplwa i annan en rol esansyel pou zwe dan sa prosedir. An dot mo, se li ki determinen si lanplwa en travayer pou ganny terminen. Sa se pou ki i annan proteksyon pou ki travayer pa zis ganny met deor mal apropo.

Mr Speaker, apre ki en aplikasyon in ganny anrezistre, pa pli tar ki 7 zour zofisye i envit bann parti konsernen pou konsiltasyon avek le bi pou eksplore e *agree* lo fason pou evit terminasyon ou redwir lefe ki kapab annan.

Konsiltasyon i ganny rikorde. Tou dokiman e levidans prodwir par bann parti i ganny kolekte. Apre sa zofisye i analiz sa *case*, an term rezon pou *redundancy*. Kriter ki'n ganny servi e fer en determinasyon o pli vit.

Pou lannen 2020, depi Zanvye ziska Desanm, nou ti annan 237 laplikasyon pou *redundancy*. In ganny anrezistre an total lo nou 3 zil kot Departman Lanplwa i annan en lofis. Sa i Mahe, Praslin, ek La Digue.

Sa ti koresponn avek en total 3101 travayer ki lotorizasyon in ganny demande pou fer zot *redundant*. 177

laplikasyon ti ganny aprouve, ki koresponn an total 2760 travayer. Ladan 1001 Seselwa ek 1759 etranze ki lotorizasyon ti donnen pou fer zot *redundant*.

En laplikasyon pa ti ganny aprouve akoz kriter ki anplwayer ti servi pou swazir travayer pou fer *redundant* pa ti valid. E sa biznes ti pe osi ganny lasistans *FA4JR*.

En laplikasyon ti ganny dismiss akoz sa terminasyon pa ti sipoze pas atraver prosedir *redundancy*. 10 laplikasyon i ankor dan prosesis legal, ki vedir i annan serten kominikasyon ant anplwayer ek Departman Lanplwa ki *ongoing*.

E 48 laplikasyon in ganny retire par anplwayer pou plizyer rezon. Tel ki sa biznes in ganny nouvo kontra pou kontinyen ofer son servis.

Mr Speaker, an term bann lendistri ki Departman Lanplwa in resevwar laplikasyon pou fer *redundant* travayer. Sa i varye. Me lendistri pli dominan se *Tourism*, ki kouver Sekter Akomodasyon ek Restoran. Swivi par Ladministrasyon e Servis, ki kouver bann Lakonpanyen Sekirite, Netwayaz, e Lazans Vwayaz.

Pou note ki dan sa 237 laplikasyon sorti kot anplwayer, enn ladan ki ti sorti kot en

biznes konstriksyon ti annan an tou 1228 travayer. 71 Seselwa e 1157 etranze. E son rezon pou *redundancy* pa ti relye avek sityasyon *COVID-19*.

Tou sa bann travayer in fini ganny abzorbe dan en lot biznes pou sa menm anplwayer. Pou Zanyer 2021 Departman Lanplwa in resevwar 6 laplikasyon pou fer travayer *redundant*. Ladan 3 ti lo Praslin, 1 lo La Digue, e 2 lo Mahe. An total sa 6 laplikasyon pou afekte 20 travayer Seselwa ek 13 travayer etranze. E tousala i dan domenn *Tourism*.

Mr Speaker, an term lasistans pou sa kategori travayer ki ganny afekte avek *redundancy*, parey nou tou nou okouran program *SETS* ti ganny ti ganny etabli lannen pase avek lobzektif pou asiste tou travayer ki ganny fer *redundant* an relasyon avek lenpak *COVID-19* lo biznes.

Lenformasyon resevwar sorti kot Biro *SETS* i montre ki an total 663 dimoun in anrezistre e siny en kontra ek *SETS*. 382 ladan in ganny plase dan en landrwa travay tanporer. 153 i ankor pe esper en plasman. E 128 dimoun in fini sorti lo sa program e in ganny en lanplwa permanan.

Apartir le 01 Mars program *SETS* pou nepli an

egzistans. E alor tou travayer ki ganny fer *redundant* pou aprezan ganny lasistans avek Departman Lanplwa, pou zot kapab ganny en lot louvraz baze lo zot *skill*. Oubyen ganny serten formasyon ki ava ed zot antre lo marse lanplwa.

Mr Speaker, parey mon'n mansyonnen o paravan, sa i pou posib lefe ki nou'n remarke ki demann pou travayer i bokou an se moman. Menm lo kote *GOP* parey mon'n dir ki pe ekspire sa lannen, Departman Lanplwa pe travay lo en plan pou ki tou dimoun ki enterese pou travay, e ki pe aktivman rod en travay i kapab ganny sa loportinite.

Parey mon'n fek mansyonnen, Departman Lanplwa in fini ganny detay sa 535 dimoun anrezistre lo program *SETS*, ki pa ankor ganny en lanplwa permanan. Apartir lafen sa semenn oubyen boner semen prosenn, nou pou kapab ganny lendikasyon dan sa 382 ki lo plasman tanporer.

Konbyen ki pou ganny lanplwa dan sa landrwa. Antretan, nou pe fer rantre lenformasyon lo sa 128 dimoun ki ankor pe esper plasman, pou nou *match* avek bann pozisyon *vacant* ki pou vini o fir e an mezir.

Parey Prezidan ti mansyonnen dan son sesyon reponn kekyon ek medya Lendi, i annan bokou travay ki pe ganny fer pou plas dimoun ki san en travay, dan en lanplwa. Legzersis pou ranplas travayer etranze par travayer Seselwa dan bann pozisyon ki posib pa pe zis fer avek sekter prive. Me osi avek sekter piblik.

Departman Lanplwa in komans diskisyon avek Minister Ledikasyon parey mon'n dir, e sa pou kontinyen avek lezot Departman Gouvernman ki anploy travayer etranze.

Mr Speaker, pou konklir mon oule asir sa Lasanble ki prosedir negosyasyon pou termin kontra sa bann travayer, in ganny fer dapre Lalwa. Mon oule osi mentenir mon lapel avek tou travayer pou enkilke dan nou sa kiltir travay dir. Donn plis ki posib dan nou travay pou anmenn en bon nivo produktivite.

Departman Lanplwa pou kontinyelman entansifye zefor pou asiste tou dimoun ki pe rod en lanplwa. Mersi.

MR SPEAKER

Mersi Minis. Onorab Gill wi ou kapab swiv.

HON CHURCHILL GILL

Mersi Mr Speaker. Mersi Minis pou ou lesplikasyon byen detaye. I kler ki ler Mars pou arive i pou tre *challenging* pou ou Minister. Akoz i pou annan dimoun ki pou'n kapab ganny en lanplwa, me i pou osi reste en sirfas e konsekan ki zot pa pou ankor ganny en lanplwa.

Alors mon premye kestyon pou Minis, se ki fason ki ou Minister pe mazin antreprann program *reskilling*, an relasyon avek sa bann *redundancy*, pou asire ki travayer ki ganny fer *redundancy* pa reste tro bokou letan san en lanplwa?

Mon dezyenm kestyon se, pou fer *reskilling* i annan plizyer fason fer. Me selman ou pou definitivman bezwen serten ankadrer pou serten kalite *skill*. Eski i annan en konversasyon ki pe fer dan direksyon pou kapab ganny ankadrer, pou kapab fer bann *reskilling* dan bann seksyon kot nou pou bezwen ankadrer?

E mon trwazyenm kestyon, ki program ki ou Minister pe mazin fer pou Praslin an term *reskilling*? Mersi.

MR SPEAKER

Mersi Onorab. Minis.

MINISTER PATRICIA FRANCCOURT

Mersi Onorab pou ou kestyon. Mon kontan ki ou'n met lanfaz bokou lo *reskilling*. I vreman enportan. E *you are right*, i pou bezwen arive pou nou kapab plas dimoun byen kot fodre. Pou donn zot plis loportinite ganny loubraz.

Akoz nou'n pran *SETS* anba nou *umbrella* lanplwa, *it comes* avek en *budget* ki pa'n servi. E mon kapab dir ki R4.5 milyon ki nou pou met totalman dan *reskilling*. E nou annan bann konversasyon ki nou pe fer avek bann leres *partners*, pou nou vwar ki mannyer zot kapab donn en koudmen.

Sa i pa en travay Lanplwa tousel sa. Nou pe tap partou kot nou kapab. Lanplwa li menm li i annan son programm ordiner, e nou entansifye lo la. Kot nou menm regarde pou bann dimoun ki *for a very long time* zot pa'n dan lanplwa zot, zot in fini perdi tou sa bann *skills*, zot in fini perdi labitid pou leve pou al travay.

So nou pe fer en programm *reintegration into work*. Konmsi ki mannyer nou fer zot annan sa *hope* ek sa lespwar pou zot kapab antre ladan, in adisyon dan bann programm normal ki nou *run around reskilling*.

Pou Praslin mon konnen mon ti ganny sans koz avek ou lo la, nou vreman konnen poudir nou bezwen entansifye nou zefor lo Praslin. E i pou tonm anba sa larzan, sa Bidze ki nou'n gannye. E nou annan diskisyon avek enn nou *partner*, sirtou *SCCI* ki vreman annan en program konpreansiv. Ki zot le *join* avek nou, pou ogarde ki mannyer nou kapab met sa program *reskilling* an plas.

Nou'n menm komans koz lo landrwa, ki mon konnen ou'n donn mwan enn de bann nide kote ki nou kapab fer sa posibil. Akoz nou konnen kot *SETS* ti *ete* en ptipti landrwa. So mon'n apresye ki ou'n donn mwan ase lenformasyon pou konpran byen lo zil Praslin ki pe arive. E ki mannyer Departman Lanplwa i kapab *step in*, pou kapab ed sa bann dimoun.

Mon donn ou mon parol ki nou pou bezwen met zefor pou Praslin avek La Digue, *just as much* akoz *we want the*, nou le dimoun retourn travay.

Avek sa Bidze i pou larg nou lanmen en bon pe. *So it is finding the right people* pou nou kapab fer sir sa program i efektiv. E i *follow* sa bann dimoun *right through and get then into jobs*. Mersi Onorab.

MR SPEAKER

Mersi Minis. Onorab Loze.

HON JOHAN LOZE

Mersi Mr Speaker. *Minister* lannen pase letan *Employment Act* ti vin devan Lasanble Nasyonal pou ganny amande. Nou lo nou kote nou ti sey pas en amannman, ki ti pe demande ki avan okenn *redundancy* i ganny propoze. Ki gete avan si i annan etranze ki kapab ganny fer *redundant* dan plas e avan okenn Seselwa. Sa ti ganny bloke par *LDS*.

Dan menm letan mon ti propoz en amannman ki ti pe demande konmkwa ki serten lanplwa, serten *trade*. Par egzanz bann *shopping assistants* i ganny garde pou Seselwa. Sa osi ti ganny bloke par *LDS*. Ofet zot ti riye zot ti demande si bann Endyen i konnen ki mon pe dir dan Lasanble.

So Minis nou lo sa kote nou pe met Seselwa premye depi lannen pase nou, depi avan zot i menm realize ti annan Seselwa pou met premye. Nou ti pe met premye. Lontan nou met Seselwa premye. Avan zot in menm *figure out*. Ler zot ti pe blok Seselwa zot.

Mon keston i tre senp Minis, bann *redundancies* ki pe vini, eski i annan posibilite la

ozordi apre ki *LDS* in blok lamannman ki nou ti anmennen, pou *steer* zot plito dan direksyon bann etranze ki dan bann Seselwa? A sey protez nou Seselwa pou otan ki posib gard lanplwa egzistan ki zot annan. Favoriz en Seselwa *over* 1 ouswa 2. Oubyen okenn etranze ki pe gard son lanplwa dan sa pei. Mersi Minis.

MR SPEAKER

Mersi. Les Minis reponn silvouple. Minis.

**MINISTER PATRICIA
FRANCOURT**

Mersi Mr Speaker. Mersi Onorab. Mon kapab dir poudir bann zofisye i get byen bann aplikasyon ki antre *for* bann *similar nature* nou kapab dir. E *i still servi the Employment Act*, so sa nou konnen i marse.

Mon krwar apre midi antye i montre poudir sa 2 kestyon mannyer in annan parey nou dir en *correlation*. Enn i al zwenn dan lot, lot i vin dan lot. Mon krwar apre midi antye mon pe sey, mon'n kontinyen koz lo lenportans *localization of the post*.

Mon pa antre dan okenn bann konversasyon politik mwan. Mon koz realite mannyer i ete. Realite mannyer i ete, sey montre poudir nou annan en

devwar pou met Seselwa dan lanplwa, e donn zot en priyorite pou antre dan lanplwa. E realite mannyer i ete i demontre poudir Seselwa *has to take a job, when you are given a job, a place in a job* pou ou kapab soutenir.

So mwan mon ganny, mon louvraz ki mon ganny fer *is about betterment for Seychelles*. Mon pa met naryen *in between*. *So that is mon mandate* ki sa Minister i annan, Lanplwa, Sosyal, *Agency, is to give Seychellois opportunity*.

So mon krwar nou pe fer en bon travay. Mon pa konnen konbyen fwa apre midi mon'n koz lo *localization of posts*. Mon kontinyen dir ankor priyorite *is for our people by* parey nou dir en fason ou en lot nou pou fer nou vreman, vreman mye. Nou annan en *focus* devan nou, e fer sir nou dimoun i antre dan lanplwa.

I normal sa. E pou mwan sa i nou *focus*. E nou pe fer, mon lekip pe fer en travay fantastik. *We go out of our way to make sure that this will happen*. Parey mon'n eksplike, boner *it is up to us to make it happen*. Mersi.

MR SPEAKER

Mersi Minis. Onorab Andre.

HON CLIFFORD ANDRE

Mersi Mr Speaker. Bonn apre midi Minis avek ou lekip. Mon annan en kestyon Minis. Anba Lalwa i dir ki *competent officer* ki aprouv oubyen rekomann en *redundancy* ki pe ganny fer, konmsi ki pe ganny *apply for*.

Eski Minis i kapab dir mwan si bann *competent officer* zot vreman konpetan pou zot fer sa analis la ki mannyer sityasyon i ete? E si sa bann zofisye i osi gete si sa landrwa ki pe demann pou fer en *redundancy* i ti annan en loperasyon Sesel. Me in tir son loperasyon Sesel, in anvoy dan en lot pei. E aprezan i pe fer Seselwa ki ti travay dan sa sekter, *I mean* i pe *apply* pou fer Seselwa *redundant*.

Akoz Lalwa i dir ou si ou annan en Seselwa, oubyen ou annan en etranze ki dan sa pozisyon ki pe ganny fer *redundant*, Minister pa pou aprouv sa *redundancy*.

So mon pe demande si zot get sa *holistically*, pou kapab fer sir ki nou ganny en *fair deal* e Seselwa dan sa letan difisil i benefisye? Mersi

MR SPEAKER

Mersi Onorab. Minis.

MINISTER PATRICIA **FRANCOURT**

Mersi Mr Speaker. Mersi Onorab pou ou kestyon. Mon *totally agree* avek ou. Sa anba Lalwa i dir ou *competent officer must be competent*. E sa i mon devwar pou fer sir ki tou mon *competent officers, in actual fact* tou dimoun ki travay dan Departman Lanplwa i bezwen konpetan dan sa ki zot fer. Zot *very highly trained* mon'n vwar sa. E mon annan en privez ki preski tou sa bann *folders* i vin devan mwan, mon demande pou vin devan mwan. So *I am the last*, dernyen lizye parey nou dir ki *scrutinize* sa vreman byen.

Mon annan en drwa pou mwan war tou sa ki vini devan mwan, e sa i ganny fer. E kot pa sir, mon pa asire mon demann kestyon. So sa i enportan. So *competent officers* i bezwen get bann kriter, e mwan mon konpran ki mannyer bann kriter i marse, e *scrutinizes* li byen *accordingly*.

So sa mon kapab dir ou poudir i enn bann standar. Mon *own expectation* ki mon ti set, fodre nou travay byen, nou travay drwat. E nou travay dan en fason ki i annan lentere pou nou bann dimoun.

I annan bann ka ki vin devan nou kot Lanplwa, kot ou war *for whatever reasons*, bann travayer Seselwa i ganny

kwense, e i ganny tire. E mon a dir ou en keksoz Onorab, i pa fasil zis pou mon dir sa *redundancy* i ok. *I really challenge it. And I challenge it all the way.*

Si fodre mon fer sa *GM* sorti *La Suisse* vin asiz devan mwan e reponn kestyon, i pou vini. Si mon pou bezwen fer sa *owner* vin asiz devan mwan, mon'n fer, e i pou bezwen vin reponn kestyon. So mon priyorite *is always about making sure our Seychellois gets the very best.* Mersi.

MR SPEAKER

Mersi. Onorab Pillay. E apre sa mon a pran Onorab Labonte. Si ou kapab met ou pare.

HON SEBASTIEN PILLAY

Mersi Mr Speaker. Mr Speaker mon konnen ou pe kontinyelman regard letan e ou pe sey ou mye pou ou *manage* letan. Me selman sa size ki, sa 2 size ki nou'n aborde dan sa 2 kestyon i bann 2 size vreman enportan pou en kantite dimoun, en kantite fanmir. E fodre ki nou pa *take for granted* ki i annan en kantite dimoun ki pe anvoy masaz e ki pe *text*. Menm bann Manm partou lo lot kote latab e menm nou.

Akoz zisteman zot konsernen avek sa sityasyon ki

pe arive. E i enportan Mr Speaker ki...

MR SPEAKER

Ale bouz lo kestyon nou ava pli vit Onorab Pillay.

HON SEBASTIEN PILLAY

Mr Speaker, mwan mon bezwen met devan ou, si ou, ou pe *rush* mwan pou demann en kestyon, e mwan mon pa ganny sans met mon pwennvi devan Minis, Savedir ou pe *deny* Lepep Seselwa la deor loportinite pou konnen ki pe pase! Me ou ki Speaker so mwan mon ava swiv ...

MR SPEAKER

Onorab Pillay mon rekonnet ...

HON SEBASTIEN PILLAY

... mon ava swiv direksyon ki ou pe donner, e mon ava fer mon pwen.

MR SPEAKER

Silvouple mersi.

HON SEBASTIEN PILLAY

Mon pwen i koumsa Mr Speaker *ok*. Minis in dir nou sa 2 *issue* i *cross cutting*. I byen Minis mon'n remark pasyon dan ou lavwa, e ou louvraz ki ou pe fer. Mon napa problem ek sa. Me selman fodre ou

Gouvernman i aret anvoy *mixed messages* avek dimoun.

Mon pou eksplik ou aköz Minis atraver mon kestyon. Ou Gouvernman avek 6 nouvo sekretarya Minis, i pe depans li pa mwens ki R11.8milyon adisyonnèl lo Bidze. E prezan nou'n deza vwar poudir ler en dimoun i ganny fer *redundant* i pou *end up* lo swa program URS. Swa i ti pou *end up* lo program FA4JR. Nou pe *phase-out* tou program.

Nou pe dir li re al rod travay dan marse lanplwa. Ler i ganny fer *redundant* i *add to* sa *pool* dimoun ki pe rod travay. Li i ti pe sorti dan en lanplwa kot i ti pe ganny peye, i pe ganny fer *redundant*. Me i pou annan en serten letan kot i pou kouver aköz *redundancy* i en *process*.

URS pe arete li. I napa opsyon li. E Onorab Henrie in *mislead* Lasanble ler in dir Lalwa ... Aköz si i ti'n lir byen Lalwa i ti'n ava war poudir, aköz mon krwar i pa'n lir Lalwa. In sey *mislead* sa Lasanble. Ki i dir ou poudir en dimoun i *fail* pou li pran en louvraz.

So Minis ou kapab pa reponn sa enn Minis, me Minis eski ou Gouvernman i serye? Oubyen eski ou Gouvernman pe sey zis montre poudir i pa oule enplimant, i pa oule propoz en *Scheme*, e ki nou pou war ki

i annan en kantite dimoun ki apre Mars pou dan difikilte serye, par lefe ki lakantite plas ki pou annan *available* pou lanplwa i pou bokou an mwens ki lakantite dimoun ki pe rod travay?

Savedir ou pou annan plis dimoun ki pe rod travay ki lakantite plas dan lanplwa. E adisyonnèlman Minis, mon ti a kontan ou klarifye lekel sa konpanyen ki apre ki in fer en *redundancy* pou 1200 ekek dimoun *foreigners*, in deswit rebran tou sa bann *foreigners* anba en lot lakonpanyen, *ok?* So mon ti a kontan konnen.

(Mr Speaker, ou war latitid bann Manm LDS ozordi. Latitid bann Manm LDS zot bezwen ... lo kestyon US...

(Interruption)

MR SPEAKER

En pe lord silvouple ...

HON SEBASTIEN PILLAY

... pou kapab demann en kestyon. Zot in bliye ki zot bezwen defann travayer.

MR SPEAKER

Onorab Pillay.

HON SEBASTIEN PILLAY

Yes, Mr Speaker.

MR SPEAKER

Les mon fer remarke ki ou osi plizyer fwa ou entersepte keksoz.

HON SEBASTIEN PILLAY

Ok Mr Speaker. Wi, wi, wi.

MR SPEAKER

Ok silvouple annou respekte kanmarad. Permet kestyon ganny demande. E permet Minis donn son repons. Silvouple Onorab Pillay ale, ou kestyon.

HON SEBASTIEN PILLAY

Non, Mr Speaker mon i ok mwan. Mwan mon parti in toultan defann travayer, nou pou fer li toultan nou.

(laughter)

HON SEBASTIEN PILLAY

Mon konpran problem LDS, ozordi zot dan Gouvernman. “*Homme* dan lopilans i bliy son nesans”. Zot dimoun pe konplent la, bann ki pa’n ganny plas pe konplent. So *relax* lot kote, *relax, relax*. Zot ava anbark lo nou ledò.

(Interruption)

MR SPEAKER

Order silvouple! Ale.

HON SEBASTIEN PILLAY

Mersi Mr Speaker. Mon realize mon pe fer lot kote ronfle en kantite, so mon ava demann mon kestyon ankor. So Minis so ou a klarifye lekel sa konpanyen ki’n fer sa? Si ou santi poudir sa lenformasyon i en lenformasyon konprometan, ou a fer Lasanble gannnen.

E dezyenmman, ki manner ki sa konpanyen ki’n fer sa *redundancy* apre ki in met sa 1200 ekek *foreigners* deor, in ganny sans rebran sa 1200 *foreigners*, e non pa prezan *allow* Seselwa pou antre dan sa bann *post* ki ti’n ganny fer *available*?

E mon lot kestyon Minis, tre senp, ki manner nou pou espekte bann dimoun ki’n *train* spesifikman dan en domenn parey *clerical studies* oubyen *secretarial studies*, oubyen mon pa konnen dan domenn *tourism*, pou kapab al ... Akoz lamazorite bann pozisyon pou dan domenn konstriksyon, ki manner zot pou akse lanplwa dan domenn konstriksyon?

So mon demann avek ou Minis se pou demann ou Gouvernman pou revwar pozisyon ki i pe pran, e konsider ki i pou bezwen annan en *Scheme* kelkonk, pou anmas dimoun ki pa pou kapab ... ki pa pou kapab ganny en louvraz.

E nou pa pou kapab anvoy tou dimoun kot *Welfare*. I pa sa ki nou bezwen al ladan. Mersi Mr Speaker.

MR SPEAKER

Mersi Onorab. Minis.

**MINISTER PATRICIA
FRANCOURT**

Mersi Mr Speaker. Mersi Onorab. Ennler mon'n perdi dan kestyon.

(laughter)

**MINISTER PATRICIA
FRANCOURT**

Solman mon kontan ou kestyon. Ma sey mon *very best*, mon'n ekoute. Akoz letan mon pe *go down the root of* eski nou pe zis dir *figures*? Eski nou pe zis dir keksoz?

Mwan mon kapab dir ou Onorab non, nou pe analize nou. Nou pe analiz vreman byen. *The trend* i montre mon dir ankor. *There are jobs, there are jobs*. Mon pa konnen konbyen fwa mon pou kriye mon pou dir. Nou, nou fer nou bout, dimoun i bezwen fer son bout. *Come forward*.

Sa ki mon ti a kontan war poudir *unemployment figures* i *go down, and people are in jobs*. *We are trying our very best*. Parey i dir, mon pa konnen si isi

nou dir nou anmenn bef kot delo, si nou anmenn seval mon pa konnen. Be *we are taking you there!* Nou pa pou kapab fer ou bwar nou.

So nou *trend* i montre i ankourazan. *So again* mon pou dir i ankourazan. *So* nou *hope like I say*, nou pa pe dir dimoun vin lo *welfare* nou. Nou pe dir dimoun annou met ou dan lanplwa, kekfa *this is a turnaround* dan Sesel. Kot *employment comes first*. E sa *itself* i en *huge empowerment process* pou dimoun. Ou *take pride* letan ou konnen en poudir ou kapab dan en lanplwa, e bann *benefits* ki i anmennen pou ou.

Nou serye, *of course* nou serye. *If anybody* ki konsider dimoun vilnerab, se mwan. Dan tou mon louvraz ki mon'n fer mon'n konsider dimoun vilnerab. So pou mwan i en misyon avek mon tim deryer mwan. Ek tou bann leres *partners* ek *stakeholders*, pou nou kapab fer sir poudir dimoun *doesn't become vulnerable and they can make it*. *They can strive and they can move forward*. Petet sa, sa loportinite pou nou kapab fer sa.

Lo sa *figures* ki nou ti pe dir *in terms of the redundancy* ki'n ganny abzorbe, mon ti pe zis

fer referans pou montre akoz i annan sa *disparity*. Me mon pa dan en pozisyon pou mwan donn sa bann lenformasyon. Petet letan mon ava annan konsiltasyon, *I will let you know if we can share this information*. Akoz i pa pou normal pou mwan fer sa.

Me solman nou annan bann *GOP framework*, en *change of employer under* nou *framework*. Petet letan nou ava donn lenformasyon lo *the review of the framework*. En pe keksoz i ava fer sans en pti pe pli byen ki manner keksoz *for the future will be*. Mersi.

MR SPEAKER

Onorab Pillay permet mwan *move on*. Onorab Labonte.

HON SEBASTIEN PILLAY

Mr Speaker, *point of order*.

MR SPEAKER

Wi, Onorab Pillay.

HON SEBASTIEN PILLAY

Mersi Mr Speaker, mon *remind* Minis nou Konstitisyon i prevwar ki Lasanble i kapab *compel the production of* okenn dokiman ki i neseler pou nou fer nou travay.

So mon ti ava demann ou pou anvoy sa lenformasyon kot Lasanble, ki nou a konnen lekel

sa bann lakonpanyen ki'n fer *redundant* dimoun, dan ki sekter. E ki nou ava kapab *at least* ganny en konpran ki pe arive. E ki bann Manm i ava konnen si dan zot bann distrik respektif, i annan bann dimoun ki pe perdi zot travay. E ki manner prezan si sa bann dimoun demen i vin rod en lasistans, zot a kapab gid sa bann dimoun e diriz sa bann dimoun. Nou bi la se fer sir lo komansman lannen nou fer sir ki i annan en plan ki manner nou kapab ed tou dimoun.

So avek sa Mr Speaker, mon ti ava demann ou pou met an aplikasyon provizyon ki egziste dan nou Konstitisyon, pou ki nou kapab ganny lenformasyon neseler pou nou konnen ki pe pase.

E sa in ekrir an nwar e blan dan nou Konstitisyon Mr Speaker. Ou kapab gete *at your leisure at any time* ki ou anvi. Mersi Mr Speaker.

MR SPEAKER

Mersi Onorab. Wi. Onorab Labonte.

HON ANDY LABONTE

Mersi Mr Speaker. Mon annan zis 2 pti kestyon. Me avan tou mon ti a kontan swet labyenveni *Minister* avek ou *panel*. E sirtou pou mwan i en

gran plezir pou *welcome* ou nouvo Manm ki fek zwenn nou. Mon anvì pran sa lokazyon pou li felisit li osi, vi ki i fek ganny apwente lo Komite (NEC) US. Vi ki i enn mon *constituent*. Mon dir ou *congratulation!*

(APPLAUSE)

MR SPEAKER

Kestyon Onorab.

HON ANDY LABONTE

Ok. Bon Mr Speaker, vi ki parey nou'n tann koz *redundancy*, e *reskilling* osi, so mon pe gete si petet dan Minister Lanplwa li menm li petet i annan serten keksoz enteryer ki zot anvì *reskill* zot bann *staff* pou donn bann nouvo kekfwa kapabilite pou kapab deservi lo bann diferan lot Komite ki annan pou kapab petet ed nou lo sa *process redundancy*? Petet lo nivo Nasyonal or lo nivo parti osi.

E en lot kestyon lo kote *GOP*, vi ki *GOP* in ganny sorti, e nou Prezidan in ganny selman 100, mon krwar i fer 101 zour petet ki i ava arive byento dan lofis. Alor nou pe gete depi ler ki nou nouvo Prezidan in vin la. E ou ki'n vin nouvo Minis. Konbyen *GOP* ki ou menm ou, ou lofis in *issue*? Mersi Minis.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Mersi Onorab. Wi, mon dakor avek ou premye pwen. *Reskilling of our staff*, e mon *believe* ladan ki *climate* in sanze. Si nou bezwen annan en fason ki nou *reskill* nou bann *staff*. E mon pe tap lo tou sa laport posib. Mon pa pe fer sa travay nou tousel. Kot mon ganny ofer, kot mon ganny dir mon kapab anmenn tel *expertise* lo en baz volonter sirtou, mon pe *welcome that*.

You know i annan en kantite dimoun ki donn en koudmen. *Which is good*. E mwan mon pe tap lo tou laport dan okenn fason. E mon *staff* i annan en latitud pozitiv. Zot realize poudir *climate has change*, e pli zot ganny *empowered*. E pli zot ganny *knowledge of what to do better, they will embrace it for sure*.

In terms of bann figures. GOP figures for last year, finisyon last year, nou ti ganny aplikasyon of post 9420 ti ganny sent to us. 5500 ti ganny aprouve lo Mahe. Pou Praslin 635 aplikasyon, 472 aprouve. Pou dir pou lannen pase an antye sa. Mersi.

MR SPEAKER

Mersi Minis. Wi i vre Minis son kestyon ti an relasyon avek sa dernyen peryod 100 zour. Si ou annan sa sif?

MINISTER PATRICIA FRANCOURT

Mersi Mr Speaker. Mon napa sa sif, *but certainly* nou kapab regard lo la, anvoye.

HON ANDY LABONTE

Yes, sorry Minis. Parey ki *LOTO* in dir ki ler nou demann en lenformasyon i enportan. Petet ler ki sa lenformasyon a ganny sirkile, i a kler lo kot kote poudir se pa Gouvernman *LDS* ki'n donn en kantite *GOP*, me plito ler sa ladministrasyon avan ki ti la ki *GOP* ti ganny donner *left, right, and center*. Mersi.

MR SPEAKER

Mersi Onorab.

MINISTER PATRICIA FRANCOURT

Mr Speaker, si mon ti zis klarifye. I pa kestyon nou napa sa sif. I pa avek nou la, me selman mon a *forward* sa sif.

MR SPEAKER

Mersi. Mersi Onorab. Vi ki i reste mwan zis 2 Manm ki'n lev lanmen, e sa se Onorab

Woodcock e Onorab Cosgrow. Nou a pran sa 2 Manm kantmenm nou pe *extend* en pti gin. Onorab Woodcock.

HON WAVEL WOODCOCK

Minis an vi sa sityasyon ekonomik ki nou pei pe fer fas avek, nou'n war ki plizyer bann landrwa travay sirtou dan sekter prive, dan Sekter *Tourism*, en bon pe dimoun pe ganny fer *redundant*.

E *redundancy* i kapab arive dan nenport ki landrwa. Annefe i kapab menm ariv dan nou Lasanble avek bann Manm proporsyonnel. Ki mon mazine ki byento pou annan *redundancy* lo kot kote latab osi.

Mr Speaker, mon kestyon i *comme* swivan;- en pe letan pase ti annan en *sort of moratorium, embargo* lo bann *GOP* ki ti pe ganny donner. Konmsi ti annan en restriksyon lo donn okenn nouvo *GOP*. E an menm tan pou *renew* bann *GOP* sirtou dan Sekter *Tourism*. Ti annan kot si zot ti pou *renew* en *GOP* zot ti pou bezwen retourn kot Lanplwa pou donn laprouvasyon pou sa.

Me selman i annan konsern deor ki dan lepase i annan *GOP* in ganny aprouve menm akoz ti annan sa *moratorium*. E menm si i annan

sa striktir ki'n ganny met an plas, kot *renewal* nouvo *GOP* zot bezwen al kot devan Lanplwa, i pa e neserman ganny swiv.

Mwan mon pe demande si sa i ankor pe ganny fer? Akoz nou pe war dan bann landrwa travay sirtou dan bann lotel, kot Seselwa pe ganny fer *redundant*, me selman *GOP* pe kontinyelman ganny *renew*. Eski zot pe met plis lanfaz lo la pou fer sir ki sa bann keksoz pa pe arive? Mersi bokou.

MR SPEAKER

Mersi Onorab. Minis.

MINISTER PATRICIA FRANCCOURT

Mersi Mr Speaker. Mersi Onorab. Lo kestyon *GOP* parey mon'n dir zis bomaten nou'n bezwen prezant *the new GOP framework to Cabinet*. I annan enn de keksoz ki nou bezwen azoute ladan. Nou pou *definitely* donn plis lenformasyon.

Aprè osi mon fer resorti poudir nou'n fer en bon konsiltasyon avek *private sector*. Akoz sa i pa keksoz ki nou kapab fer lo nou menm. Nou'n fer bon konsiltasyon, konsiltasyon i ankor *ongoing*. So mon konpran ou bout ki ou

pe dir poudir ou war *GOP* i ganny donner.

Me solman mon kapab dir poudir enn bann keksoz ki nou pou fer sorti dan sa *new GOP framework, all applications will go through us, Employment*. So *we have the first sight* olye par egzantp avan mon konnen ti annan *Certificate of Entitlement* ti al kot Imigrasyon. *But that is one of the thing* ki nou'n mete, nou'n propoze. *It will come first sight to us*. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. En pti *comment* apre en kestyon. Minis mon *comment* i *follow* en pti pe lo sa ki *Leader* Lopozisyon fek dir. Boner dan premye kestyon ou'n dir nou konmkwa ki poudir ou pou sey tou fason pou sey met bann Seselwa ki ganny fer *redundant*, ouswa ki dan bann program dan lanplwa.

Me kontrerman ou'n dir la ki poudir i annan konpanyen in fer *redundant* 100 ekek etranze. E otomatikman, *sorry* 1000 ekek etranze. Otomatikman 1000 ekek etranze in ganny anploye dan en lot lakonpanyen. Ki en pti

pe kontradiktwar Minis avek sa ki ou'n dir boner.

Parkont Minis mon keston se ki, ozordi bokou ka *redundancy* i relye avek bann biznes ki pe faid. Napa larzan pou menm pey *terminal benefits* pou bann travayer. La ankor mon pe mazin ler *Scheme FA4JR* i ganny aboli, mon zis enkyet pou mazine ki kantite pou arive, konbyen?

Minis konbyen letan i pran pou Minister dil avek ek ka *redundancy*? Ki mannyer ou Minister i pou asire ki bann travayer i ganny zot *terminal benefits* dan en delay letan rezonnab?

Sirtou la ki zot pou bezwen zot larzan, tou bann *Scheme* pe ganny aboli. So Minis si ou kapab elabor en pti pe lo la silvouple. Mersi.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Mersi Onorab. Sa premye pwen ki ou'n dir poudir ti'n annan sa *redundancy*, me selman sa bann travayer in ganny *incorporated*. Sa ti anba *the GOP framework at the time*. Ki ti annan en *change of employer*.

Sa ti ganny met an plas pou letan *COVID*. *This is last year right? So way before me*. E sirtou pou bann dimoun ki pa ti kapab sorti *out of Seychelles*, *border* ti'n close. E pou fer sa bann louvraz kapab kontinyen, sirtou si ti konstriksyon, si ti lagrikiltir *and so on, there was a plan to change of employer* pou kapab fer louvraz kontinyen marse.

Be solman sa in vin form par nou *GOP framework review* ki nou'n travay lo la. E *we will come up with the new review framework which in a day or two* nou pou koz lo la. So *hopefully* sa i a kapab close the gap en pti pe lo la.

After all, pou annan sa bann dimoun, *borders* in fermen, kote zot pou ale. So *this was one of the agreement* anba *GOP framework*.

In terms of redundancy. *Redundancy has to be done* dan 21 zour. *And* tou bann *benefits* i bezwen ganny *paid* swa sa dimoun in, si *redundancy* in ganny aprouve zis apre.

Nou donn en mwan terminasyon pou anplwayer *submit* son *proof of payment to Employment Department*. So sa bann Regilasyon ek bann Lalwa i *very straight forward* lo la. E mon krwar poudir *Employment Department* i fer en *good job* to

ensure that this is put into practice. Mersi Onorab.

MR SPEAKER

Mersi. Avek sa nou'n ariv a lafen nou sesyon. Mon a remersye Minis ek son delegasyon pou zot prezans e zot partisipasyon. E mon a swet zot bon kouraz dan kontinyasyon zot travay. Eskiz mwan *Leader* Lopozisyon. *Leader Government Business.*

HON BERNARD GEORGES

Non, non, Mr Speaker mon ti pe zis fer ou rapel ki ou ti'n promet *LOTO*, kekwfa ou ti ava donn li en lot pti sans si i ti annan....

MR SPEAKER

Be nou'n fini donn li. Nou'n fini donn li *Leader*. Mersi.

(laughter)

MR SPEAKER

Onorab Pillay mon krwar mon'n fini donn ou sa posibilite.

HON SEBASTIEN PILLAY

Mr Speaker, mwan mon'n sezi tou loportinite ki mon'n gannyen ozordi pou ki sa Minis ki'n vin dan Lasanble, apre ki son Gouvernman in kontinyen fer plizyer lanons pou li ganny loportinite *maximum* pou li eksplike. Nou'n anmenn 2

kestyon dan Lasanble atraver kote *US* pou donn li loportinite pou eksplike.

Nou'n fer tou sa ki nou kapab. Nou'n sey alert Gouvernman poudir in met R11.8milyon adisyonnal dan bann sekretarya pou bann Minister. Nou pe sey nou mye pou fer Lepep Seselwa konpran.

So mwan mon remersi ou enfiniman. Mon'n ganny loportinite pou met tou mon bann pwen devan. E prezan *hopefully* mon demann tou bann dimoun ki pe ekrir nou, pe dir nou zot pe ganny met deor. Zot in ganny dir *URS* pe arete. Komans ekrir ou, koman Speaker. Komans resevwar serten sa bann *call* ki bann Manman pe *call* mwan. E ou a konpran en pti pe rezon akoz Minis i kapab eksplik sa! Mwan mon *ok* Mr Speaker. Mersi bokou.

MR SPEAKER

Mersi. Mersi pou ou kontribisyon Onorab Pillay. Bon alor Minis ek delegasyon, mersi e orevwar. Nou Lasanble i fini pou sa semenn. Mon rapel bann Manm ki nou zwenn Mardi le 9 pou ladres lo Bidze, par Minis Finans. Mersi bokou.

(ADJOURNMENT)

